

WANT

NIUSPEPA BILONG YUMI OL PAPUA NIUGINI STRETI 27 YIA NAU

32 pes Namba 1,276 Wik i stat long Fonde Desemba 10, 1998 60t

INSAIT

• Ol kalabus ranawe long Bomana na Bui lebi.

- pes 2

Madang na Lae Nius

pes 8- 9

• Pamuk vidio kot go long Nesenel kot.

- pes 3

• Skate bai rausim 56 kalabus lain.

- pes 3

Lukim 4 pes spot ripot long insait

K800 milien i hait long ovasis beng, Skate i tok

YAKAM KELO i raitim

PRAIM Minista Bill Skate i tok mani olsem K800 milien i stap long wanpela beng long Cayman ailan long hap bilong Karabien long Sentrel Amerika.

Mista Skate i tok dispela em mani bilong ol pipel bilong Papua Niugini na Gavman bilong em i mas wok strong long kisim i kam bek.

Mista Skate i tok ol loya bilong Gavman i bin painimaut long dispela mani. Olsem na ol loya bilong Gavman bai i go het long sekim gut ol ripot na kamapim dispela mani i kamap ples klia.

Em i tok husat man i asua long mekim dispela mani i kamap long dispela ovasis pasbuk bai sanap long kot.

Mista Skate i no tokaut long husat i asua long putim dispela mani long hap na tu em i no laik tokaut long mani ya i go long hap olsem wanem.

Long dispela wik Mista Skate i makim Simon Kaumi long kamap Minista bilong Jastis long pusim ol loya bilong Gavman long mekim wok painimaut i go insait long dispela K800 milien na tu sekim ol arapela projek na wok olsem Sandlain kontrak, Orogen sea, Malagan Haus, POSF hevi na POSF haus long Kens Australia, Nu Briten Pam Oil na ol arapela moa.

Mista Skate i laik loya bilong Gavman i mas kamautim olgeta dispela samting i kamaut ples klia.

Seketeri bilong Jastis Michael Gene i tok dispela pasbuk long Cayman ailan i bin kamap sampela krismas i go pinis. Olpela Gavman bilong bipo i bin opim dispela pasbuk long putim ol mani i go long en long bekim dinaw we Gavman i bin kisim long sampela projek insait long kantri. Olsem na dispela beng i askim long pasbuk ya i mas op bai PNG Gavman i ken putim mani i go long en na bekim ol dinaw.

Mista Gene i tok dispela em mani bilong ol pipel bilong PNG we i save kam long oil, gol, kopa na ol risos bilong PNG. Olsem na ol i mas autim dispela akaun i kam ples klia long ol manmeri i save.

Tasol namba tu lida bilong Oposisen, Chris Haiveta i tok dispela pasin Mista Skate i mekim i soim tru olsem Skate i laik giaman karamapim ol hevi em wantaim Gavman bilong em i gat. Na pulim tingting bilong ol pipel i go longwe long ol arapela samting na lusim tingting long hevi bilong Skate na Gavman bilong em.

Mista Haiveta i kolim ol hevi olsem, Mujo Sefa vedio teip we i soim Skate i laik baim ol memba, toktok olsem Skate i givim K9 milien long olpela edvaisa bilong em Luke Lucas i go long Hong Kong long baim Sandlain, toktok we Skate i makim gen Jerry Singirok i kam bek olsem bos bilong



Aipas manki pinisim skul... • Peter Wasape (namel) em wanpela aipas studen bilong Gerehu hai skul. Em i pinisim gret 10 na kisim setifiket bilong em. Long lephan em man i save was long em na long raithan em mama bilong Peter. Liklik boi i sindaun long fran em liklik brata bilong Peter. Poto Bae Kimali.

PNG Difens Fos, ripot bilong wanpela Gavman memba long wokim pamuk vidio wantaim wanpela yangpela meri, ripot long edministresen mani bilong NCDC na ol arapela moa. Mista Haiveta i tok tu olsem PRAIM

Minista i no ken pusim Mista Kaumi long pusim ol Gavman loya long wok bilong ol. Ol i mas sindaun gut na mekim plen long ol bikpela kot na hevi we i stap yet long han bilong loya long pinisim.

Manus pipel pret nogut solwara gat posin

VERONICA HATUTASI i raitim

SINGAUT i go long Nesenel Gavman long helpim ol atoriti husat i go pas long wok bilong was long solwara long sekim aninit bilong solwara long Manus we i gat bilip olsem sampela sip bilong ol ovasis kantri i wok long tromoi kemikol pipia long en.

Wari i kamap bihain long wanpela plis patrol grup i bin lukim wanpela ovasis sip i tromoi ol 44 lita dram long solwara namel long ol Westen Ailan na Manus long Novemba 11. Na ol i bilip olsem dispela ol dram i gat ol kemikol pipia long en.

Nem bilong sip we plis patrol i bin lukim em "Cape Amerika" na ol i rejisteim long Geelong, Taiwan. Em i wanpela kago sip. Wanpela plis patrol i wok long kam bek long

Manus bihain long ol i pinisim ol wok patrol long ol Westen Ailan long las mun taim ol i lukim dispela sip i sanap i stap long biksolwara.

Provinsel Plis Komanda long Manus Joseph Morehari i tok ol pipel bilong Wuvulu na Auwa Ailan i laikim Nesenel Gavman long helpim Nesenel Seveilens Kodineting Senta (NSCC) na ol Nesenel Disasta na Imejensi Sevis (NDES) lain bilong glasim aninit bilong solwara we ol i

save lukim ol sip long en na painimaut wanem samting i stap aninit long en.

Mista Morehari i tok ol pipel long ol liklik ailan i putim ripot olsem ol i save lukim sampela ovasis sip i sanap isi long sampela taim na tromoi sampela samting long biksolwara. Dispela em long intenesenel mak long ol sip i bihainim i kam insait long ol Westen Ailan grup na dispela i stap insait long mak bilong solwara bilong PNG.

355ml Enjoy Coca-Cola

90t

Everywhere

ways

Coca-Cola

Don't Pay Any More!

Recommended Retail Price

PLIS RIPOT

Manus:

PLIS long Lorengau, Manus provins i holim pasim pinis tupela man long stilim ol samting we pe bilong ol inpa long K10,000.

Provinsel Plis Komanda bilong Manus Joseph Morehari i tok wanpela stilpasin i bin kamap long Stimsips Treeding kampani stoa long bikmoning Sarere Desemba 5 na stilim ol samting senso na ol kain samting olsem.

Plis i no autim nem bilong tupela man tasol ol i stap nau long plis sel. Plis i kisim bek tripela seso pinis.

Mista Morehari i tok ol bai painim yet tripela moa stil lain husat i ronawe hait i stap.

Manus:

Plis long Lorengau, Manus provins holim pasim na sasim tripela yangpela man long brukim haus na go insait long stil.

Stil pasin i bin kamap long Roy Pokat stoa we tripela man i bin go insait na stilim ol samting we pei bilong ol inap long K3,000.

Bihain gen, tripela yangpela man i bin pilim olsem pasin ol i mekim i no stret na ol i karim olgeta samting we ol stilim i go long bikman kaunsila long Pitulu na bikman i kisim tripela i go long plis we ol bin sasim ol.

Mista Morehari i amamas long gutpela pasin we ol yangpela i bihainim long luksave long asua bilong ol na givim ol yet long han bilong ol bikman long komyuniti.

Long narapela, wanpela yangpela man bilong ples Temanai long Saut Kos Manus i bin paitim narapela man na kamapim bagarap long bodi bilong em.

Kanawi wantaim 18 krismas i bin paitim haus-lain bilong em Poliap i gatn 38 krismas bihain long wanpela famili kros we i sut long graun.

Mista Morehari i tok stap long Manus i orait na i nogat planti meknais tumas.

Em i tok nau em i amamas long pasin we komyuniti i wok bung gut wantaim ol plis na kisim ol saspek i go long ol (plis). Long pastaim, ol no save wokim dispela.

Mosbi:

Ol raskol i bin bagarapim wanpela wokmeri bilong Waigani Golf Klab long Mosbi long dispela wik.

Samting ya i bin kamap long Mande nait taim meri ya i stap insait long kampani bas na faivpela man i hensapim bas na kisim meri.NCD/Sentrel Plis Komanda John Wakon i tok ol raskol i bin wokim holap wantaim tupela M16 raifel na tupela gan ol i wokim long ples.

Ol bin stilim tu K150 kes long meri na K1,100 bilong klab.

Mista Wakon i tok ol bin kisim meri i go long Eit Mail na bagarapim em.

Mosbi:

Plis i holim pasim na sasim wanpela yangpela man long kilim dai wanpela man Sepik long Waigani long dispela yia.

NCD/Sentrel provins Plis Komanda John Wakon i tok plis i bin holim pasim Plis i bin holim pasim Samson Maipe Koia husat i gat 22 krismas long Gordons bas stop long Mande na sasim em long kilim dai Mathew Rumpango wantaim 28 krismas bilong Yangoru, Is Sepik.

Kaumi, Wama na Yagabo i senisim Ministri


YAKAM KELO i raitim

PRAIM Minista Bill Skate i mekim narapela senis gen long ol Minista bilong em long dispela wik.

Mista Skate i tokaut olsem dispela senis i kamap insait long PNG Fes Pati bilong em we ol tripela memba bilong em i senisim wok Minista bilong ol.

Memba bilong Ijivitari Simon Kaumi i lusim wok bilong em olsem Minista bilong Provinsel na Lokol Gavman Afeas na kisim wok Minista bilong Jastis. Olpela Minista bilong Jastis Jacob Wama i kamap Minista bilong Fainens na Implimentesen. Olpela Minista bilong Fainens Dibara Yagabo i kisim ples bilong Simon Kaumi olsem Minista bilong Provinsel na Lokol Gavman Afeas.

Praim Minista Bill Skate i tokaut olsem dispela senis long ol tripela Minista ya i kamap bikos long ol senis na ol samting we i wok long




• Simon Kaumi.

kamap tude insait long kantri.

Mista Skate i tokaut olsem Mista Kaumi em wanpela strongpela man bilong wok na em bai lukautim gut wok bilong Jastis Dipatmen.

Mista Skate i tok bai Mista Kaumi na dipatmen bilong em i mas stretim ol planti bikpela hevi we i stap yet long kantri na klinim gut nem bilong kantri long ol pasin nogut na stil pasin we i stap bikpela.




• Jacob Wama.

Praim Minista i laikim wok painimaut i mas go yet insait long Orogen Sea, Sandlain hevi, hevi bilong POSF, Malagan Haus, Kens Konsevetri Dil, Nu Briten Pam Oil na ol arapela bikpela projek na wok moa.

Praim Minista i tok ol hevi insait long ol dispela bikpela wok i mas pinis gut bai kantri i ken go het long gutpela rot.

Em i tok ol dispela wok na



• Dibara Yagabo.

projek i yusim bikpela mani bilong kantri na em i mas kisim bek dispela mani bilong PNG. Em i tok mak bilong ol dispela mani i olsem K800 milien na sampela mani i hait long ol benk long ovasis.

Mista Skate i tok ol dispela mani em ol lida i stilim olsem na long kisim bek ol em bikpela samting na Minista Kaumi bai go het long traim kisim bek.

30 kalabus man ronowe long Bui lebi

WENCESLAUS MAGUN i raitim

EKTING Deputi Komisina bilong Plis, Sam Inguba i tok 30 kalabus man bilong Bui lebi haus kalabus insait long Sauten Hailens Provins i ronowe na ol plis i no holim pas wanpela bilong ol yet. Dispela em namba tu haus kalabus insait long Papua Niugini we ol kalabus i brukim na ronowe insait long wanpela wik tasol.

Ol dispela kalabus man i ronowe long haus kalabus samting olsem 6:30 na 7 kilok long nait bilong Tunde Decemba 1, bihain tasol long ol i go kaikai. Ol i bin yusim sampela samting long opim windua bilong haus kalabus bilong ol na i go ausait. Taim ol i stap ausait, ol i painim wanpela hol long banis kalabus na i ronowe long en.

Mista Inguba i tok long dispela 30 kalabus man i ronowe, 16 i kilim man indai, 7-pela i

kilim man i dai na stilim samting, 5-pela i traim long kilim man indai, tripela i stil wantaim gan na naip o tamiok, wanpela long rep,wanpela i kukim Sauten Hailens Provinsel Gavman Het Kwata opis, wanpela i brukim haus i go insait na stil na wanpela i haitim ol raskol na tu i ronowe long haus kalabus.

Nem, Krismas, ples na distrik bilong ol kalabus i ronowe:

Jack Pabolo, 28 bilong Metenda ples Mendi. Nandape Kende 20 bilong ples Riro, lalibu. Peter Walano, 20 bilong Riro ples, lalibu. Kupia Yoka, 22 bilong Riro ples, lalibu. Bula Sipi, 29 bilong Mondoanda ples, Pangia. Lukas Kende, 18 bilong Riri ples, lalibu. Kondo Musa, 19 bilong Walup ples, Pangia. Peter Kisimi, 19 bilong ples Mondoanda, Mendi. Warabe Agibe, 20 bilong ples Pai, Tari. Peter Mokai, 22 bilong Pirubi ples, Tari. Robert Pakaij, 19 bilong Pirubi ples, Tari. Talu

Tayabe, 19 bilong Pirubi ples, Tari. Ekanda Ayabe, 22 bilong Pi ples, Tari. Urulu Tumbuabu, 22 bilong ples Pi, Tari. Alibu Hepe, 32 Aku ples Kagua. Awai Kole, 20 Raku ples, Kagua. Yombi Kole, 18 Raku ples, Kagua. John Liwa, 27 bilong Paya ples, Komo. Telena Homog, 23, Abogia ples, Komo. Max Buka, 24 Ita ples, Kagua. Charles Henry, 19 Batiri ples, Erave. Kark M. Nawa, 19 Yamayama ples, lalibu. Haguai Irale, 25 Enda ples, Komo. Aliwa Tajape, 32 Pirubu ples, Tari. Thomas Homogo, 32 Tanda ples, Komo. Yapi Repo, 19 Yamayama ples, lalibu. Kennedy Kande, 19 Karanas ples, lalibu. Na John Kane Pandwe, 30 Enda ples, lalibu.

Mista Inguba i askim ol lain kalabus bilong Bomana na Bui lebi long givim ol yet long laik bilong ol long plis bikos ol plisman na Koreksenel Sevis man i go aut long fos long painim ol long tupela haus kalabus wantaim.

Plis holim 9-pela kalabus lain bilong Bomana

OL PLISMAN na meri bilong Nesenel Kapitil Distrik na Sentrel Provins i wok hat tru na holim pas pinis nainpela bilong 58 kalabus man husat i ronowe long Bomana haus kalabus long Fonde Desemba 3, long moning taim, NCD Plis Komanda, John Wakon i tok.

Long dispela 58 kalabus man husat i ronowe long Bomana haus kalabus, 28 i kisim sas pinis na 30 wet yet long go long kot. Ol kalabus man em;

Kalabus

Daniel Roy, Firi Rasta, Iropo Kove, Franko Mark Bitofa, Andrew Aputi, Tama Gonu, Andrew Koga Joseph Kawa, Peter Heano John Totori, Paul Jimmy Dominic, Tony Konje Olijjo, Robert Perupe Ben, Fabian Terure Kaupa, Sepa Paruma, Peter Avio Karato, Sepa Paruma, Peter Avio Karato, Aih Baki, Philip Koloka, Martin Vele, Joel Kapinas, Chris Bora, Morris Nivi, Jacob Iepeipei, Henry Kelo, Tommy Steven, Soni Peter Ephram, Jimmy Maino, Joe Haruni Aisi, Willie Songuf na Max Maitava.

Wet Kot

John Peter Laiam Manai, Peter Pio, Andrew

Magma Hara, Raphael Wagai Komarea, Alvago Tambali, Kevin Michael Mariano, John Charlie Bagola, Willie Kupa, Benny Maya Isaya, Joseph Aih Andrew, Michael Lucas Gua, Rueben Ha'Ari, Nomex Sine A Aron, Toa Marere, Robert Kene, Smith Airi, Agiru Pokopi, John Willie Tandole, Kauri Evo'o, Akapol Pepeurio, Kobil Tine, Lairim John, Peter Ango, Simon David Ape, Ben Yagapen, Micheal Peter Mai, Daniel Biang Junior, Jeffery Karo, Job Gunugai, na Nabas Balus.

Wanpela ripot i kam long Ekting Plis Komisina, Robert Korus i tok olsem olgeta dispela kalabus man i man nogut na i stap long kalabus bikos ol i brukim lo bilong stil, rep, kilim man, na bagarapim ol man na meri.

Mista Korus i givim strongpela tok lukaut i go long pablik long was gut long ol dispela man na i noken go klostu long ol. Em i askim tu olgeta pipel bilong PNG long toksave long ol plisman sapos ol i lukim o harim liklik toktok bilong ol dispela kalabus. Mista Korus i tok sapos ol pablik i bungim wanpela bilong ol dispela man, ol i mas ringim Boroko plis stesen long telepon namba, 3244200.

Kot disisen bilong Mune na Agiru long neks wik

PETER MAIME i raitim

OL PIPEL bilong Sauten Hailans bai save long neks wik Trinde wanem kain disisen Jas Warwick Andrew bai mekim long kot bilong Dick Mune na Anderson Agiru.

Mista Mune em i bin Gavana bilong Sauten Hailans bipo na em i lus long 1997 nesanel ileksen na Mista Agiru i bin winim sia bilong em. Mista Mune i ting sampela paul pasin i bin stap insait long ileksen bilong Sauten Hailans rijional sia na em i kisim Misa Agiru na Ilektorel Komisin i go long kot.

Dispela kot bilong tupela lida ya i bin kisim longpela taim liklik. Tupela i bin kot long nesnel kot na bihain i go long Suprim kot na las long en, em i kam bek gen long nesanel kot. Long Nesanel Kot long Mt Hagen, Mista Mune na Mista Agiru i wanbel long Ilektorel Komisin i ken kaunim gen ol balot pepa bilong Tari-Pori, Komo Magarima na Koroba-Kopiago.

Nesenel Kot i tok orait long kaunim gen ol balot pepa bilong ol dispela-ilektret na dispela i bin kamap long Granville Motel long Mosbi long mun Oktoba long dispela yia.

Long dispela wik Mande, ol loya bilong Mista Mune, Mista Agiru na loya bilong Ilektorel Komisin i putim ol tingting bilong ol long Jas Andrew long Waigani Kot haus.

Loya bilong Mune, Paul Paraka i tok, Mista Mune i kisim ol vot i antap moa long Agiru bihain long ol i kaunim gen ol balot pepa, olsem na em i laikim bai kot i tokaut olsem Mista Mune em i bin winim sia bilong Sauten Hailans rijional.

Tasol Greg Sheppard bilong Maladina Lo Kampani husat i makim Agiru i tok, Mista Agiru em i bin winim sia bilong Sauten Hailans rijional sia.

WANTOK

All departments. Phone: 325 2500 - Fax: 325 2579
P. O. Box 1982, Boroko, NCD, Papua New Guinea

Publishing Weekly, Thursday, for
Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

Acting General Manager and Group Editor in Chief: Anna Solomon.	Papers distributed by air throughout PNG.
Advertising Manager: Mike Kanin.	Available by air mail subscription within Papua New Guinea and overseas
Acting Editor of Wantok: Yakam Kelo	

Advertising deadlines, Display bookings: Tuesday midday. Camera ready copy: Wednesday midday. Classified Advertising: Wednesday 5pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official display Advertising Bookings form.

Kaumi tok Gavman bai rausim ol kalabus husat i no inap mekim trabel

GAVMAN bai glasim gut husat man o meri ol i ting i no inap mekim trabel long komyuniti bipo long ol i rausim ol long haus kalabus, Minista bilong Jastis, Simon Kaumi i tok.

Mista Kaumi tok olsem bihain long Praim Minista Bill Skate, i promisim ol kalabus bilong Bomana haus kalabus long Sarere Novemba 28, olsem em bai rausim 53 o 56 kalabus man na meri long wan wan haus kalabus long PNG dispela wik.

Mista Skate i tok tu olsem em bai rausim gen samting olsem 30 na 40 kalabus man na meri long Gut Fraide long neks yia. Em i ken rausim ol kalabus man na meri long laisens aninit long pawa bilong marimari insait long Mama lo bilong PNG. Long strongim promis bilong Mista Skate, Mista Kaumi i tok komiti bilong rausim ol dispela kalabus man na meri bai i no inap rausim wanpela kalabus man o meri ol i bilip inap mekim trabel long komyuniti o i ken mekim trabel.

Em i tok ol bai rausim tasol ol kalabus man na meri husat i soim pasin olsem ol i ken go bek long sosaiti na i no inap mekim trabel. Em ol lain husat komiti i bilip ol i senisim pasin bilong ol long haus kalabus na i redi long putim sampela gupela samting

i go bek long komyuniti. Mista Kaumi i tok komiti bai i no inap rausim ol kalabus man na meri husat i brukim lo bilong mekim pasin pamuk wantaim meri taim meri i nogat laik o husat i kilim arapela man o meri i dai.

"Baibel i skulim mipela long lusim sin. Na mipela i givim sans long ol dispela kalabus man na meri long soim ol olsem mipela i ken marimari long ol," Mista Kaumi i tok. Em i tok aninit long seksen bilong Kriminel Kod bilong rausim ol kalabus long laisens gavman i gat pawa bilong kisim bek dispela laisens ol i givim long husat ol kalabus man o meri ol i rausim i go fri sapos ol i brukim lo gen.

Mista Kaumi i tok ol Komiti husat i gat pawa bilong rausim ol kalabus man na meri long laisens i gat ol stia tok bilong bihainim. Wanpela bikpela stia tok ol bai bihainim em bilong lukautim ol pablik. Ol memba insait long komiti bilong rausim ol kalabus na meri em:

Atoni Jenerel; Koreksinel Institut Sevis Komisina; Plis Komisina; Parole Bod Siaman; Siv Probesen na Parol Opisa; Nesenel Intelijens Ogenaisesen Dairekta; na wanpela mausman o meri bilong Nesenel Kaunsel bilong ol Sios.

Pamuk vidio kot kamap long Nesenel Kot

REGINA Gibolo bai sanap long Nesenel Kot neks yia bihain long Waigani Komital Kot long asde Tride, i painim inap evidens long sas bilong em long mekim pamuk vidio.

Nesenel Kot bai glasim na harim dispela pamuk vidio na tu harim sait stori bilong Gibolo wantaim ol witnes. Kot bai wokim disisen taim em i kisim olgeta ripot wantaim ol toktok bilong loya bilong Gibolo, Powes Parkop na Plis Prosekyuta, Thomas Eluh.

Namba wan taim Gibolo bai sanap long Nesenel kot long Waigani em long Februari 1, 1999. Long las wik brata bilong Gibolo, Sent Pera i tokim Waigani Komital Kot olsem em i les long kamap wanpela witnes long dispela pamuk vidio kot. Pera i bin tokim kot olsem em i les bikos sampela lain i pretim em long kilim em na katim lek na han bilong em.

Opis bilong Plis Prosekyuta i tok, Pera wanpela tasol i no witnes. Em i tok i gat ol narapela witnes tu i stap. Tasol nau olgeta samting i stap long han bilong Nesenel Kot na kot bai tok husat bai kamap witnes na husat bai nogat.

Hap bilong dispela pamuk vidio, kot bilong Westen Hailans Gavana Pater Robert Lak bai kamap long tumora Fraide. Plis i bin sasim Pater Lak long slip wantaim yangpela meri husat i aninit long 16 krismas na bilong mekim pamuk vidio.

Sinia Mejstret bilong Waigani Distrik Kot, Allan Kopi bai i no inap harim dispela kot. Em i lusim na putim long han bilong narapela mejstret bikos Mista Kopi i no laik em wanpela tasol i harim kot bilong Gibolo na bilong Pater Lak wantaim.

Dispela pamuk vidio i bin kam aut long taim bilong bung bilong Nesenel Palamen long mun Septemba long dispela yia. Memba bilong Maprik, Sir Pita Lus i kisim i kam aut dispela pamuk vidio na i bin givim long Spika bilong Palamen, John Pundari.

Opis bilong Spika Pundari i no ripot long plis tasol, ol lain famili bilong Gibolo yet i putim ripot long plis na plis i bihainim dispela pamuk vidio i kam inap nau.

Wakon i tok nogat lo bilong stapim 'bol bering' pasin

PAPUA Niugini i nogat lo bilong stapim ol yangpela man long putim liklik bal o bering insait long pispis bilong ol. Nesenel Kapitel Distrik na Sentrel Plis Komanda Jon Wakon i tok.

Tasol em i tok dispela pasin em i no gupela bikos long bihain taim dispela bering inap kamapim ol bikpela sik na inap kilim indai ol man i gat dispela ol bering long pispis bilong ol. Em i tok ol lain i gat dispela bering long pispis bilong ol inap kamapim bagarap tu long ol meri long taim ol i slip wantaim ol.

Mista Wakon i tok tu olsem dispela em i wanpela pasin ol kalabus man insait long planti haus kalabus long kantri i save mekim na tu skulim ol arapela long wokim. Tude planti ol yangpela man na sampela marit man tu i wok long mekim ausait long haus kalabus.

Long dispela as Mista Wakon i givim strongpela tok lukaut i go long ol man i mekim kain pasin. Em i askim tu ol papamama na ol wantok bilong ol yangpela man long glasim gut pasin bilong ol pikinini man bilong ol bai ol i noken go insait long kain pasin.

Mista Wakon i mekim dispela toktok bihain long ol plisman i ripot olsem ol yangpela man i mekim dispela pasin na i save raun bagarapim ol meri. Na tu dispela i pusim ol man long holim na bagarapim (reip) ol meri.

Mista Wakon i tok dispela pasin i mekim na trabel bilong bagarapim ol meri insait long kantri i go antap moa.

Skate i no sainim yet pepa bilong rausim ol kalabus

WENCESLAUS MAGUN i raitim

SAMTING olsem 56 kalabus man na meri bilong wan wan haus kalabus insait long Papua Niugini bai wet liklik moa long haus kalabus bipo long ol i ken go fri aninit long laisens bilong go fri bikos Praim Minista Bill Skate i no sainim yet pepa bilong rausim ol long kalabus long dispela wik.

Koreksinel Institutut Sevis Komisina, Ken Serupi, i tokaut long dispela bihain long Mista Skate i promisim ol kalabus man meri bilong Bomana long las wik Sarere olsem em bai rausim samting olsem 53 o 56 kalabus man meri long laisens long dispela wik Mande o Tunde. Em bai rausim 40 moa kalabus man na meri long gut Fraide long neks

yia. Mista Serupi i tok Opis bilong em i bin salim pinis nem bilong ol kalabus man na meri bilong wan wan haus kalabus insait long kantri i go long Minista bilong Plis na Koreksinel Sevis Komisen, Thomas Pelika, bipo long Mista Skate i bin go lukluk raun long Bomana haus kalabus long las wik Sarere na i promisim ol kalabus long rausim sampela bilong ol long laisens.

Mista Serupi i tok pasin bilong rausim ol kalabus man na meri long haus kalabus em i no nupela samting long PNG. Long taim bilong Praim Minista Sir Julius Chan, Minista bilong Koreksinel Sevis i bin yusim dispela pawa tasol em i no bin yusim gut na olsem Sir Julius i bin rausim dispela pawa long em. Mista Serupi i tok Mista

Skate i opim gen dispela pasin long dispela yia.

Em i tok tu olsem ol kalabus man na meri husat bai kisim laisens bilong go aut long haus kalabus i stap longpela taim (olsem 75 pesen bilong taim bilong ol) long haus kalabus na ol komanda bilong wan wan haus kalabus i lukim olsem ol dispela lain i nogat rekot nogut.

Mista Serupi i tok dispela ol kalabus man na meri i winim taim long haus kalabus na i gat olsem siks mun moa bilong pinisim taim bilong ol. Sampela ol i laik rausim ol long laisens bikos ol i gat sik na sampela i lapun pinis. Em i bilip ol dispela kalabus bai go bek long ples na kamapim gupela sevis bilong helpim ol arapela pipel long komyuniti.

Manus pipel pret nogut solwara gat posin

I kam long pes 1

EM I TOK dispela eria bilong solwara i stap longwe tumas na nogat wok patrol tumas i save kamap long en. Na em i stap klostu long ol Masel Ailans long Maikronesia na Kiribati we Yunaitet Stets i save tromoi ol posin kemikol pipia bilong nuklia long en.

Ol pipel bilong Wuvulu i laikim bai gavman i wokim samting long sekim solwara.

Mista Morehari i tok em i putim pinis ripot i go long NSCC we Marin Difens i go pas long en.

Em i tok tu olsem ol NSCC lain i bin kisim wanpela pas we ol lain long Cape Amerika i bin salim bihainim dispela taim we plis patrol grup i lukim ol na ol i laik sekim sip tasol sip ya i kwiktam ronawe.

Long dispela taim, plis patrol i bin ripotim olsem sip ya i bin paiarim flea gan taim ol plisman i laik sekim sip. Bihainim dispela, ol plis i paia bek long ol.

Mista Morehari i tok long feks, Kepten bilong sip i tok ol stilman i bin bungim sip bilong em na ol i paiarim tiages long ol.

Tasol Mista Morehari i tok dispela i no tru bikos long ripot bilong plis patrol, ol bin lukim sip ya Cape Amerika long 6 kilok taim ol i lusim Wuvulu Ailan na ol i kam olsem long Auwa. Pastaim ol bin ting olsem dispela i wanpela sip long painim pis na i wok long stilim pis insait long solwara mak bilong PNG. Na em i sanap isi long wetim mama sip wantaim ol pis em i kisim. Tasol taim ol i go klostu, ol i lukim olsem dispela em i wanpela kago sip. Na patrol grup i lukim sip i tromoi ol 44 liita dram long biksolwara.

Wantok i bin toktok wantaim NSCC opis long Lancron Marin Difens na opis i tok em i tru ol i kisim ripot long dispela. Opis i tok ol bai lukluk long dispela samting bipo ol i autim moa toktok long dispela samting.

Difens Patrol bot beis long Lombrum, Manus i tok tupela bot bilong ol i stat pinis long patrol nau long solwara bilong Milen Be provins.

Opis bilong NDES long Waigani i tok dispela wari long ol toktok we i sut long sampela ovasis sip i tromoi pipia long solwara bilong PNG em i bikpela samting na ol bai mekim wok painimaut long en.



WANTOK

NIUSPEPA BILONG OL PAPUA NIUGINI

Taim bilong rausim ol kalabus i no stret!

PRAIM Minista Bill Skate i no mekim gupela disisen bilong rausim ol kalabus man na meri long dispela wik na moa yet long gut Fraide neks yia.

Aninit long Mama Lo bilong PNG, Prais Minista i gat pawa bilong rausim ol kalabus wantaim laisens bilong go stap fri insait long komyuniti na developim ples.

Mista Skate i kisim gupela nem tru long ol kalabus taim em i yusim Mama Lo bilong kantri na pawa bilong em long givim tok orait long rausim ol.

Wanem samting i no stret em, taim bilong givim dispela tok orait i no stret!

Last wik tasol 58 kalabus man bilong Bomana haus kalabus i brukim haus kalabus na ronowe. Ol plisman i painim 9-pela bilong ol tasol i kam inap aste. Long Fonde long sem wik yet, 30 kalabus i ronowe long Bui lebi haus kalabus long Sauten Hailens. Provisnel Plis Komanda bilong Sauten Hailens, Simon Kauba i tok ol i no painim wanpela bilong ol dispela kalabus i kam inap aste.

Namba bilong ol dispela kalabus i ronowe nau i sanap olsem 79 olgeta. Plis ripot i tok klia olsem planti bilong ol dispela kalabus em ol man bilong stil, bagarapim ol meri (reip), kilim man na brukim ol haus na stil.

Mista Skate, na Mista Kaumi i gat wanem kain gupela Krismas presen bilong ol gupela pipel bilong PNG, ol pipel bilong arapela kantri i kam wok long PNG, ol turis na ol bisnis haus?

Mipela i bilip disisen bilong Mista Skate i kamapim moa pret insait long sosaiti na hevi bilong lo na oda long kantri bai i no inap go daun tasol bai i go moa bikpela. Wanpela taim ken mipela i askim ol pipel bilong PNG long glasim gut ol lida na votim ol long yia 2002.

Bogenvil nius wantaim VERONICA HATUTASI..

Ol lida strong long sanapim BRG

OL BOGENVIL lida i sanap strong long kirapim Bogenvil Rikonsiliesen Gavman (BRG) maski Palamen i no pasim BRG Bil las wik.

Ol lida long tupela sait bilong hevi i tok strong olsem ol bai i go het na sanapim BRG maski em i no bihainim o kam aninit long lo. Aninit long agrimen we ol bin kamapim long Lincoln, Nu Silan long stat bilong dispela yia, ol lida i makim Nesenel Gavman na Bogenvil i bin pasim toktok olsem ol mas kirapim BRG long Jun 1999.

Tasol long Palamen las wik, BTG Bil i no bin kisim inap vot we gavman i mas kisim 73 vot long sapotim Bil na pasim. Palamen i bin karimaut vot long tupela taim tasol em no kisim inap namba bikos ol Oposisen memba no bin givim sapot.

Ol bin surukim Palamen long bung gen long Julai 13 neks yia na dispela long sevenpela mun bihain. Bihainim dispela, i luk olsem i nogat

rot long Palamen i sindaun na lukluk gen long dispela samting.

Bogenvil Trengsisenel Gavman, ligel bodi we i lukautim Bogenvil long dispela taim em taim bilong em bai pinis long Desemba 31 long dispela yia.

Bikos Palamen i no bin pasim Bil, Bogenvil bai kam aninit long nupela Provisnel Gavman rifoms stat long Janueri 1, 1999. Bihainim dispela rifom, Rijinel memba John Momis bai kamap Gavana. Tasol planti pipel long Bogenvil i no laikim provins i kam aninit long nupela rifom.

Ol lida olsem BRA/BIG bikman Joseph Kabui, Primia Gerard Sinato na strongpela kempena long gupela sindaun na bel isi pasin i kamap long Bogenvil Joseph Watawi i egensim tu provins i kam aninit long nupela rifom.

Primia Sinato taim Wantok i toktok long en i tok: "Sanap bilong mipela i klia. Mipela

bai go het wantaim ol wok long painim gupela sindaun na kamapim bel isi pasin.

"BRA/BIG na BTG bai go het na kirapim BRG bihainim Burnham na Lincoln agrimen na Bui Dekleresen, Mista Sinato i tok.

Em bin tok provins i wok long go het long lukim olsem nogat bagarap i kamap long ol wok long painim gupela sindaun.

"Mipela i no inap wet moa tasol go het. I kam inap nau, Palamen, na Oposisen, i wok long pila pilai wantaim ol pipel bilong Bogenvil.

"Bogenvil i egensim nupela Gavman rifom na i no laikim bai BRG i kam aninit long en.

"Mipela i no amamas long ol nesenel palamen memba, moa yet long Oposisen, bilong no givim sapot long Bil we bai kamapim ol senis we i ken stretim rot long BRG long kamap.

"Pasin we rijinel memba bilong mipela John Momis i wokim long i no vot long Bil i

soim olsem em no moa sapotim Bogenvil long kisim moa pawa, "Mista Sinato i tok.

Tasol em i tok dispela i no stapim ol pipel na ol lida bilong Bogenvil.

Tingting bilong ol i strong moa na ol i stap pas wantaim. Na ol bai sanapim BRG.

Ol lida bilong BRA/BIG na BTG i bung nau long Arawa bilong bungim wantaim na strongim ol tingting bilong ol long dispela samting, Primia Sinato i tok.

Bogenvil Afeas opis i bin tokim *Wantok* olsem Palamen i no pasim Bil long kamapim ol konstitusenel senis na dispela i ken min olsem em bai i egensim lo long sanapim BRG.

"Nau i nogat spesel dil long Bogenvil," Mausman long Bogenvil Afeas opis i tok.

Em bin tok Gavman bai traim sampela rot long putim BRG i kam aninit long luk-save bilong lo.

Ol pipel i no amamas long Momis

OL SAMTING long Bogenvil i stap isi tasol ol lida i wok long holim ol miting long bungim ol tingting wantaim long sanapim rikonsiliesen gavman.

Ripot we Wantok i kisim long Bogenvil i tok ol pipel i stap isi na wet long wanem samting ol lida bilong ol bai mekim bihain gavman i no pasim BRG Bil.

"Ol pipel i stap isi na wet wanem samting bai kamap.

"Ol i sanap wantaim tasol yumi no ken kirap nogut long sampela meknais i kamap," wanpela man long Buka i tokim Wantok.

Em i tok samting we ol Palamen memba bilong Bogenvil i wokim long tupela i no soim sapot long Bogenvil Bil i givim baksait long ol pipel bilong ol.

"Rijinel memba John Momis i wokim sempasin long putim Bogenvil aninit long nupela rifom.

Dispela i egensim samting we Gavman

i bin mekim long helpim Bogenvil i kisim "spesel dil".

"Yumi noken save, tasol long save bilong ol yet, ol Oposisen memba na tupela Bogenvil memba, John Momis na Michael Laimo i no vot long sapotim Bil.

"Ol pipel i belhat tru tasol mipela i prea olsem ol lida bai kisim gupela tingting.

Mi bilip olsem i gat rum yet long toktok long stretim dispela samting," em i tok.

Em bin tok olsem wanpela samting em gavman i no bringim gut sevis i go long ol pipel, moa yet long saut bilong bikailan Bogenvil.

Em i tok i luk olsem nau intenesenel helpim grup bilong Australia, AusAID na ol arapela Non Gavman Ogenaisesen grup tasol i wok long karimaut ol wok long Bogenvil.

Narapela pablik sevan long Buka i tokim Wantok olsem asua i stap wantaim Bogenvil Trengsisenel Gavman bikos em

no bin karimaut wok bilong em long putim redi wanpela samting sapos Gavman i no pasim Bil.

Olsem na em i tok Bogenvil i mas luk-save long wanem samting gavman i givim em.

"BTG inap long gat wanpela bodi i sambai redi i stap sapos gavman i no pasim Bil, tasol em no wokim dispela," man ya i tok.

Tasol em i tok teknikal grup bilong BTG i mas wok hat nau long painim sampela rot long mekim BRG i kam aninit long lo na operet.

Em i tok olgeta pipel long Bogenvil i sapotim BRG long kamap.

Em i tok planti pipel long Bogenvil i egensim BRG i kam aninit long nupela gavman rifom sistem. Na ol i les long John Momis i kamap olsem Gavana.

WANTOK

NIUSPEPA BILONG OL PNG STRET

P. O. Box 1982, Boroko
Telepon namba: 325 2500
Feks namba: 325 2579

**PE BILONG WANPELA
YIA 52 NIUSPEPA**

PLES	AIR
Mosbi	K 40.00
Arapela PNG eria	K 75.00
Ostrelia na Nu Silan	K115.00
Esia Pasifik na Japan	K150.00
Amerika na Yurop	K215.00



McKinnon bilip rot i stap yet long kirapim gavman

FOREN Minista bilong Nu Silan Don McKinnon i bilip olsem gavman na ol Bogenvil lida bai painim yet narapela rot long larim wok bilong gupela sindaun i go het long ailan.

Maski em i no amamas long Palamen i no bin pasim Bogenvil Bil, Mista McKinnon i tok dispela i no min olsem olgeta rot i pas, nogat.

Em i askim ol lida long ailan long stap isi na larim Nesenel Gavman i painim narapela rot aninit long Mama Lo bilong kirapim BRG.

"Ol grup husat insait long Lincoln agrimen bai i no amamas long Palamen i no givim sapot long Bogenvil Bil we inap long kamapim ol senis insait long konstitusen bilong sanapim BRG. Tasol mi bilip olsem bai i gat narapela rot long larim ol wok long painim gupela sindaun i go het.

"Disisen i bihainim wok demokresi long kantri. Bikpela samting em ol grup we i stap insait long Lincoln agrimen i mas noken ting olsem dispela bai bagarapim ol wok long painim gupela sindaun.

"Em i taim bilong glasim na skelim gut ol rot we i stap yet. Taim wanpela dua i pas, narapela i op. Dispela em i pasin bilong demokresi. Mi askim ol lida long Bogenvil i stap isi na larim Nesenel Gavman

long painim narapela rot, bihainim lo, long sanapim BRG, "Mista McKinnon i tok.

Em i tok bikpela hatwok i bin kamap long sotpela taim long karimaut ol wok long bringim gupela sindaun long Bogenvil. Tasol long wan wan taim ol kain hevi bai kamap.

Mista McKinnon bai i mekim wanpela wokabaut i go long Bogenvil long Tunde neks wik. As long dispela wokabaut em long soim ol pipel bilong Bogenvil na Nesenel Gavman olsem gavman na kantri bilong em bai go het long helpim Bogenvil wantaim ol wok long painim gupela sindaun. Na tu sapotim PNG Gavman na ol grup taim ol i wok long karimaut ol samting we i stap insait long Lincoln agrimen. Hai Komisina bilong Nu Silan long PNG, Nigel Moore i tok wokabaut bilong Mista McKinnon i kamap long taim bikpela traim i stap wok bilong painim gupela sindaun.

Em i kam wantaim Minista bilong Maori Afeas na Asosiet Minista bilong Edukesen Tau Henare na sampela ol bos bilong ol skul na ol lain i makim ol NGO grup husat i gat lain bilong ol karimaut ol helpim program bilong Nu Silan long Bogenvil.

PNG Red Cross bai go het long helpim ol Aitape pipel wantaim wara na helt projek

WENCESLAUS MAGUN
i raitim


PAPUA Niugini Red Kros Sosaiti wantaim helpim bilong Intanesenel Federesen bilong Red Kros bai go het yet long helpim ol pipel bilong Aitape wantaim wara na helt projek, Seketeri Jenerel bilong PNG Red Kros Sosaiti, Janet Philemon i tok.

Misis Philemon i tok ol wokmanmeri bilong PNG Red Kros Sosaiti bai go het yet long mekim ol wok aninit long program bilong wara na senitesen na komyuniti helt awenes projek long arapela 18 mun. Insait long dispela taim, ol bai glasim tu wanem ol hevi i wok long kamap na painim rot bilong stretim.

Misis Philemon i tok stat long Oktoba bihain long Tsunami i bagarapim Sissano, Warapu, Arop na Malol ples na kilim indai moa long 2000 pipel long Julai 17, PNG Red Kros Sosaiti i go long Aitape na karim aut rihabilitesen wok insait long ol komyuniti i kisim bagarap.

"Long mun Oktoba mipela i bin painim aut wanem kain ol gutpela kaikai ol pipel bilong ol ples i kisim bagarap i laikim. Na mipela i painim rot bilong helpim ol long i gat inap na gutpela kaikai bilong kaikai," Misis Philemon i tok.

Em i tok, tim bilong Red Kros long Aitape i painim aut olsem tude, ol pipel i gat inap kaikai bilong gaden long kaikai. Sampela i laikim ol tuls bilong wokim gaden o



• Seketeri Jenerel bilong PNG Red Kros Sosaiti, Janet Philemon i kisim sampela sel bilong haus, bisket katen, ol sawol na ol arapela tuls bilong wokim gaden i go long Aitape. Ripota Wenceslaus Magun i bungim em long Boram ples balus long Wewak na tupela i go wantaim long Aitape long Julai 21.

paitim saksak. Tasol planti i gat inap kaikai bilong kaikai. Planti i gat ol nupela gaden na planti i wok long kisim kaikai long ol olupela gaden. PNG Red Kros i bin givim aut ol tuls bilong wokim gaden na paitim saksak bihain long namba wan wok painim aut bilong ol.

"Mipela bai mekim wankain wok painim aut long dispela hevi bihain long Gavman i stapim saplai bilong kaikai na painim aut wanem kain rot ol pipel i gat bilong painim kaikai bilong lukautim ol yet," Misis Philemon i tok.

Em i tok tu olsem PNG Red Kros bai saplaim ol tuls

bilong wokim ol kanu na ol pis lain na ol samting we ol pipel bilong Aitape yet i bin askim long ol.

Em i tok ol Aitape pipel i laikim ol dispela samting bai ol yet i ken mekim ol pis net na pis lain bilong painim pis taim Gavman i tokaut olsem ol i ken go painim pis long Sissano lagun o biksolwara.

PNG Red Kros bai go het long saplaim ol nupela sel bilong haus long ol lain i lusim ol kea senta na i go wokim ol wan wan famili haus. Tasol Misis Philemon i tok dispela i no min olsem ol bai givim ol dispela sel bilong

haus long olgeta pipel bilong Aitape.

Em i tok ol bai givim aut tu ol taunam we ol i tritim pinis. Long ol lain i nogat taunam we ol i tritim pinis ol bai kisim ol dispela taunam na tritim na bihain givim i go bek long ol pipel.

Misis Philemon i tok tu olsem PNG Red Kros bai salim sampela saveman bilong skulim ol pipel long we bilong yusim ol VHF radio bikos nau yet planti lain i no save gut long yusim ol dispela radio. Em i bilip sapos ol pipel i save gut long yusim dispela ol VHF radio ol inap salim toksave i go long

Aitape Daiosis o long Gavman na kisim ol imejensi sevis.

Aninit long program bilong helpim ol meri, PNG Red Kros na Aitape Daiosis i ranim ol wan na hap de kos long Pes Vokesenel Skul bilong helpim ol mama long we bilong kukim ol kainkain gutpela kaikai, na kisim skul bilong samap na we bilong stretim ol masin bilong samap. Ol i gat taim tu bilong harim wari bilong ol mama na traim helpim ol mama long kamapim gutpela sindaun. Dispela wok bai stap long dispela mun bikos long skul holide tasol Misis Philemon i tok ol bai go het long ranim gen dispela kos long mun Februari, 1999.

PNG Red Kros i salim pinis wanpela savemeri, Konio Nori bilong helpim ol lain lek na han i bruk, i go long helpim ol lain bilong Kalan Disabel Sevis senta long Aitape.

Misis Philemon i tok dispela meri i mekim wok long Kalan Sevis insait long tri wik. Em i go raun tu long ol Kea Senta na glasim ol lain i kisim dispela sevis na i go na ol nupela ples bilong ol, na skulim ol famili bilong ol dispela lain long lukautim gut ol dispela memba bilong famili i nogat gutpela lek o han. Misis Philemon i tok tu olsem Misis Nori i salim tu sampela bilong ol dispela lain i go bek long Raihu Haus Sik bilong kisim moa helpim. I luk olsem Mis Nori bai go bek long Aitape long mun Januari na skruim wok em i mekim pinis.

Japan givim
K133,600
long Vanimo
Jenerel haus
sik

MADELEINE
AREK i raitim

GAVMAN bilong Japan i givim K133,600 long Vanimo Jenerel haus sik las wik, bilong helpim long kamapim gut ol sevis bilong haus sik. Ol bai yusim dispela mani long baim 100 bet na matres bilong slip wantaim ol rel bilong bet na ol pos bilong hangamapim wara bek o IV pos.

Siv Eksekutiv Opisa bilong Vanimo Jenerel haus sik Mark Mauludu, husat i bin makim ol pipel bilong Sandaun long sainim kontrak long Mosbi wantaim Japanis Ambaseda Yasuhide Hayashi i tok, ol bai yusim dispela mani long stretim ol sevis na ol arapela samting bilong haus sik we i bagarap olgeta.

Mista Mauludu i makim maus bilong ol pipel bilong Sandaun na i tok amamas tru long Japan long luksave long dispela bikpela hevi ol i gat. Em i tok tu olsem, long taim haus sik i bin kamap long 1950 i kam inap nau, dispela helpim bilong Gavman bilong Japan, em i pes helpim ol i kisim long narapela kantri

Mista Mauludu i tok taim Tsunami i bin bungim ol long Julai 17, ol i bin painim bikpela taim tru na ol sikmanmeri na pikinini husat i nidim dokta long katim han o lek bilong ol, ol i salim ol i go long Boram Jenerel haus sik long Wewak. Em i tok wantaim dispela helpim bilong Japan ol bai redi gut long bungim ol kain bikpela birua long bihain taim.

Dispela mani Japan i givim long Vanimo haus sik i bringim mani Gavman bilong Japan i yusim long helpim ol wan wan komyuniti aninit long gren asistens bilong ol grasrut projek insait long Papua Niugini i go antap long K6 milien.

Wewak papagraun redi long kotim Gavman

FELIX RAMRAM i raitim

LIDA bilong Kusiksava klen long ples Saure, Wewak, Is Sepik provins i no amamas long Is Sepik Provinsel Gavman i isi tumas long stretim ol pepa wok bilong baim graun ol i kolim Yawasuro.

Papagraun Ignas Kubai husat i stap long Vanimo i tok em i redi long kisim kot eksen long husat ol atoriti i go pas

long arapela 9-pela klen husat i papa bilong graun ol i kolim Yawasuro.

Mista Kubai i givim pinis olgeta pepa wok i go long projek menesa bilong Wewak Stom Wara projek, Benjamin Warakai long Februari 23, 1998 wantaim ol arapela kopi i go long Dipatmen bilong Is Sepik.

I kam inap tude, Mista Kubai i no kisim wanpela bekim bilong dispela samting.

"Gavman i bin yusim ol trik tok na kisim dispela graun long mi wantaim ol lain bilong mi long 1960. Gavman i yusim graun long planim ol gaden kaikai long salim.

Bihain gavman i yusim dispela olsem eskus bilong stilim nating graun bilong mipela ol Saure pipel," Mista Kubai i tok.

Em i tok long dispela as, em i askim gavman long baim ol pipel bilong em long K5 milien.

"Mipela i laik putim dispela mani insait long Interes Biering Diposit long benk. Na eitpela klen husat i papa long dispela graun bai inap long serim intres mani bilong dispela K5 milien," Mista Kubai i tok.

Em i go het na i tok tu olsem, ol i wetim yet gavman long baim arapela K900,000 i stap yet long graun ol i kolim Kaindi. Em i tok K100,000 gavman i baim pinis long 1989 na inap nau K900,000 i stap yet.

WANTED: "THE TIKTOK GANG"

The Taste of Paradise

3 NEW TASTY FLAVOURS ON THE RUN

Icecream

Lollypop

Bubblegum

REWARD: "GREAT TASTING BISCUIT"

Ol lida bilong Banz kisim Karismatik semina

JOSEPH KUPIE i raitim

MOA LONG 300 manmeri i bung long Ambang Katolik aut-stesin klostu long Banz na kisim Karismatik semina. Planti lida bilong komyuniti olsem ol viles kot mejistret, pis na gut oda komiti, yut, meri na arapela manmeri i go bung long kisim semina. Sampela lida na Kristen manmeri bilong ol arapela Sios olsem Nasarin, Luteran, Niu Apostolik, na Evanjelikol Bratahud Sios i bin bung wantaim ol memba bilong Katolik Sios long kisim dispela Karismatik semina.

Tim lida bilong Bilip Intasepsen na Ripentens Paia Tim, Regina Wau i tok dispela em wanpela gutpela mak tru long lukim ol memba bilong

kainkain Sios i bung wantaim, toktok, kisim skul, kaikai na amamas wantaim.

Misis Wau i tok pasin bilong tok resis namel long ol Sios na lida bilong ples i no save karim gutpela kaikai. Em i tok pasin bilong ol Sios na ol lida bilong ples long bungim tingting na save long wok wantaim bai i bringim gutpela kaikai long sait bilong bodi na long sait bilong spirit.

Ol lida bilong lain wan pisin Danga Nongeidam wantaim Senglap Karapka i bin stap birua long bipo yet long tumbuna taim i kam. Tasol long dispela semina ol lida bilong tupela sait i promis na tok ol i saninim agrimen wantaim blut bilong Krai. Ol lida i senisim nem bilong lain wanpisin Danga Nongeidam i go long Danga Karapka.

Distrik Edministreta, Stephen Wi i tok em i laikim ol dispela kain program bilong ol Sios long go het na em i tok em i amamas tru na i givim sapot bilong em long dispela semina.

Wanpela mausman bilong Kampani, NAMASU Banz Ltd, i tok ol i amamas long dispela semina na i givim sampela kaikai olsem donesen i go insait long dispela Karismatik semina.

Planti manmeri nating i bin bung wantaim ol dispela lida na skul i bin ron inap foapela de olgeta. Bihain long dispela Karismatik semina ol lain i bung wantaim long wanpela bikpela mumu. Planti aiwara i bin kapsait long taim bilong tok gutbai taim ol i go bek long ples na haus bilong ol wanwan.

Baitabag Luteran wokmeri kisim skul bilong go mekim wok

PAULUS TALI i raitim

LUTERAN Dinek pain kodineta, Hilda Naus i tokim 13-pela greduet bilong Baitabag Luteran Wokmeri skul long Madang long yusim save ol i kisim insait long tupela yia trening bilong ol na mekim wok.

Em i mekim dispela skul tok insait long namba 32 greduesen seremoni bilong Baitabag Luteran Wokmeri Skul. Mis Naus i askim ol dispela meri long go na mekim wok God yet i makim ol bilong mekim. Em i tok amamas tu long ol foapela tisa long hatwok ol i save mekim long tism ol meri.

Olpela het tisa bilong dispela wokmeri skul, Singnop Kabi i askim ol greduet sumatin meri long go na autim wok gutnius long ol haiden olsem Moses i kisim ol Israel Misis Kabi i tokim ol dispela skul meri long lukim ol yet olsem ol save meri na God i stap wantaim ol na maski long ting olsem ol i meri nating.

Bod Siaman bilong Baitabag Luteran Wokmeri skul, Pasto Leleb Nini i go pas long dispela lituji na i givim setifiket i go long ol meri i pinisim stadi bilong ol. Samting olsem 250 pipel olgeta i bin kamap long lukim dispela greduesen seremoni.

Rev Kidu tok ol yut mas gat spiritsuel ekksesais long kirapim bel na spirit

GLENDAY RAY i raitim

OL YUT I MAS gat moa spiritsuel ekksesais na ol kainkain ektiviti we inap kirapim bel na spirit bilong ol long lusim ol pasin nogut na bihainim Jisas Krai. Olpela Modereta bilong Yunaited Sios, Edea Kidu i tokim 18-pela seket bilong Is Papua Menlen Rijen, husat i bin

bung long yut rali long Fraide Novemba 27, long Kalo ples. Ol seket i nogat representativ insait long dispela rali em: Suau, Fifebe na Dorobisoro.

Reveren Kidu i mekim dispela toktok aninit long het tok, "Wok bung wantaim."

Em i tok, ol Sios lida i mas putim moa taim long ol yut felosip. Na dispela bai helpim ol yut na komyuniti long daunim hevi bilong lo na oda.

Aninit long het tok bilon rijen, "Long mi na haus bilong mi, mi bai wok long Lord", em i tokim ol yut long larim paia bilong Holi Spirit i lait insait long wan wan bilong ol, taim ol i go bek long wan wan famili bilong ol.

Reveren Kidu i askim ol yut long autim tok bilong Jisas Krai insait long wan wan famili bilong ol, olsem bai ol wantaim ol memba bilong famili bilong ol, i ken mekim wok bilong God.

Goroka Luteran Sios i mekim lotu wantaim stail



• Ol kongrigesen i singim song long tenksgiving seremoni.

OL KRISTEN manmeri bilong Luteran Sios long Goroka i bin mekim gutpela singsing Lotu wantaim kainkain gutpela stail long las mun insait long wanpela tenksgiving seremoni.

Long dispela poto yumi ken lukim ol perisina bilong St John's Luteran Sios long Goroka i bin givim tenksgiving ofa bilong ol wantaim kainkain pasin hamamas.

Ol poto: Sape Metta




• Ol Sande skul grup tu i kamap long givim ofa.

TU MINIT TINGTING

YU NO INAP KAIKAI MANI

LONG dispela taim bilong Krismas yumi inap lukim olsem wanem na planti pipel i save tingting long mani na ol planti presen ol i laik baim. Tasol ol i no save tingting long Jisas. Olsem wanem na yumi save wari long givim presen long ol manmeri nabaut, tasol yumi no save givim presen long Jisas? Em i longlong. Krismas em i betde bilong em yet, olsem na yumi mas amamasim em pastaim.



FRANK MIHALIC i raitim

"King, mi na meri bilong mi, mitupela i laik bai yu givim wanpela spesel pawa long mi. Sapos mi holim wanpela samting long han, dispela samting i mas tanim i kamap golmani wantu tasol."

King i harim dispela na em i tok, "Mi inap givim dispela pawa long yu. Tasol nogut pawa ya i bagarapim yu. Mobeta yu tingting gut pastaim."

Tasol nogat. Tom i strong long kisim dispela pawa. Orait, nau king i givim long em. Na

wantu em i go traim. Em i holim hat bilong em, na wantu em i tanim i kamap golmani. Em i holim basket, na em tu i kamap golmani. Nau Tom i hepi tru na i resis i go bek long haus na i tok save long meri bilong em.

Orait, nau Tom i mekim sampela mani i kamap. Meri i kisim na i go long supamaketa na i pulapim tupela bilum long olkain gutpela kaikai na dring. Tupela i laik wokim wanpela bikpela pati tru.

Bihain meri i redim olgeta kaikai pinis, nau tupela i sindaun na i laik kaikai. Tom i taitim han i laik holim wanpela draipela hap mit bilong pik. Tasol sori, mit ya i tanim long golmani. Olgeta kaikai em i holim - i kamap golmani...

Sori, tarangu risman Tom i pulap long mani, tasol em i dai long hangre.

Nogut yu tu skrap long mani tasol.....

Wanem samting i bosim bel bilong yu long Krismas, mani o God?

Orait, Tom i go bek long haus na i toktok wantaim meri bilong em. Long tumora em i kam bek long king na i tok,

Ol liklik nius bilong Hailens rijon wantaim PETER MAIME...

Ol Bui lebi kalabus man i ron lus yet

PLIS long Sauten Hailans i no painim dispela 30 man husat i bin brukim banis bilong Bui lebi haus kalabus long Tunde las wik na ronowe.

Provinsel Plis Komanda, Suprintenden Simon Kauba i tok asua i stap long ol woda husat i wok duti long dispela taim. Em i tok, ol dispela opisa ol i no bin stap long wok ples olsem na ol kalabus man i ronowe. Mista Kabua i tok, dispela i soim olsem menesmen bilong Bui lebi haus kalabus i slek. Mista Kauba i tok, ol kalabus man i mas yusim wanpela akis so long katim ain ba na ronowe. Dispela samting i bin kamap long nait. Planti bilong ol dispela ol kalabus man i bin kisim mekim save bilong lo long ol sas olsem kilim man i dai, bagarapim ol meri na long ol stil pasin. Ol plis na woda i wok yet long painim ol dispela kalabus lain.

Sopas haus sik kisim gen ol sik manmeri

SOPAS jenerel haus sik long Enga provins i kisim gen ol sik manmeri.

Haus sik i bin wari long planti ol sik lain i no bin kam long kisim marasin bikos long wanpela trabel pait namel long tupela haus lain. Dispela pait i bin kamap klostu tasol long ples haus sik i stap long en. Nau dispela pait i go isi na Ekting Medikol Suprintenden bilong Sopas haus sik Dokta Harold, i tokim *Wantok* wantaim amamas olsem planti ol sik lain i kam bek gen.

Dokta Harold i bilip olsem haus sik bai pulap bihain long wanpela wik. Nau yet i gat 30 sik manmeri i slip long haus sik i stap na kisim marasin. Em tu i tok sampela mama i kisim ol pikinini pinis na i stap long haus karim. Dokta Harold i tok, laip bilong ol pipel i bikpela samting na ol birua pasin i no ken pasim ol manmeri na pikinini long kam na kisim ol medikol sevis bilong haus sik. Sopas em i wanpela bikpela haus sik long provins we i save kisim ol sik lain long olgeta hap long Enga provins. Haus sik i stap klostu long Wabag taun.

Tripela redio stesin long hailans i pas

TRIPLETA Nesanel Broadcasting Kopresen redio stesin long hailans i pas pinis. Ol dispela redio stesin em Krai bilong Kumul-Redio Isten Hailans, Nek bilong Tarangau-Redio Westen Hailans na Nek bilong Muruk long Redio Sauten Hailans.

Redio Isten Hailans i gat bagarap long masin bilong studio. Dispela i mekim na Krai bilong Kumul i no bin mekim wok broadkas inap long 6-pela mun olgeta. Redio Westen Hailans i gat hevi wantaim ol papa graun we redio trensmita i stap. Nek bilong Tarangau i bin pas klostu tupela yia nau. Redio Sauten Hailans i gat hevi long Telikom lain long studio i go long trensmita. Em i bin pas klostu long 6-pela mun.

Menesing Dairekta bilong NBC, Tony Boski i tok redio em i wanpela bikpela samting long laip bilong ol pipel long ples tasol gavman i no save lukluk long ol hevi bilong en.

Em i tok, taim bris i bagarap, rot i bruk na ples balus i pas na ol wok manmeri bilong gavman i no inap go long ol ples ol i laik go long en, redio i save karim toksave i go long ol dispela ples.

Mista Boski i tok redio i save sanap sambai na helpim gavman long ol bikpela hevi kantri i save bungim olsem pairap bilong Rabaul Volkeno, bruk bilong Aitape solwara na long taim bilong ol nesanel ileksen tasol gavman i save pasim yau long harim hevi bilong ol.

Long nupela rifom bilong Provinsel na Lokel Levul Gavman, ol redio stesin insait long ol provins i nau kam aninit long lukaut bilong ol provinsel gavman long sait bilong mani.

Nesanel Broadcasting Kopresen hevi opis long Mosbi bai lukautim tasol pe bilong ol wokmanmeri na ol wok edministresen bilong ol redio stesin.

Nesanel Broadcasting Kopresen i gat tripela han bilong en, em i gat Kundu Sevis, Karai Sevis na Kalang FM redio. Ol provinsel redio stesin i kam aninit long Kundu Sevis.

Ol narapela redio stesin long kantri tu i pas, em Redio Galf, Redio Sentrel na Redio Westen. Bungim wantaim em, 6-pela redio stesin olgeta long kantri i pas pinis.

Simbu bai wetim yet bai-ileksen

BAI-ileksen bilong Simbu rijinol sia bai ino inap kamap hariap. Ilektorel Komisnin husat i save go pas long ronim ol ileksen long kantri i no save tu wanem taim stret dispela bai-ileksen bai i kamap.

Sia bilong Simbu Provinsel Gavana i stap nating taim Suprim Kot i rausim olpela memba Pater Louis Ambane na odarim bai-ileksen.

Kot i bin panimaut olsem Ilektorel Komisnin i no mekim gut wok bilong em long putimaut inap balot bokis, dispela i mekim na planti manmeri i no vot gut long makim husat tru bai kamap memba bilong ol.

Opis bilong Ilektorel Komisnin i tok, ol i wetim tokorait i kam long ol loya bilong ol. Ilektorel Komisnin i tok, em i no laik go het na ronim ileksen na bihain painim aut olsem toktok i go gen long kot.

Em i tok dispela i ken bagarapim ron bilong ileksen. *Wantok* i bin askim sapos hevi i stap long sait bilong mani long ronim ilek-

sen tasol Ilektorel Komisnin i bekim, em i no inap long mekim sampela toktok long dispela askim.

Taim *Wantok* i toktok wantaim loya bilong Pater Ambane, Greg Sheppard bilong Maladina Loyas, em i tok em i no bin kisim wanpela toksave long Pater Ambane long askim Suprim Kot long lukluk long disisen bilong em gen.

Mista Sheppard i tok kot i odarim bai-ileksen pinis na i nogat "hop" long kisim dispela toktok gen i go long kot.

Dokta John Nonggorr bilong Nonggorr Lo Kampani husat i makim Ilektorel Komisnin i tok, ol i no laik hariapim Komisnin long go het na ronim bai-ileksen inap ol i save gut olsem Pater Ambane bai i no inap askim rivi long disisen bilong Suprim kot.

Em i tok, long dispela kain kot bilong ileksen, lo i no givim taim long bungim rivi aplikesen na wanem taim, taim bilong aplikesen bai pas.

Dokta Nonggorr i tok samting i op tasol i stap na dispela i mekim hat liklik long mekim sampela samting.



Taim bilong givim ofa

YUNAITET sios bilong Papua Niugini i gat kainkain stall bilong wokim tenks givim ofa (boubou). Ol grup bilong wanwan provins i save kamap wantaim amamas pasin long givim long boubou long olgeta yia. Long poto em ol Sentrel na Galp grup bilong Goroka Yunaitet sios i bilas tumbuna na singsing i givim ofa bilong ol sios lida.

Poto na stori: Sape Metta

Castan Maibawa i joinim gavman bilong Bill Skate

YAKAM KELO i raitim

MEMBA bilong Okapa Castan Maibawa i lusim Oposisen na kalap i go joinim Gavman bilong Bill Skate long dispela wik.


Mista Maibawa husat em wanpela sinia memba bilong Pipels Progres Pati (PPP) i tok em i joinim Gavman bikos ol pipel bilong em long Okapa i sot long helpim na sevis.

Olsem na long dispela as, em i go joinim Gavman bilong Bill Skate long traim helpim ol pipel bilong em long ilektoret.

Em i tok em i no laik pilai politiks moa na lukluk long ol pipel bilong em i kisim hevi na i stap.

Olsem na em i mekim dispela muv long kamapim samting long ol pipel bilong em.

Mista Maibawa i bin holim planti bikpela wok Minista long bipo olsem Minista bilong Provinsel Afeas na Leba na Emploimen, Petroleum na Eneji na Plis Minista. Mista Maibawa i bin stap long palamen olsem namba tri taim bilong em



• Memba bilong Okapa, Castan Maibawa.

long winim ileksen na kam bek long palamen. Gavman i bin rausim pati bilong PPP we Mista Maibawa, memba bilong Makarh Andrew Baing na Gavana bilong

Nu Ailan Paul Tohian i lusim Gavman na i go sindaun long Oposisen. Tasol olgeta PPP memba bilong ol i no bihainim ol tripela.

Ol i stap bek wantaim Skate Gavman na makim memba bilong Mendi Michael Nali olsem lida bilong pati.

Tasol long mun Oktoba, Skate Gavman i rausim PPP na olgeta PPP i bung long Oposisen tasol sampela PPP i stap bek gen long Gavman na PPP i bruk olgeta i go liklik liklik.

Memba bilong Okapa Castan Maibawa i tok PPP em i wanpela strongpela pati long bipo aninit long lidasip bilong olpela Prait Minista Sir Julius Chan. Tasol nau aninit long Michael Nali, PPP i bruk i go daun liklik olgeta.

Save na eksperiens bilong Mista Maibawa bai helpim Gavman bilong Bill Skate long ronim dispela kantri.

Mista Maibawa i tok em i joinim Gavman bilong Bill Skate na em bai i stap insait long politikel pati bilong Bill Skate ol i kolim PNG Fes Pati.



Madang News

Kot laikim Kas mas stap yet long Beon

PETER MAIME i raitim

JAS MAURICE Sheehan bilong Waigani Suprim Kot i bin rausim beil aplikesen bilong Gavana bilong Madang. Jim Kas long las wik Fraide, bikos em i bilip ol poin i stap long beil aplikesen bilong Mista Kas na ol tripela plisman i no strong tumas.

Gavana Kas i bin aplai long kamaut long Beon haus kalabus na wetim apil bilong em i go long Suprim Kot. Tasol Jas Sheehan i glasim aplikesen ya na i tok olsem i nogat ol strongpela poin long rausim Mista Kas, na ol arapela


tripela plisman long Beon haus kalabus. Nesenel Kot long Madang i bin kalabusim Mista Kas wantaim Frank Faibison, Michael Jim na Rodney Tongau long foapela yia olgeta wantaim strongpela mekim save, bihain long kot i painim aut olsem ol i bin draiv i go long Madang ples balus na mekim pasin birua long ron bilong wanpela balus.

Loya bilong Kas, Greg Sheppard bilong Maladinas Lo kampani i tokim kot olsem, ol kastoma bilong em i gat gutpela sans bilong winim apil long Suprim Kot na em i laikim bai ol i kam aut na wetim disisen bilong Kot.

Tasol Pablik Prosekyuta, Panuel Mogish i bin toktok strong long kot olsem i nogat wanpela gutpela as bilong Mista Kas na ol tripela plisman i kam aut long haus kalabus.

Mista Mogish i tok, long tok olsem: Mista Kas em memba bilong palamen na putim em long kalabus i stapim em long mekim wok bilong em olsem lida bilong provins, em i no wanpela gutpela as.

Em i tok tu olsem, ol edvais bilong ol loya bilong Mista Kas olsem: Mista Kas i gat gutpela sans long win long Suprim Kot, em i tingting bilong loya tasol.



• Jim Kas.

"Long lukim Mista Kas i win olus, em samting bilong Suprim Kot long mekim," Mista Mogish i tok.

Mista Mogish i tok moa olsem, long tok olsem: Sapos Mista Kas i stap kalabus yet bai givim hevi long ol famili, wok bilong ol na ol propeti long Madang na ol narapela hap bilong Papua Niugini, em i no wanpela strongpela poin.

Mista Mogish i tok, kain hevi olsem i save kamap taim ol man i go kalabus.

Madang Distrik Kot i sasim Kepten Fai bilong Taiwan long K18,000

BEN TAUMAI i raitim

MADANG Distrik Kot i sasim Kepten Chen Gou Fai bilong Taiwan long baim K18,000 long painim pis insait long Bogia long las mun. Sapos nogat bai em i go kalabus long sikspera mun.

Kepten Fai i bin ronim pising bot, FV HSIN TSAI FA No.88 bilong Toboi Sip kampani we Henry Chow em menesing dairekta.

Ol wokman bilong Papua Niugini gavman i holim Kepten Fai long mun Oktoba na sasim em long faivpela sas olgeta pastaim tasol bihain ol i rausim tripela na sasim em long tupela tasol. Ol i sasim em long painim pis insait long tri notikel mail long Laing ailan long Hansa Be, insait long Bogia Distrik aninit long seksen 55 (1) (c) bilong Pising Lo bilong 1994. Na long arapela sas em long i no lukautim gut temperesa log buk bilong bot aninit long E (E) bilong Seksen 55 (1) (c) bilong Pising Lo bilong 1994 tu.

Sinia Mejistret, Cosmas Bidar i tok olsem dispela bot i gat nem PNG73 long sait bilong en long wil haus na em wanpela lokol bot we i gat laisens bilong painim pis i go inap long Januari 14, yia 2003.

Kot i harim olsem taim ol gavman opisa i kamap long sip ol i painim olsem dispela bot i painim pis insait long tri mail tambu eria. Kepten Fai i tokim kot olsem em i rong long brukim Lo long painim pis insait long tri mail tambu eria.

Kot i tok Fising Lo i kamap bilong lukautim, developim, na menesim ol pis risos na ol samting bilong solwara bilong ol pikinini long bihain taim. Namba tu em long mekim bai moa PNG pipel i mas kamapim bisnis long developim pis risos na long yusim nesenel piseris long helpim ekonomik, sosel na kamapim gut ol pipel na kamapim moa wok long balensim nesenel developmen plen.

Mejistret Bidar i tok moa olsem, aninit long Mama Lo, Kepten Fai inap baim kot long K500,000 tasol long dispela em bai baim K250,000. Tasol Mejistret Bidar i odaim Kepten Fai long baim namba wan sas bilong em long K10,000 o bai em i kisim foapela mun kalabus wantim bikpela mekim save.

Long Namba tu sas, Mejistret Bidar i odaim Kepten Fai long baim kot long K8,000 o nogat bai em i go kalabus long tupela mun wantaim bikpela mekim save. Em i tokim tu Kepten Fai long baim kot long tupela wik na em i ken kisim bek K2,000 kes beil mani bilong em.

Loya bilong PNG Gavman, Sampson Aquila bilong Solisita Jenerel opis i tokim Wantok ausait long Kot haus olsem, dispela mekim save bai soim piksa long ol arapela pis kampani bilong arapela kantri husat i save brukim lo bilong kam painim pis insait long tri mail eria olsem ol i mas luksave long dispela na bihainim lo.

Madang Gavman i wok yet, namba tu Gavana i tok

MADANG Provinsel Gavman i no amamas long wanem as na Suprim Kot i wok long isi isi tumas long ol kot bilong Madang Gavana Jim Kas bihain long Nesenel Kot i kalabusim em long Novemba 6, 1998.

Deputi Gavana bilong Madang provins, Pengo Nengo i tok ol i no laik kwestenim wok bilong kot tasol ol ino amamas tasol bikos dispela samting i stap longpela taim. Na tu dispela i mekim Madang provins i stap nating na nogat Gavana. Mista Nengo i tok olgeta pepa bilong beil na apil i go pinis long Suprim Kot tasol ol i wok long holim yet na dispela i no gutpela tumas.

Mista Nengo i tok bikos Jim Kas i apil long disisen bilong Nesenel Kot, em i stap yet olsem Gavana bilong Madang provins. Sapos em i kam aut tu aninit long beil, em bai Gavana yet inap apil kot i bilong em i kamap na tokaut long wanem disisen bilong en.

Tasol Suprim Kot long las wik i mekim disisen olsem Jim Kas i no inap kam aut long beil. Em bai i stap long kalabus. Apil pepa bilong Mista Kas i stap yet na Suprim Kot bai lukluk long en bihain.

Deputi Gavana i tok Gavana bilong ol i stap long haus kalabus, tasol Gavman bilong Madang i wok long mekim wok yet bihainim ol wok bilong ronim na lukautim provins na ol pipel bilong en. Long makim ekting Gavana bilong Madang provinsel gavman bai i no yet bikos Jim Kas i bin apil gen long kot bilong em olsem na em i stap Gavana yet inap kot i kamap long skelim disisen bilong Nesenel Kot we i bin kotim na sasim em i go long foapela yia kalabus long las mun.

Jim Kas i bin kisim sas long dring spak na kalap long wanpela ka i go insait long ples balus na i traim long stapim balus we balus i bin ron long en. Tripela plisman husat i bin go wantaim em long ka i kisim wankain sas tu wantaim em long Beon haus kalabus long Madang i stap.

Operesen 'Blu Lait' i stat pinis long Madang

BEN TAUMAI i raitim

OL PLISMANMERI bilong Madang i statim pinis wanpela operesen ol i kolim, "Operesen Blu Lait" insait long provins. As bilong dispela operesen em bilong traim stapim ol trabel manmeri long noken bagarapim o kamapim trabel long Krismas na niu yia.

Provinsel Plis Komanda, Suprintenden Benson Simajon i tokaut long dispela operesen bihain long tupela mun. Em i tok ol i statim pinis dispela operesen long Bogia, Ramu, Raikos na long Madang distrik na bai ol i go insait long ol arapela distrik bipo long Krismas.

Mista Simajon i givim bikpela tok lukaut i go long ol trabel man na meri olsem ol plismanmeri bilong em bai i no inap isi long ol sapos ol i traim long mekim trabel na ronawe i go hait long arapela distrik o taun.

"Mi askim yupela long noken traim bikhet bikos lo bai i no inap isi long yupela. Yupela bai



• Ol memba bilong Malm brades bumbu ben i salim bikpela tok tenkiu i go long Gavana bilong Nesenel Kapitel Distrik, Philip Taku na ol pipel bilong Vabukori ples long lukautim ol gut taim ol i bin go singing na pilai stringben musik insait long Hiri Moale festival. Wenceslaus Magun i kisim poto bilong ol taim ol i go malolo long Vabukori ples bihain ol raun bilong ol long Mosbi.

pilim strong bilong lo sapos yupela i laik soim strong bilong yupela," em i tok.

Mista Simajon i laik lukim olgeta pipel insait long Madang i mas amamas long dispela Krismas na niu yia bikos dispela kain amamas i save kamap wanpela

taim tasol long wan wan yia.

"Em spesel taim bilong yumi olgeta olsem na plis mi askim na begim yupela olgeta long woklong wantaim ol komyuniti lida bilong yumi na wantaim plis fos long mekim dispela Krismas na niu yia i gutpela long

yumi olgeta i ken amamas wantaim," Mista Simajon i tok.

Mista Simajon i statim dispela operesen kwik bikos long namba bilong ol trabel olsem stilim ka, stil, brukim ol haus na go insait, pait, stil wantaim gan, eksiden na sampela moa i wok long go antap.

119 sumatin long Madang Tisa Koles greduet wantaim diploma

MARGARET MUNJIM i raitim

SAMTING olsem 119 sumatin bilong Madang Tisa Koles i greduet long Desemba 6 wantaim Diploma bilong Tis long Papua Niugini. Madang Tisa Koles i bin holim pinis 33 greduesen bilong ol tisa long dispela koles tasol dispela em i namba siks diploma greduesen. Seketeri bilong Nesenel Dipatmen bilong Edukesen, Peter


Baki i tokim ol tisa i greduet long skulim ol yangpela pikinini bilong PNG long kamap ol gutpela pipel.

Moa yet, em i amamas long lukim planti ol yangpela man na meri bilong PNG i joinim ol lain tisa na em i askim ol long karim aut wok ol i kisim skul bilong mekim.

Mista Baki i tenkim tu ol tisa long givim gutpela skul long ol sumatin tisa na i askim ol long go het na mekim gutpela wok bilong ol. Wanpela sumatin bilong Milne Be,

Tom Veikwai i winim namba wan top prais bilong koles na Sitisensip prais. Spesel prais bilong koles i go long Xavier Kikiluma bilong Not Solomons Provins.

Koles i tingim tu Elsie Robert, wanpela meri sumatin husat i dai long Modilon Jenerel haus sik, bihain long em i bin gat liklik sik long Oktoba 13, 1998. Mis Robert i pinisim olgeta skul wok bilong em tasol i no bin sindaun long las tes na tu i no stap long kisim Diploma bilong em long tis.



Kabwum pipel tok sori long Saonu

Nadzab ples balus kisim K800,000

OL pipel bilong Nokopo ples insait long Kabwum distrik i wanbel wantaim memba bilong Kabwum Ginson Saonu long Novemba 14, 1998 bihain long ol i no bin votim em long 1997 nesanel ileksen long las yia.

Mausman i go pas long ol pipel bilong Nokopo ples Mista Sanangke i bungim ol pipel bilong em na ol i sikan na wanbel wantaim memba long las mun.

Mista Sanangke i tok ol pipel bilong em long Yopno eria tasol i bin bruk long ol kain kain tok gris na giaman pasin bilong arapela man long taim bilong bikpela ileksen kempen long 1997. Dispela i mekim

na ol i bruk lusim pikinini, brata na wanblut bilong ol yet.

Em i tok taim bilong ileksen i pinis, ol dispela kendidet wantaim tok gris na giaman pasin bilong ol narapela ples i no stap na mipela lukim ol. Ol i lukim tasol memba Ginson Saonu olsem brata, pikinini, mausman na lida bilong ol nau.

Mista Sanangke i tok olsem ol i sem, sori na laik wanbel wantaim memba bilong ol na ol i ken wok bung wantaim long kirapim eria na distrik bilong ol na surukim dispela wok bung wantaim i go long yia 2002 nesanel ileksen.

Em i tok bai ol i noken mekim dispela asua gen long bagarapim vot

bilong Mista Saonu long bihain taim. Ol i sikan wantaim Mista Saonu wantaim wanpela pik na ol kaikai bilong ples bihainim wanbel na pasin kastom bilong ples.

Tasol memba bilong Kabwum Ginson Saonu i tok dispela bruk i kamap em i no asua bilong em q bilong ol lain i votim em. Rot bilong ileksen em bihainim laik bilong wanwan manmeri. Wanpela man o meri i no inap pusim narapela manmeri long bihainim laik bilong em long vot. Sapos olsem i kamap em i krangki pasin olgeta, Mista Saonu i tokim ol pipel bilong Nokopo ples.

Em i tok tu olsem nau yumi luk-save long ol dispela ron na asua na

tokaut we i gutpela pasin long mekim. Mista Saonu husat tu em Vais Minista bilong Turism, Komes na Industri i tok moa olsem wok bilong kisim lidasip posisen em i no bilong wanwan manmeri, nogat. Em i bilong olgeta pipel. Na yu pipel yet bruk long dispela lidasip posisen bilong yu yet orait yu yet i ken wanbel na sikan gen we i gutpela pasin bilong bihainim. Long dispela wanbel pasin, lidasip bilong yu yet i ken sevim yu, memba i tok.

Planti manmeri, gavman na sios lida bilong Yus Lokol Gavman Kaunsel eria i bin kam bung long witnesim dispela wanbel seremoni i kamap.

GAVMAN bilong Australia i givim pinis K800,000 i go long Morobe Provinsel Gavman long stretim gen Nadzab ples balus na kamapim long mak bilong kisim ol ovasis balus i kam pundaun long en.

Aninit long aid program bilong AusAID, disela mani em long stretim ol toilet, hau skaikai, ples bilong putim ka, pasindia teminol, opis bilong Kastoms, VIP rum, plis na ol arapela opis oslem bilong ka rent.

Disela i min olsem ol narapela blus grup olsem Flight West, North Coast Aviation, MBA na Island Aviation bai igat ol opis bilong ol yet.

Gavana bilong Morobe Luther Wenge i tok olsem em bai wokim dispela ples i go long mak bilong ovasis o intanesenel level we Nadzab ples balus i ken kisim ol ovasis balus i kam pundaun long en.

Dispela tu i mak we ol i bin kamapim toktok long balus bai ron namel long Lae na Kens Australia.

Em i tok planti ol lain i laik bai ol i mas stretim hariap ples balus na ol i laik ron hariap tasol em i tok ol i mas stretim olgeta samting pastaim bihain long ol i ronim balus i go long ovasis.

Em i tok tu olsem em i putim aut tenda i go pinis na i ulk olsem long stat bilong neks yia, ol husat i winim tenda bai stat long mekim wok bilong stretim Nadzab ples balus.

Mista Wenge i tok Nesanel Gavman i mas givim dispela Nadzab ples balus long ol Provinsel Gavman na ol i ken wokim baset bilong ol long olgeta yia. Nau yet em i stap long han bilong Nesanel Gavman.

Morobe Gavman givim K30,000 projek

BUSTIN ANZU i raitim

MOROBÉ Provinsol Gavman i givim pinis mani i go long wanpela Seveiyó Grup long mekim wok painim long rot bilong wokim rot long Nomaneneng Indagen insait long Kabwum distrik.

Gavana Luther Wenge i bin givim K30,000 sek mani i go long bosman bilong nambawan Seveiyó Terence Kuniaka long Mande na tok dispela mani em bilong mekim wok painimaut olsem wanem rot bai go long dispela tupela hap ples.

Long taim bilong givim dispela mani Gavana i tok Morobe provins em i no gutpela ples tasol yumi yet mas mekim gut.

"Morobe em pulap long planti rif, maunten, bus. Tasol ol pipel i no wari long wanem hap ol i stap. Ol i gat planti kaikai na abus bilong salim tasol i nogat rot. Olsem na gavman bilong mi mas tingting long wokim rot. Em bikpela samting," Gavana i tok.

Em i tok tu olsem Kabwum em wanpela gutpela hap ples bilong kamapim kopi tasol rot bilong salim kopi tasol i hatwok.

"Karim kopi i go daun long Wasu na kisim sip i hatwok. Olsem na rot bai hariap long karim kopi i kam long Lae na salim," em i tok.

Morobe Gavman i putim plen long 1999 baset olsem bai ol i putim K100,000 - bilong dispela rot. Olsem na dispela mani nau em bilong mekim wok painimaut tasol.



• Mista Sananke wantaim Mista Saonu i sikan long soim pasin bilong wanbel namel long ol pipel bilong Nokopo na memba long sanap wantaim na wok bung i go inap long yia 2002.

DCA oraitim Malahang ples balus

BUSTIN ANZU i raitim

PLANTI manmeri insait long Lae siti na ol bus ples bilong Morobe provins i save painim hat long go long ples o kam long Lae siti long balus.

Dispela wari bilong ol bai i no moa bikpela bikos Morobe Provinsel Gavman i kisim tok orait bilong Dipatmen bilong Sivel Eviesen (DCA) long wokim wanpela liklik ples balus long Malahang, ausait tasol long Lae

siti. DCA i givim tok orait pinis long Gavana Luther Wenge na Gavman bilong em long Tutumang long go pas na wokim dispela ples balus. Tasol ol i mas painim narapela hap bilong tromoi pipia long en bikos ples pipia i stap klostu long dispela hap.

Gavana Wenge i bin tokim ol niusman long Mande olsem em i putim pinis K400,000 long baset bilong ol long kamapim dispela ples balus.

Dispela mani em bilong mekim wok painimaut na tu stretim ol

graun na putim banis raunim dispela hap we ples balus bai sanap long en, em i tok.

Sapos dispela ples balus i kamap em bai mekim isi long ol lain insait long ol distrik olsem Finsafen, Kabwum, Teptep, Pindiu, Wain na ol arapela ples balus i save go pundaun long ol. Ol i no inap ron i go kam long Nadzab na sampela taim i save kamap leit na slip ausait long Nadzab ples balus.

Em i tok DCA i bin tokim ol long painim narapela hap long sanapim dispela rabis ples we ol lain long

Lae siti i save go na rausim ol pipia we ol i kukim i ken bagarapim ron bilong ol liklik balus.

Em i tok tu olsem ol narapela liklik balus kampani i ken opim balus na ronim long hap tu taim dispela ples balus i op.

Nau yet samting i stap long Gavman bilong Wenge na ol papagraun long pasim wanpela toktok long kamapim dispela ples balus.

Dispela liklik ples balus long Malahang i kamap bihainim wanpela tok orait bilong Morobe Provinsel Eksekutiv (PEC) long

dispela yia taim ol i laik opim narapela liklik ples balus long Lae siti long sevisim ol liklik distrik eria bilong provins.

Ol i tok dispela ples balus bai mekim isi long ol arapela wok bilong Gavman, ol skul, haus sik na arapela sevis long ol distrik long kisim ol kago na saplai bilong hariap na bihainim taim.

Dispela toktok i bin kamap nau we DCA i givim tok orait bilong em long Morobe Gavman long go het long kamapim dispela liklik ples balus bilong ol liklik balus.

Plen bilong wokim Nomaneneng Endagen rot

BUSTIN ANZU i raitim

KAUNSEL presiden bilong Seko Lokol Levol Gavman i amamas long Morobe Provinsel Gavman long givim mani bilong mekim wok painaut long rot i go long ples bilong em.

Presiden na Siaman bilong wok, Giukta Nakalip i tok em amamas tru long luksave bilong Morobe Provinsel Gavman long tingim ol lain insait long ol bus ples.

"Mi amamas tru na tok tenkyu tru long Gavana Luther Wenge na gavman bilong em long givim dispela mani long mekim wok painimaut. Mi wantaim ol kaunsela

bilong mi na ol lain pipel bilong Seko Lokol Levol gavman i wet longpela taim inap na nau mipela i redi tasol olsem wanem taim bai dispela rot bai pinis," Mista Nakalip i tok.

Mista Nakalip i mekim dispela toktok bihain long Gavana Wenge na em yet i presenim wanpela K30,000 sek mani i go long nambawan Seveiyo, bosman Terence Kuniaka long Mande long mekim stadi long Nomaneneng Endagen rot.

Em i tokim Tuniaka tu olsem em i bin pasim tok wantaim ol papa na mama graun olsem ol bai sapatim em long mekim wok painimaut long dispela rot i mas i go het yet. Em i tokim em tu olsem

bai i nogat sampela hevi i bungim em namel long taim bilong wok bilong em.


Gavana Wenge i tok olsem olgeta lain insait long dispela hap i mas stap wanbel long dispela rot i mas i go het.

Gavana i tok tu olsem em i hap bilong maunten olsem na em i laik bai ol kain rot olsem i mas kamap long ol bus ples.

Dispela rot em wanpela bilong ol sampela rot projek we bai kamap insait long provins na i stap long ajenda bilong Morobe Provinsel Gavman. Dispela rot bilong Nomaneneng Endagen em 43 kilomita.

Narapela rot we i stap long tingting bilong Morobe Gavman em Finsafen Kabwum rot.

• **Mista Nakalip (lephan) na Mista Wenge (namel) i givim sek mani i go long bos bilong Nambawan Seveiyo Mista Kuniaka.**



Duadua Tieta grup laik sapat

MOROBE Provinsel Gavman long las wik Fraide i amamas long Duadua Tieta grup long winim namba wan prais long olgeta gupela piiai drama bilong ol long Goroka las wik.

Duadua Tieta grup i bin winim namba wan prais long ol gupela ekt na drama pilai em save soim aut long pablik.

Duadua i soim tru nupela stail bilong ol ekt o drama pilai long nupela yia long kam. Long dispela as yumi mas amamas long dispela gupela hatwok ol i bin kamapim, Mista Edof i tok.

Em i tok olsem i mas i gat gupela wok bung wantaim namel long Provinsel Gavman na 30 komyniti tieta grup long Morobe na ken kamapim o holim strong pasin tumbuna na tredisen na kalsa bilong pipel.

Long dispela taim tu, em i tok i gat 122 kalsa grup long Morobe provins na long strongim dispela ol kalsa, yumi mas tanim na sapatim na maketim Duadua Tieta grup na arapela tieta grup we i stap nau long provins.

Mi ting olsem wanem samting Gavman i mas wokim em long givim helpim na i mas givim sapat tu long mani long mekim ol gupela bilong kirapim na promotim ol kalsa na pasin tumbuna bilong provins i kamap, em i tok.

Ol sumatin long bus i laikim ol tisa

BUSTIN ANZU i raitim

GAVANA Luther Wenge i bin mekim wanpela singaut long ol nupela greduet tisa long go insait long ol bus eria insait long kantri we i nogat ol gupela gavman sevis, olsem rot na mekim wok tisa.

Gavana i mekim dispela singaut bihain long 32nd greduesen bilong Balob Tisa Koles we i bin kamap long Sir Ignatius Kilage Stadium long pinis bilong las mun.

Em i tokim ol sumatin ya olsem planti bilong ol manmeri i save stap long ol asples i nogat rot long wanem long maunten, bik bus na dispela tasol i mekim hat long ol. Tasol em i tok i gat ol pikinini insait long ol dispela ples i laik skul.

Mista Wenge i tok planti ol tisa i no save bihainim ol tok promis bilong ol long wanem ol i save amamas long laip bilong taun.

"Dipatmen bilong Edukesen i save painim hat long salim ol tisa long wanem ol i save givim kainkain eskus long stap bek. Dispela kain tisa em ol i no laikim," em i tok.

"Gavman i kisim taim pinis long hevi bilong mani nau na yumi mas putim kantri na pipel namba wan na ol famili na laip bilong yumi namba tu," Gavana i tok.

Em i tokim ol greduet tisa long lainim ol sumatin long skul long wanem samting ol i lainim long 3-pela yia i go pinis long skul, we ol bai kisim save long lukautim kantri bilong mipela.

"Lainim gut ol pikinini long kamapim gupela sitisen na i no long bikhet nambaut we bai kamapim planti long ol lo na oda hevi insait long provins."

94 ol greduet tisa i pinisim 3-pela yia diploma kos. Mista Wenge i tok tu olsem Luteran Sios i mas putim digri kos bilong ol sumatin mas lainima long Balob Tisa Koles.

Wau kaunsel amamasim tupela wokmanmeri

ARI GUH DANDEE i raitim

WAU Lokol Gavman Kaunsel i bin holim kamap wanpela bung kaikai long las wik Fraide long tok gutbai long wanpela wokmeri, Magaret Pope husat bai i lusim Wau na i go wok long Wes Niu Briten provins.

Misis Pope husat i bin wok wantaim Morobe Dipatmen insait long Wau inap 5-pela krismas olgeta bai i lusim Wau na i go bek long wok olsem wanpela (taipis) long asples bilong em yet. Margaret Pope i bin holim wok olsem KBO wantaim Morobe Dipatmen inap long dispela taim.

Em mas lusim ples nau bikos man bilong em Jack Pope i wanpela plisman na em i mas kisim transfe olsem na Margaret i mas bihainim man bilong em.

Insait long dispela bung kaikai tu, Wau Lokol Gavman Kaunsel tu i bin sindaun wantaim wanpela bosman bilong SRPM Lucas Kudiw husat bai i lusim Wau tu na i go bek na wok long Goroka.

Menesa bilong kaunsel, Francis Lowe na Wod Kaunsel bilong wod 13 Tom Yapi i bin kisim maus bilong Wau Lokol Gavman kaunsel na ol wokmeri long tok tenkyu long stap bilong tupela na wok tupela i bin mekim bilong sevim ol pipel bilong Wau.

Tupela i tok wok Magret na Lucas i bin mekim i helpim tru planti ol pipel bilong Wau long bringim sevis, olsem Magaret em i bin sapatim wok bilong taipim ol pepa we i bin givim bikpela sevis tru long wok bilong sevim Wau kaunsel, ol wokmanmeri na ol pipel tu, na dispela i bin kamap gut tru.

Long Mista Lucas Kindiwa, i no bin i gat wanpela wok o opis bilong SRPM - smol Rural Projek Menesemen insait long Wau tasol, opis bilong SRPM i bin stap aninit long lukaut bilong yu na planti wok bilong ol i bin kamap na pipel bilong Wau i bin luksave long SRPM.

Mipela i sori tru long lusim yutupela tasol yutupela i mas i go bikos pasin i bihainim rot bilong wok tupela kaunsel memba i tok.

Your Overseas Christmas Phone Calls Could Win You K250

ho! ho! ho!
40 phone bill credit prizes to be won

From December 14th to 31st, Business and Residential subscribers making IDD calls to band 1, 2 and 3 countries, could win one of 40 Phone Bill Credit prizes valued from K100 to K250. To be drawn on January 8th, 1999. Winners will be announced in the papers, on 15th January, 1999.

1st 10 Prizes of K250

2nd 10 Prizes of K200

3rd 10 Prizes of K150

4th 10 Prizes of K100

Don't forget to phone your greetings this christmas

TELIKOM PNG
Now we're really talking!

Condition of Entry:

- Make any number of IDD calls to any country.
- Your call duration to be 10 minutes or more.
- Only calls dialled between 14th & 31st December 1998, will be eligible for the draw.

Pick up a copy of IDD Kwik Guide from your Local Telikom Business Office

Watut pipel i no amamas long kompensesen bilong graun

ARI GUH DANDEE i raitim

OL pipel bilong Watut nau i askim strong tru Morobe Provinsel Gavana Luther Wenge na Bulolo memba Samson Napo long holim bek dispela petisen bilong kompensesen ol bagarap bilong ol samting insait ong Wau na Bulolo.

Komyuniti lida bilong Watut, Mista Laimoke Yaling i tok, ol Watut pipel no bin i gat wanpela amamas long ol lain husat i bin kamapim dispela lenona asosiesen bikos ol i no tingim tu ol pipel bilong Kukukuku klen.

Em i go het na tokim Wantok olsem, ol dispela lain husat i kamapim dispela asosiesen na i bin givim petisen long Morobe Gavana Luther Wenge i laik soim biknem bilong ol na stil tasol olsem na ol Watut pipel i askim Gavana long holim pasim dispela pepa inap ol toktok bilong papagraun i go stret na tu ol mas stretim gut ol samting bikos em i bikipela samting moa.

Mista Yaling i gat bikipela amamas olsem, Gavana Luther Wenge i givim sapot bilong em long sapotim petisen tasol, em i tok ol Watut pipel i no amamas bikos, petisen i tokaut tu olsem ol Watut tu i papagraun we i givim bikipela belhevi.

Em askim nau tu dispela Bulolo Pipel Asosiesen long lukluk gut na stretim dispela asosiesen bikos dispela asosiesen i no makim stret ol papagraun bilong Wau, Bulolo, Watut we i wok givim planti hevi tumas na Mista Laimoke Yaling wantaim ol Watut pipel i laikim mas i gat senis.

Graun em i bikipela samting na Gavana olsem Gavana bilong provins tasol, em i no papa graun na maski long mekim ol samting long laik tasol. Yu mas sindaun wantaim ol pipel na painim Watut i no amamas na ol i gat tingting long egensim dispela petisen na ol i singaut nau long Luther Wenge na Bulolo memba Samson Napo long holim pas yet dispela petisen pepa inap ol toktok i stret.

K700 milien petisen i no soim papa tru bilong graun

BUSTIN ANZU i raitim

BEL hevi pepa o petisen bilong Wau pipel i no tok klia tru husat i papa tru bilong graun long Wau taun.

Dispela pepa o petisen i tokaut tasol olsem ol i laikim dispela K700 milien. I gat tupela lain i stap nau long Wau taun, ol papagraun tru tru na ol lain setelas o ol lain husat i bin go tasol na stap long dispela hap.

Tasol Morobe Gavana Luther Wenge i tok dispela i no samting bilong em long skelim.

Dispela petisen i no tokaut tru husat i papa tru bilong dispela Wau taun. Tasol wok bilong mi em long winim dispela kompensesen mani we ol lain bilong mi i bin askim Gavman bilong Australia long stretim, Gavana Wenge i tok. Em i mekim strong-pela tok lukaut tru i go long ol lain bilong dispela hap na ol lain klostu olsem Biangai, Kasini, Watut, Mumeng, Buang, Leklu na Kaiwa long noken mekim sampela tok long dispela yet. Ol i mas wanbel tasol olsem ol i mas winim dispela kompensesen ol i askim long en pastaim.

Pepa ya nau i stap wantaim Praim Minista BillSkate na Praim Minista bai givim i go long Gavman bilong Australia wantaim sapot pepa bilong em.

Nupela haus lotu bilong Nian pipel i op



• Memba bilong Kabwum, Ginson Saonu i sanap wantaim ol sios lida long opim nupela haus lotu long Nian, Kwabwun distrik long Sande Novemba 19, 1998.

OL pipel bilong Nian long Yus Lokol Gavman kaunsel eria insait long Kabwum distrik i bin amamas long opim nupela haus lotu bilong ol we i bin kisim tripela krismas olgeta long wokim.

Ol i bin opim dispela haus lotu long Novemba 14 na 15 Novemba, 1998.

Namel long ol bikman husat i kamap long witnessim dispela open de bilong haus lotu em memba bilong Kabwum na Vais Minista bilong Turism Komes na Industri Ginson Saonu.

Mista Saonu i bin helpim wantaim K5,000 long kamapim dispela haus lotu. Insait long toktok bilong memba Mista Saonu long ol pipel long dispela taim, em i tok Gavman wantaim sios

em God i putim long tupela i mas wok bung wantaim long sevim pipel. Olsem na ol manmeri i mas amamas olsem tupela atoriti i wok bung wantaim.

Ol manmeri husat i kamap long dispela open de bilong haus lotu i kam long ol ples olsem Nankina, Domong na Yopno eria long boda bilong Madang na Morobe provins.

Ol sios lida bilong Nian i tok amamas long memba Mista Saonu long helpim bilong em long mekim kamap dispela haus lotu. Mista Saonu i givim K1,000 i go long ol lida bilong haus lotu long stretim ol arapela liklik wok we i no pinis yet long dispela haus lotu.

Skate kisim petisen bilong Wau pipel, Wenge i tok

BUSTIN ANZU i raitim

PRAIM Minista Bill Skate i kisim pinis bel hevi o petisen pepa bilong ol pipel long Wau we pipel i bin givim i go long han bilong Morobe Gavana Luther Wenge.

Morobe Gavana Luther Wenge i tok em i bin givim pinis dispela petisen pepa i go long Praim Minista taim ol i bin holim kibung long palamen long las mun na nau i stap long han bilong Praim Minista.

Mista Wenge i tok Mista Skate i bin kisim pinis dispela pepa na tok em bai

raitim wanpela pepa long sapotim dispela wari bilong ol pipel bilong Wau na tu em yet bai givim dispela pas i go long Australia Gavman.

Dispela petisen i bin laikim olsem Australia Gavman i mas stretim ol samting em i bin yusim na bagarapim long Wau long taim bilong gol maining long bipo. Ol pipel i askim mak bilong mani olsem K700 milien.

Mista Wenge i tok dispela mani em bilong wokim na putim kolta long ol rot, haus sik, skul, wara saplai, wokim nupela klasrum na tu haus slip bilong ol papa-

graun. Dispela bai karamapim narapela 20 krismas. Na tu sampela mani bai i go long ol papagraun.

Gavana Wenge i tok em i amamas long ol arapela lain memba bilong palamen long sapotim em long taim em i givim dispela petisen long Praim Minista.

I no bin gat sampela toktok kros pait taim em i givim dispela pepa i go. Em i tok tu olsem nau yet bai yumi wet tasol long wanem samting Gavman bilong Australia bai wokim taim em i kisim dispela hel hevi pas bilong ol lain long Wau.

Ol stilman i brukim bataflai na binatang opis 9-pela taim nau

ARI GUH DANDEE i raitim

WANPELA meri husat i save lukautim wok bilong baim na salim ol bataflai na ol narapela kainkain samting hevi bilong em olsem em i no amamas tumas long pasin we ol stilman i bin mekim long brukim i go insait long opis na stilim ol samting.

Misis Catherine Aisi i tok, insait long dispela yia yet 1998, ol stilman i bin brukim dispela opis bilong bataflai na ol binatang inap 9-pela taim olgeta.

Catherine i bin tokim Wantok olsem, em i no klia long

wanem as tru na ol stilman i wok long brukim dispela hap bikos, i nogat mani.

Ol bataflai na ol binatang tasol i stap wantaim ol marasin.

Catherine Aisi i tok dispela pasin i no gutpela tumas bikos, dispela liklik wok bilong bataflai na binatang faming i stap insait long Bulolo.

Dispela i helpim tru planti ol papamama bilong ples na tu i helpim ol liklik manmeri bilong ples long salim ol bataflai na binatang bilong ol long painim liklik mani long helpim sindaun bilong ol.

Na dispela kain pasin bilong bagarapim ol samting i pretim ol kain wok olsem long kamap

na planti bilong ol dispela ol liklik manmeri bilong ples inap painim hevi long sindaun bilong ol.

Lukluk bilong bosman bilong dispela kampani we em i stap long ovasis long holide na Wantok i no bin kisim nem bilong em i bin toktok wantaim Catherine pinis long muvim dispela opis i go daun long Lae bikos long ol kain trabel i save long en.

Tasol Catherine yet i wok long wari nau bikos, em i tingting tumas long ol papamama husat i save salim isi ol bataflai no ol binatang bilong ol klostu long Bulolo, na bai i kos moa long i go daun na salim long Lae.

Sapos tingting bilong bos bilong kampani i go strong i luk olsem planti ol pipel bilong Bulolo, Wau, Watut husat i save salim ol bataflai na binatang bai i kisim bikipela taim stret.

Misis Catherine Aisi i askim nau ol komyuniti bilong Bulolo, ol polis na ol narapela atoriti long traim stopim ol kain pasin i wok long kamap long bagarapim gutpela wok bilong helpim ol pipel bilong ples.

Em i askim tu ol dispela stilman long lusim dispela kain pasin bilong bagarapim ol samting bilong sevim ol pipel long gutpela sindaun bilong ol.

Duadua tieta grup bilong Morobe i kamap namba wan

FRANCO NEBAS i raitim

OLGETA save manmeri bilong Papua Niugini i mas save long holim kalsa bilong ol long olgeta taim, Mema bilong Nawe na namba tu siaman bilong Palamentri Komiti bilong Kalsa, Kenedy Wenge i tok.

Mista Wenge i bin mekim dispela toktok bihain long Morobe Duadua Tieta Grup i bin winim namba wan prais long bes stes prodaksen long Namba wan Nesenel Tieta Festival long Goroka las wik.

Mista Wenge i tok, long holim kalsa pasin i no long lukautim ol gutpela na naispela pasin tumbuna tasol tu long promotim turism long bikpela wei.

Go bek gen long dispela

drama prodaksen bilong Duadua, Taitel "Mama Pasifika", Mista Wenge i tok olsem dispela pilai we ol i soim long makim pes o droim kalsa, skul i go wantaim laip long pasin yumi i stap.

Dispela musik drama "Mama Pasifika" em tupela misineri man na meri husat i stap long Lae na Morobe provins i bin raitim dispela pilai.

Dispela em i bin bikpela samting stret long Morobe provins long witnessim kain samting i kamap, we gavman fanded tieta i kamapim gutpela kaikai bilong em, Mista Wenge i tok.

Em i tok em long dispela kain projek olsem ekting we ol pasin tumbuna bilong PNG i ken i stap strong.

"Long tupela toktok, planti ol manmeri i save kisim gut skul


toktok long maus tasol," em tok

Mista Wenge long tok amamas long ol lain husat i raitim dispela pilai i tok dispela toktok bilong ol laip long hap ples bilong yumi i kamap long dispela pilai, bai skulim ol manmeri gut long samting i stap long graun na gutpela bilong bihain taim bilong ol pikinini.

Em tok tu long gavman long strongim dispela wei PNG i bin mekim pinis.

"Long lukim kalsa bilong yumi long stap olgeta i mas gat gavman sapot na politikel tingting bilong ol lida bilong yumi o bai yumi go het long lusim kalsa bilong yumi i go long dok," em tok.

Long dispela taim yet tu, em tok bikpela tenkyu i go long administrata bilong Morobe Ainea Sengero...



• Sampela bilong ol dispela lain man i sanap long kisim poto i traim rot long Madang i go long Simbu. Ol i laik karim kruse na wokabout olsem Pater William Ross i bin mekim long bipo.

• Ol palaman bilong DCA na Australia i kisim trening long sevim ol pasindia long balus taim balus i bungim birua. Ol i laitim pala long wanpela bikpela tenk na mekim trening long en.

Praim Minista bai rausim ol kalabus lain long krismas

PRAIM Minista Bill Skate bai rausim klostu 60 kalabus manmeri long Krismas taim. Dispela em wanpela pawa praim minista i gat insait long wanwan yia long rausim ol kalabusman long haus kalabus.

Praim Minista Bill Skate i mekim dispela toktok long raun bilong em las wik long Bomana haus kalabus long Mosbi. Em i tokim ol kalabus manmeri na ol bosman bilong haus kalabus (CIS woda) olsem em i lukluk long rausim ol kalabusman long dispela krismas.

Praim Minista i tok em i sindaun wantaim ol loya bilong Gavman na ol i glasim gen dispela samting. Olsem na ol i no inap rausim ol kalabus lain nating tasol. Ol bai skelim gut ripot na rekot bilong ol gut pastaim long em i rausim ol.

Mista Skate i tok taim em i glasim ol nem bilong ol kalabus lain long Bomana, planti we em i laik rausim em ol raskel lain long sait bilong stil, bagarapim meri, kilim man i dai na ol bikpela trabel na hevi.

Mista Skate i tok ol bai glasim ol na lukim sapos ol i senis tru tru long

pasin, ol i bin stap planti krismas pinis na i senis, ol i go lapun, sampela i gat sik long bodi na ol arapela senis moa. Orait bai praim minista i ken orait long rausim ol dispela kain lain long haus kalabus.

Olgeta praim minista i gat dispela pawa long rausim ol manmeri long haus kalabus long olgeta krismas. Dispela em pawa bilong mesi o marimari we praim minista bai givim long ol kalabus lain long dispela krismas.

Tasol opis bilong praim minista i no tok klia long ol dispela kalabus lain bai i kam long olgeta provins haus kalabus o long Bomana haus kalabus tasol long Mosbi.

Mista Skate i bin raun long Bomana haus kalabus las wik Fraide na lukim olsem haus kalabus i pulap tru long ol kalabus lain na i nogat inap spes. Ples bilong waswas, kuk kaikai na slip i no gutpela tumas na i save kamapim sik long ol kalabus lain.

Mista Skate i mekim promis long gavman bai lukluk long dispela hevi bilong ol haus kalabus insait long kantri.

Kumul studio holim rok so long Minj

KUMUL Studio bilong Goroka bai setim ol masin bilong studio long pairapim insait long Minj Ragbi Lig graun taim em i bungim olgeta ben atis bilong Hailans long dispela wik Sarere.

Dispela em long promotim ol pawa ben insait long Hailans na bai i gat prais mani bilong ol tu.

Papa bilong olpela Whagi Helcats na nau bos bilong Kumul Studio long Goroka, Pat Siwi i bin tokim Wantok olsem bihain long ben bilong em i pundaun, nogat wanpela i kisim ples bilong en.

"Taim Whagi Helcats i pundaun, nogat wanpela pawa ben insait long Hailans rijen i kisim ples bilong em. Olsem na nau mipela

tingting long kirapim bek musik long Hailans.

Long kain ples olsem Hagen, Mendi, Simbu, Wabag na Goroka, i gat man na meri i laikim musik tasol i hat long putim i kamaut na pablik bai luksave long ol. Dispela tasol em wanpela bikpela hevi stret," Mista Siwi i tok.

Em i tok tu olsem wanpela bikpela tingting bilong Kumul Studio nau em long helpim, kamapim na strongim musik insait long Hailans.

"Mipela laik kirapim na strongim tru musik industri insait long Hailans rijen. Wankain olsem Pacific Gold Studios, CHM na Tumbuna Track Studios i mekim long ol narapela rijen insait long kantri," Siwi i tok.

Em i tok dispela em nambawan taim ol i laik wokim dispela so na bai pulim planti ben atis insait long rigen.

Ol sampela top atis insait long kantri olsem Alan Herove bilong Saugas, Willie Trophu, Histry Golu na Basil Blitz Greg bilong Super Sound Studios bai kam raun tu. Ol narapela top ben bilong Kumul Studio husat i katim pinis ol kaset bilong ol pinis bai soim pes tu.

Kain ben olsem Tropicals of Goroka, Afiams na narapela ol solo atis olsem Len Yakai, Andy Kamane na Lait Tuwai.

Monica Malbak, narapela meri Madang husat i katim kaset pinis na wok long mekim nais long PNG Top 20, bai sapim nek bilong em tu.

Posang setelmen i gat nupela skul

POSANG setelmen i stap long Busu kompaun insait long Lae Siti i gat nupela skul em Aihi Lokol Levul Gavman yet i bin go pas long sait bilong lukautim na kamapim.

Posang Elementeri skul em i bin op long las Fonde we memba bilong Lae Open, Bart Philemon, i bin stap long witnessim.

Posang setelmen we i wanpela olpela setelmen insait long Lae Siti we samting olsem 4000 pipel i stap long dispela hap.

Ol pipel i stap long hap i kam long olgeta hap long Morobe olsem, Makam, Kabwum, Boana na tu sampela long Sandaun provins.

Siaman bilong pining komiti

bilong skul, Gutmiat Saolaman i tok dispela opening bilong skul long dispela kain taim em long tokim ol pipel olsem skul ya bai redi tasol long go het long neks yia.

"Mipela i wokim dispela bikos mipela i no laik long westim taim tasol long stat taim skul yia i stat" em i tok.

Em tok ol dispela pikinini husat i sindaun insait long klasrum i ken kamap wanpela kain man bilong setelmen long bihain taim na i salensim ol papamama long putim nem bilong ol pikinini i go pas.

Em i tok taim yumi skelim wan-taim ol risos bilong yumi olsem oil, gol na ol arapela, edukesen

bilong pikinini em i namba wan.

Yupela ol papamama mas strong long skul bilong ol pikinini i mas save long rit na rait long save tru," em i tok.

Posang Elementeri skul em namba wan skul we Aihi Lokol Levul Gavman i bin fandim bihain long nupela riform sistem.

Presiden bilong Aihi Lokol Levul Gavman, Steven Awagasi bin opisali givim ki i go long wok kaunsela long dispela taim.

Em i tok olsem tu bai em i givim moa sapot blong ol besik sevis i go arapela hap we ol i sot long ol sevis na helpim.

Dispela graun we skul i sanap nau em bilong Puapu ples long Kerekumgi insait long Lae.

Baing no amamas long toktok bilong Australia Foren Minista

VERONICA HATUTASI i raitim

OL BOGENVIL lida i mas bung wantaim na wok long bringim gutpela sindaun long ailan, Mema bilong Makam na Sedo Foren Afeas na Tred Minista Andrew Baing i tok.

Em i tok gavman i ken wok sapos olgeta lida i wok wantaim olsem wanpela grup. Em bin tok Nesenel Gavman bai helpim olsem long redim ol samting tasol bikpela samting em long ol Bogenvil lida long bung wantaim fdapela nesanel memba bilong ol. Em i tok bikpela samting tu em ol mas kisim Francis Ona i go insait long ol toktok long Bogenvil.

Em i tok i gutpela long Rijinel memba John Momis na ol arapela lida i askim Mista Ona long stap insait long ol toktok we i sut long Bogenvil aninit long nupela gavman rifom sistem.

"Mi save olsem planti pipel i no amamas long dispela tasol yumi ken toktok long Gavman i givim

moa pawa long Bogenvil aninit long Mama lo," Mista Baing i tok.

Em i tok em i sapatim pasin bilong givim moa pawa long o provins tasol wanem samting Gavman i givim long Bogenvil i ken go tu long ol arapela provins.

Em tok pasin we Praim Minista Bill Skate i mekim long holim pas pablik sevis na fainensel pawa long Waiyani em i mak bilong dikteta gavman. Dispela kain em gavman i holim pawa na em tasol i wokim ol disisen long ranim kantri.

Mista Baing i tok i moabeta long BRA/BIG lida Joseph Kabui long toktok long dispela samting wantaim Mista Skate na maski long sutim tok long Oposisen.

"Sapos Mista Kabui i no lukim dispela, em mas tingting gut nau," Mista Baing i tok.

Long wankain taim, Mista Baing i no amamas long toktok we Foren Minista bilong Australia Alexander Downer i wokim long sutim tok long Oposisen long no givim sapat long Bogenvil Bil long Palamen las wik.

Taim Mista Baing i amamas long Mista Downer i tok ami bilong Australia bai i stap long ailan, em i tok i no samting bilong Australia long go insait long politiks bilong PNG.

Em i tok ol toktok we Mista Downer i wokim i mekim PNG i luk olseme em i stap long lukaut bilong Australia yet.

Tasol em i tok PNG i luksave long Australia na gutpela wok em i mekim long helpim wantaim wok long kamapim gutpela sindaun na pren pasin insait long Pasifik rijen.

Mista Downer bai opim Buka provinsel haus sik tumora. Haus sik ya em ol bin wokim aninit long AusAID Bogenvil restoresen program.

Australai i bin tromoim AUD\$6.7 milien long sanapim haus sik ya, 8-pela haus bilong ol wokman na ol masin bilong yusim long haus sik. Ol bin stat wok long dispela haus sik long mun Me las yia na pinisim olgeta wok long en long Jun long dispela yia.

SBDC LAIK HELPIM YU WANTAIM OL LIKLIK WOK BISNIS

Wanem rot bai yu bihainim long yusim gut mani?



Samting bilong mekim:

Tingim, yu gat K30 long wokim soping long famili bilong yu. Yu mas save olsem yu no inap long baim olgeta samting yu laik wantaim dispela mani mak. Olsem na yu mas glasin na skelim gut long kisim ol samting we yu ting i gutpela moa long famili na larim ol arapela samting i stap bek. Yumi ken tok olsem yu wokim disisen long ol samting we yu ting i gutpela long helpim famili bilong yu.

Ol pipel husat i save wokim disisen long rot ol yusim mani long en bipo ol i yusim em ol i tok ol i plenim long yusim mani bilong ol. Plenim o skelim na glasim gut bipo yu yusim mani em i wanpela rot long long stiaim yu long tromoi mani long ol samting we yu laikim tru.

Ating bikpela samting bipo long baim samting em ol wok redi we wanpela i mas mekim bipo long tromoi mani long baim ol samting. Dispela em i tru long meri husat i save go long maket long baim ol prtua na kumu, man i gat stoa husat i save go long holisel stoa long baim ol samting nas jenerel manesa bilong trak kampani husat i save go long ka dila bilong baim ol nupela trak.

Olgeta ol dispela lain i mas redi gut bipo ol i go baim ol samting. Baim ol samting we yu laikim tru na ol dispela we mani bilong yu inap long baim wantaim. Sapos

wan wan long ol lain antap husat i laik baim ol samting na yusim gut mani bilong ol, ol bai bihainim wankain rot. Ol mas wokim plen long rot bilong yusim mani bipo ol i baim ol samting.

Namba wan samting long rot bilong wokim plen long yusim mani em long painaut pastaim hamas mani yu gat long yusim. Long ol wok manmeri mani ya em potnait pe bilong ol tasol i gutpela long putim wantaim olgeta arapela mani we ol i kisim. Dispela em mani ol i kisim long salim kumu na kaikai bilong gaden, ol famili presen na ol arapela.

Narapela wok em long wokim lista long ol samting we yu laik tromoi mani long en. Wanpela samting we yui mas tingim taim yu wokim lista em putim pastaim ol samting we yu laikim tru na ol arapela bihain. Wanpela rot long wokim dispela em:

1. Pastaim tru long lisat bilong yu, putim nem bilong ol samting we yu laikim tru. Em bai gat long en ol samting olsem:

- Bekim dinau long ol samting we yu kisim;
- Renmani bilong haus;
- Kaikai na
- Klos

2- Soim mani mak we yu ting bai yu sevim.

3. Ol lain i kisim bikpela pe bai gat mani i stap long baim ol arapela samting long amamasim sindaun bilong ol.

Diro askim ol Gavana long sekim raskel ripot bilong provins pastaim

KENNEDY EDENE i raitim

GAVANA bilong Sentrel provins Ted Diro i tokaut olsem em i wok long sekim toktok bilong Praim Minista Bill Skate we i tok olsem hevi bilong raskel pasin i wok long go daun nau long 30 pesen mak insait long kantri.

Mista Diro i tok dispela toktok bilong Praim Minista i bin kamap insait long baset ripot olsem na ating long dispela as, Gavman i daunim baset bilong plis fos, CIS woda na ol kot sevis.

Em i tok Mista Skate i tok bikos olgeta bikpela raskel pasin i go daun nau long 30 pesen mak, olsem na Gavman i katim baset bilong ol dispela ogenaisesen i lukautim lo na oda.

Em i tok ol i no ting raskel pasin i go daun nau bikos long luksave bilong em, bikhet pasin i kamap bikpela nau long ol ples na rurel eria. Olsem na Gavman long kamapim dispela kain ripot, ol i mas kisim ripot

bilong plis na ol arapela lo opis we i save sekim na holim rekot bilong ol raskel pasin insait long kantri.

Mista Diro i tok bai nesanel baset i bruk long foapela wik taim tasol i nogat toktok namel long ol provinsel atoriti na ol Gavana long wanem kain, rot ol bai bihainim long brukim baset bilong ol. Na wanem rot ol provins bai helpim wok bilong plis fos insait long provins, viles kot na ol ekstensen sevis.

Sentrel Gavana i tok bai ol wok bilong viles kot i bungim hevi long neks yia bikos moa hevi bai i kamap antap long wok bilong ol.

Mista Diro i tok pastaim long provinsel gavman i kisim wok bilong traim helpim plis wok insait long provins, olgeta Gavana bilong wanwan provins i mas save long trupela toktok long level o mak bilong raskel pasin i sanap long wanem mak. Olsem na ol toktok bilong raskel pasin i pundaun i trupela toktok tumas tasol em i toktok bilong katim baset bilong lo na oda wok tasol, Mista Diro i tok.

Man Korobosea painim mak bilong K1,000 long Ox & Palm



• Mista Vaibua (lephan) i soim lid bilong tin Ox & Palm. Long raithan em sels na maketing menesa bilong Hugo Canning, Greg Stevens.

JAMES KILA i raitim

HARVEY Vaibua bai kisim wanpela spesel Krismas presen, papa bilong em Ken i promis pinis long givim.

Yes, Harvey husat i gat 12-krismas i bin laki tru long painim mak bilong "K1,000" insait long tin bilong Ox & Palm na toksave long papa bilong em. Dispela mak i stap long lid bilong ken Ox & Palm.

Mista Vaibua i bin stori olsem em i bin baim dispela bikpela tin Ox & Palm long Namu Treding long Hohola na karim i go long haus long famili bilong em i kaikai long apinun.

Em i bin guria stret taim pikinini boi bilong em Harvey i bin opim tin na lukim dispela mak i

soim K1,000 i stap insait long lid bilong dispela tin.

Em i tok long namba wan taim tru klostu ol i laik tromoi tin i go long rabis, tasol Harvey i bin lukim stret dispela mak na i tokim papa bilong sekim gut. Taim ol i sekim gen ol i amamas tru olsem ol i win pinis.

Femili bilong Mr Vaibua i plenim pinis wanem samting ol bai mekim long dispela moni ol i winim. Ol bai selebret long Krismas wantaim sampela kaikai na tu hap moni bai go long peim skul fi.

Mista Vaibua i tok olsem ol i tingting tu long baim wanpela spesel presen bilong pikinini man ya Harvey bikos em yet i bin luksave long dispela mak bilong K1,000 aninit long lip bilong tin Ox & Palm.

Em i tok tu olsem win bilong ol

i bin kamap long gutpela taim stret bikos Mista Vaibua i bin go long wanpela liv bilong em na ino longtaim tasol em i kambek gen long wok. Olsem na dispela moni bai halivim ol gut tru long selebretim Krismas bilong ol.

Sels na Maketing menesa bilong Hugo Canning kampani, Greg Stevens i bin givim sek moni i go long Mista Vaibua long dispela wik Mande.

Mista Stevens i tok tu olsem dispela em i namba wan wina bilong K1,000. Em i tok ol narapela wina i bin winim tasol long liklik prais olsem K100, K250 na K50.

Em i tok tu olsem kompetisen ya i gohet yet na planti moa tin Ox & Palm i go aut pinis long ol stua insait long kantri long givim sans long moa manmeri long winim moni wantaim Ox & Palm.

Gagarimabu winim ileksen petisen bilong Saut Flai

YAKAM KELO i raitim

NESENEL Kot i rausim ileksen petisen bilong olpela memba bilong Saut Flai Perry Zeipi egensim nupela memba Gabia Gagarimabu long las wik.

Mista Gagarimabu em lida bilong Yunaitet Pati, wanpela liklik pati insait long Skate Lasaro Gavman.

Nesanel Kot Jas, Jas Woods i skelim dispela ileksen petisen bilong olpela memba tasol i nogat inap evidens long em i salensim nupela memba, Mista Gagarimabu.

Mista Gagarimabu i tok nau em i taim bilong askim

Praim Minista Bill Skate long givim em wanpela wok Ministri bikos pati bilong em i bin sanap strong na sapot wantaim gavman.

Memba bilong Saut Flai i tok dispela em wanpela promis Praim Minista i bin mekim longpela taim i kam nau tasol nogat wanpela samting i kamap yet.

Yunaitet Pati igat wanpela Ministri tasol em memba bilong Tari Pore, Herowa Agriwa husat em Minista bilong Envaromen na Konvesesen.

Mista Gagarimabu i tok em i amamas long winim kot bilong em na nau em i ken sindaun isi na wok gut long hevi bilong ol pipel

bilong em insait long ilektoret. Em i mas mekim wok bilong em stret long bringim ol sevis na developmen i go long ol pipel bilong Saut Flai.

Mista Gagarimabu i mekim bikpela tok amamas tu i go long loya bilong em Alfred Manase bilong Pato Loyas na ol famili na sapota bilong em husat i flai i kam long ples na Saut Flai ilektoret long harim dispela kot bilong em.

Man husat i bin kisim petisen egensim ileksen win bilong Gaba Gagarimabu em Perry Zeipi, olpela memba bilong Saut Flai. Em i lus long ileksen long las yia 1997 nesanel ileksen we Mista Gagarimabu i winim.

Cousins Band, em nupela stail musik bilong Kerema

NUPELA feveret musik bilong Kerema i kamap gen na dispela taim em ol sampela yangpela blut ol i kolim ol yet Cousins Band o ben bilong ol kasen brata o famili.

Planti manmeri i harim singsing na ol song bilong ol pinis long ol disko ples na i no inap wet long kisim wanpela kaset bilong ol. Tasol kaset i no kam aut yet na ol i laik bai dispela kaset i mas kamaut long Krismas taim.

Ol yangpela blut bilong Lesé Kavora long Galf provins i bin rekotim kaset bilong ol wantaim CHM Supersound Studio long Mosbi long Jun dispela yia.

Ol dispela yangpela kasen i olsem planti musik lain insait long kantri we ol yet i lainim ol yet long paitim gita na pilaim arapela musik inap ol i save gut long pilai.

Ol musik na singsing bilong Kerema i no nupela long ia bilong planti manmeri bilong Papua Niugini bikos ol arapela biknem musik man olsem Basil Greg na Robert Oeka i bin mekim planti pairap pinis long musik bilong Kerema we planti manmeri i save laikim na bihainim. Olsem na Cousins Band em wanpela bilong ol Kerema musik we planti manmeri bai laikim long harim tu.

Lida bilong ben Joe Liri i tok ol i laik mekim krai bilong musik na nek bilong ol song i narakain liklik long ol arapela ben bilong Kerema. Dispela em long givim luk-save long bilong ben na nem bilong ol.

Em i tok long kamap long dispela mak, yu mas holim pas ol hevi na ol arapela problem we i save kamap na wok hat long kamapim samting yu laik mekim.

Kaset i no kamaut yet tasol ol i amamas nau long pinisim olgeta wok bilong rekotim kaset na ol i kisim win nau.

Stori bilong ol dispela ben memba i gutpela tru bikos ol lain ya em ol wanpela famili memba tasol na long 1996 ol i bung wantaim na fomim wanpela ben grup taim ol i bin kisim ol gita na ol samting bilong pilai. Ol i bin senis long pilai long gita nating na i go long pilaim ol pawa gita.

Aninit long piksa kaset bilong ol, ol i bin yusim nem Lester Souls tasol planti toktok i kamap gen long ol i mas tingting gut long wanem kain nem ol i yusim long ben

bilong ol.

Drama bilong ben, Camilo Hou i tok planti tok baksait i kamap we ol manmeri i tok ol i laik bihainim musik bilong Basil Greg na Robert Oeka o ol arapela Kerema ben.

Olsem na mipela i sindaun gen na stretim musik bilong mipela gen, man bilong pilai kibod Vincent Haro i tok.

Ol i skelim ol yet na painimaut olsem ol i kasen brata long sait bilong famili bilong ol. Olsem na ol i kolim nem Cousins Band.

Cousins Band i bin pilai long Mosbi so long dispela yia we i pulim laik bilong ol bosman bilong CHM Studio. CHM menesing dairekta Raymond Chin na ol Saun Enjinia olsem Eddie Elias, Wamsi Ilau, Basil Greg husat em wanpela famili memba bilong ol.

Ol bosman bilong CHM Supersound Studio i tok long kamapim kaset em bikpela hat wok tru. Tasol aninit long lukaut bilong Wamsi Ilau, Cousins Band i pinisim rekot bilong ol na i nau ol i wetim kaset long kamaut long stua.

Damien Liri i tok long taim bilong rekot ol i save kisim bikpela taim tru. Sampela taim arapela ben i save go stap pinis long katim kaset na ol i mas go wet long ausait. Sampela taim smok i save pinis na ol bai wet yet long taim bilong ol long go rekot. Bikos ol i nogat demo kaset, ol i bungim planti salens tru tasol Wamsi i bin wok hat tru wantaim ol long kamapim dispela kaset bilong ol. Olsem na ol i gat bikpela amamas tru long Wamsi na CHM Studio, Joe i tok.

Cousins Band i rekotim wanpela vidio klip pinis long go wantaim dispela album bilong ol.

Cousins ben i laikim bai dispela kaset bilong ol i mas kamap gut tru long mekim amamas long olgeta manmeri husat i bin helpim ol long kamapim dispela album.

Long dispela taim yet, ol i save pilai long ol klap na pati long wokim liklik mani bilong helpim ol bikos olgeta ben memba i no wok.

Ol i pilai long Press Club long Tunde stat long dispela wik.

Motu Koitabu Kaunsel ileksen i stat tumoro

YAKAM KELO i raitim

MOTU Koitabu Kaunsel ileksen bai stat long dispela wik Frade Desemba 11, 1998 na i go pinis long neks yia Januari 19, 1999. Ilektoel Komisina Reuben Kaiulo i tokaut long dispela long las wik.

Ileksen bai op long Fraide turomo we nominesen bai i op long ol kandidate i ken go putim nem na redim ol yet long resis long dispela kaunsel ileksen.

Insait long progrem bilong Ilektoel Komisina de bilong nominesen i pas em long Fraide Desemba 18, 1998, neks wik na taim bilong statim vot o ol manmeri bai vot em long Fraide Januari 15, 1999.

Long Sarere Januari 16 1999 bai vot i pinis na ol ileksen opisel i stat long kaunim risal bilong vot.

Long Tunde Januari 19 1999 bai Ilektoel Komisina i tokaut long nem bilong ol kaunsel husat i winim Motu Koitabu Kaunsel ileksen long neks yia.

Komisina Reuben Kaiulo i askim ol kandidate long ol ples olsem Tatana, Daugo, Baruni, Elevala, Lahara, Elavala Luarabada, Poreporena Lahara, Poreporena Laurabada, Vabukori, Taikone, Pari, Kilakila na Korobose long nominet long ol gutpela taim we i stap nau. Bikos nogut nominesen i pas na ol bai kisim hat taim long nominet long las minit.

Mista Kaiulo i tok olgeta nominesen i mas go long han bilong Ritening Opisa Frank

Gabi long Boroko opis wantaim K1,000 nominesen fi.

Mista Kaiulo i tok long oraitim kandidate long sanap long dispela Motu Koitabu Kaunsel ileksen, ol kandidate i mas gat:


- 25 krismas na moa
- papa bilong kandidate i mas man Motu Koitabu
- asples na haus bilong em i mas stap long Mosbi
- mama i karim em long ilektoret hia
- memba long wanpela klen insait long ilektoret
- i gat long ilektoret moa long tupela krismas o
- i bin stap long ilektoret samting olsem 5-pela krismas.

Long vot insait long dispela ileksen, ol manmeri i mas:

- pikinini bilong Papua Niugini na i stap long Papua Niugini
- krismas bilong em 18 na moa
- i mas pikinini bilong Motu Koitabu na asples bilong em i stap insait long Nesanel Kapitol Distrik
- i bin stap insait long ilektoret long 10-pela krismas olgeta.

Mista Kaiulo i askim olgeta Motu Koitabu manmeri husat i ken vot long sekim gut nem bilong ol long Komon Rol buk. Dispela i ken mekim isi long ol i vot long dispela kaunsel ileksen na i no ken bungim hevi we ol bai i nogat nem.

NCDC bai givim K16 milien long skul fi na ol skul projek



• Caritas hai Skul bilong ol meri long Mosbi Dispela skul i save sapotim na lukatim em yet inap Gavman i liksave na i laik helpim em.

HELEN REI i raitim

NESENEL Kapitel Distrik Komisina bai tromoi K16 milien neks yia long helpim olgeta skul insait long Mosbi siti. Dispela mani bai i kam long K91 milien baset bilong NCDC long neks yia.

Dispela em toktok bilong NCD Gavana Philip Taku taim em i toktok long greduesen bilong Caritas teknikel hai skul bilong ol meri insait long gret 10 greduesen dispela wik.

Mista Taku i tok Caritas bai kisim tu dispela helpim

bilong Gavman long neks yia wantaim ol arapela skul long siti. NCDC i bin helpim pinis Caritas skul long wokim ol banis na arapela developmen long skul graun we i kos olsem K56,000 na K15,000 long las yia.

Mista Taku i tok moa sapot bai i go yet long Caritas bikos dispela skul i save sapotim em yet na i gutpela piksa bilong wok edukesen insait long kantri.

Caritas skul i bin op long 1995 we sista i go pas long skul em Sista Stella An wantaim tripela arapela sista bilong Sista ov Miyazaki long kantri, Ripablik of Korea.

Dispela yia em namba wan taim bilong 94 gret 10 studen meri i pinis long dispela skul wantaim pepa bilong ol. Ol meri nau i gat save long kompyuta masin, paitim masin long wok sekerter na taipis, samapim kolos, kukim gutpela kaikai, ol i skul tu long Inglis, Maths, Sains na Sosel Sains.

Long greduesen, tok klia i kamap olsem skul bai lainim arapela lesan tu olsem buk kiping, bilas na disainim ol kolos na samting, turis na hospitaliti skul bai kamap long lesan bilong ol gret 11 na gret 12 long bihain.

WANTOK spots wiken

MORATA LIG RIPOT

Hawks i kamap long las minit na winim

MATTHEW YAKAI i raitim

IGAT tupela Sande i stap yet bipo long namba wan raun bilong Morata Op sisen ragbi lig i pinis.

Olsem na las wik Sande long Kone Tigers oval long Waigani, olgeta gem i strong tru na ol tim i statim long winim arapela.

Wanpela strongpela gem i bin kamap namel long Seven Mail Jets na K/Hawks we planti man i bin kamap na amamas tru long lukim.

Jets i mas bel hevi tru long dispela lus we Hawks i bin win long las minit wantaim wanpela fil gol. Skoa i sanap olsem Hawks 13 na Jets 12.

Wanpela strongpela pilai bilong Jets Raphael Mua i wok hat tru long pilaiia strong olsem na tim bilong em i go pas long skoa 12-0 bipo long haptaim. Mua em i wanpela biknem pilaiia bilong Post Puma na em i save pilai tu long Vipers.

Raphael yet i bin opim trai bilong Jets taim em ran stret, brukim strongpela defens na karim tripela man long baksait bilong em na go putim trai aninit long pos. Dispela trai i kamap insait long 15 minit ya.

Huka bilong Jets Michael i kikim na skoa i sanap 6-0.

Hawks i wok hat tru long

bekim dispela trai tasol Jets i no bin givim sans long ol. Winga bilong Jets Aron Waula i putim namba tu trai na skoa bilong ol i suruk i go long 10-0. Konvesen kik i go insait na skoa i sanap 12-0.

Tasol yumi noken luk-daun long Hawks. Ol tu i gat wanpela biknem pilaiia olsem Joe Williams husat i save pilai senta o hapbek.

Ol Hawks i pasim toktok gut long seken hap ya. Olsem na taim ol i go insait long gem, ol i no givim wanpela sans tru long ol boi Jets. Olsem na lep winga bilong Hawks i kisim wanpela bal na givim siksti i go na putim trai. Konvesen i go insait na skoa i sanap olsem Jets 12 na Hawks i ran bihain yet wantaim 6 poin.

Samting olsem 10 minit i stap, tupela tim wantaim i strong tru ya. Tupela sait wantaim i taitim bun na nogat skoa i kamap.

Man ol Hawks i no slek. Ol i wok hat tru long putim narapela trai. Dispela hat-wok bilong ol i bin karim kaikai taim wanpela bikpela fowat i brukim difens bilong ol na go putim trai.

Dispela trai i bringim skoa i go sanap long 12-12. Orait samting olsem tripela minit i stap long go painim fultaim, Tony Rasta bilong Hawks i kikim fil gol na winim dis-



•Pilaia bilong Tigers i brukim difens bilong Giburi Raiders long Morata Op-sisen ragbi lig Kompetisen. Tigers win 12-4

pela gem 13-12.

Insait long dispela tripela minit, gem i wok long strong tru. Tri minit em i bikpela taim long ragbi lig, olsem na ol boi Hawks i wok long suvim het i go na Rasta i kikim dispela fil gol.

Skoa bilong ol arapela gem i sanap olsem, Mumut i daunim Talapia 8-6, Tigers nekim Giburu Raiders 12-4.

Vais presiden bilong Morata Op Sisen Lig, Bill Kito i tok ol i bin statim dispela lig long 1981 na 1982. Na long dispela taim i kam inap nau, ol i bin

kamapim planti pilaiia long Mosbi lig.

Insait long ol arapela nius mamba bilong Mosbi Not Wes Sir Mekere Morauta i bin baim yunifom bilong olgeta 6-pela klap husat i save pilai long Morata Op-sisen ragbi lig kompetisen.

Kos bilong ol jesi inap long K11,000, em i baim long Woo Textile kampani.

Taim Sir Mekere Morauta i givim yunifom i go long presiden bilong Morata lig, Alex Tondopa em i tok em i hamamas tru long helpim ol yut long

liklik we.

"Planti askim bilong helpim i bin kamap long opis bilong mi tasol mi bai luksavelong pas bilong ol wimen grup, yut na sios pastaim", Sir Mekere i tok.

Tondopa i amamas tru na tok tenk yu long Sir Mekere.

Ol 6-pela tim husat bai werim dispela ol nupela yunifom em Kei Club Hawks, Giburi Raiders, Megusa Brothers, Talapia, Tigers na East Kanges.

Toksave i go long skul long putim nem long skulbois soka

PRESIDEN bilong Pot Mosbi Skuls Soka Asosiesen Joe Heenan i askim wanpela ol skul o yut grup i laik putim nem long kompetisen neks yia i mas stat nau.

Em i tok olsem bai i gat 160 tim long neks yia. Olsem na wanem skul i laik putim tim i mas givim nem hariap.

Dispela kompetisen bilong ol skul bai stat long February. Fi bilong ol dispela krismas em i sanap olsem K100 bilong Anda 13 i go inap long Anda 17

Na ol Anda 10 i go inap long Anda 12 bai baim K95 na Anda 7 i go inap long 9 bai baim K90 long afiliiesen fi.

Heenan i tok olsem

sapos wanem tim i baim fi bai stap insait long kompetisen. Na wanem ol tim i no baim bai i no inap stap long dispela resis ya.

Sapos ol tim i laik baim i mas go long James Hardie, Taun St Trade Centre Unit 5 klostu long Arnotts Bakeri.

Na em i askim ol tim husat i laik resis long Orogen Nesanel Yut Soka taitel i mas pilai long Pot Mosbi Skuls Soka Asosiesen or sampel skulbois kompetisen.

Husat i laik save moa i ken ringim Joe Heenan long dispela telepon namba 3256033 o feks 3250091

ELCOM DAT RIPOT

Sankamap bagarapim krismas plen bilong Gillette

HENRY MORABANG i raitim

TUPELA tim bilong Not Solomon i brukim bun long winim K3000 long Elcom Op-sisen Dat kompetisen las wik.

Tim ya em Sankamap Tuluau na Gillette. Tupela i bin kamapim gutpela dat gem we i pulim planti man husat i bin kamap long lukim dispela fainel.

Gillette husat i winim K3000 las wik long Moonlight Op-sisen dat kompetisen i traim long kisim arapela mani gen tasol nogat ya, ol boi Tuluau i autim ol na kisim dispela K3000.

Orait ol boi Gillette i kisim K1000. Tim i pinis namba tri long dispela kompetisen em Taliu husat i kisim K650 na Erebai i kisim K350.

Martin Mola husat i go pas long Tulaun na arapela wantok bilong em Joel Hiriats i go pas long

Gillette.

Tupela tim wantaim i statim strongpela gem tru long ol tim kompetisen, trebel, dabol na singels.

Mola husat i save olsem tim bilong em bai lus nau i kirap na makim ol top pilaiia long stap insait long singels kompetisen. Molean Sei i winim David na arapela poroman bilong em Tom Isiki autim Garry Saruva.

Mark Salaiua i kam levelim skoa taim em i autim Timothy Sare. Na las gem i stap namel long kepten bilong Gillette Joel Hiriats na Jimmy Litau. Tupela wantaim i winim wanwan gem na Litau husat i gat gutpela masta mak long tromoi spia i sutim stret namba na ol i win.

Kodineta bilong Elcom Op-sisen kompetisen John Maliku i amamas tru long olgeta tim husat i bin stap insait long dispela resis. Em i promis olsem neks yia bai i gat gutpela kompetisen moa long dispela.

Pasifik Skuls Gems bai kamap long Sydney

OL SKUL mangi bilong Papua Niugini bai i gat sans long lukim stedium bilong Sydney Olympik long yia 2000 taim ol i pilai long namba 6 Pasifik Skuls Gems long Australia.

Dispela Pasifik Skuls Gems bai kamap sampel mun bipo long Olympik Gems long yia 2000. Papua Niugini i save salim ol spotsman na meri long skul i go long dispela kain ol kompetisen bipo na long yia 2000, ol ogenaia i amamas tasol na bai redim wanpela strong-

pela tim bilong ol skul mangi.

Dispela Pasifik Skul Gems long 2000 bai ran inap 6-pela de. Ol spotsman na meri bai yusim ol stedium na fil bilong Olympik Gems long Homebush Be, Sydney long Australia.

Bai i gat resis long atletik, daiving, jimnestik na swimming na bai resis long olgeta skul mangi krismas bilong ol namel long 10-19.

Bai i gat resis bilong ol disebel, na ol ogenaia i askim olgeta tim long putim wanpela tim long yia 2000.

NGI i kisim taim stret long Gazelle

POM MEN SOFBAL RIPOT

GAZELLE i soim olsem em tu i gat bikpela laik long winim taitel bilong Pot Mosbi mens sofbal bihain long em i nekim NGI 9-0 las Sande.

Gazelle em olpela sempion bilong Pot Mosbi na tu i bin winim nesanel taitel bilong Papua Niugini planti taim pinis.

Dispela pilai i no gutpela tumas bikos Gazelle tasol i gat laik long pilai na ol NGI i giv ap ya.

Patrick Pilak husat em intanesenel pitsa bilong Papua Niugini tasol i winim dispela gem bilong Gazelle. Em i wok long kamapim gutpela pits we ol yangpela boi long NGI i painim hat tru long paitim.

Win bilong Gazelle nau i surikim ol i go wan poin bihain tasol long Elcom husat i wok long go pas long poin lata.

Poin lata bihain long las wiken i sanap olsem Elcom 10, Gazelle 9, Brown Eagles 8, Manalos 7, MSC 6, NGI 6 AB Bears 4, Malangan 2 na Dolphin i no rekotim wanpela win yet.

Tupela tim wantaim Gazelle na NGI i strong long namba wan ining na i nogat wanpela skoa i kamap. Orait Gazelle i brukim kiau long namba tu ining.

Gazelle i gat tu daun na i gat ol pilaia long bes. Harry Mathew long namba tri bes, Henry Timbe long seken bes na Peniel Eliab long namba wan bes. Orait sot stop Pius

Martin i paitim wanpela gutpela bal i go namel long rait na lep midfil na ol dispela pilaia i kam hom.

Insait long dispela ining, NGI i wokim planti ol asua na Gazelle isi tasol long skorim ol poin.

Long namba tri ining Tony Daple, Jerry Albert na Timbe i paitim bal na ol tu i kam hom long surikim skoa i go antap tru.

Kosa Blaise Paivu i wokim dispela senis tasol dispela i no stapim ol Gazelle long wokim moa skoa. Yangpela pilaia tru bilong Gazelle Levi Uralia Daple na Mathew i rekotim arapela tripela skoa long bringim skoa i go antap long 9-0.

Ol lain i pilai strong long NGI em Blaise Tatai, Nigel Tata, Alois Odis, Nason Albert na Leonard Palauva.

Insait long arapela gem Manalos i laki long winim Tigers 4-2, Brown Eagles nekim MSC5-0, Hawks autim Dolphins 2-1, na Elcom nekim John Pangkatana na ol boi Malangan 12-5.

Insait long B gret gem, Brown Eagles nekim Tiges 5-2, Gazelle winim Tarangau 5-2, Karanas tu winim Hawks long sem poin 5-4 na Malangan winim AB Bears 4-2

Long C gret, Elcom autim NGI 4-3, MSC i winim Samurai 3-1, North winim Dolphins 2-1, Manalos waraim Burma Raiders 25-5

Na olgeta gem bilong ol meri i no kamap long Sarere bikos long bikpela ren i bin kamap long Pot Mosbi. Wanpela gem tasol namel long Bears na All Stars i kamap we Bears i winim All Stars wansait 15-3.

Rakunai Yut nekim Nomads

RABAU SOFBAL RIPOT

NUPELA sofbal asosiesen, Rabaul Amata Sofbal Asosiesen i go insait long namba tu raun bilong kompetisen bilong em las wik.

Wanpela nupela tim Rakunai Yut Sofbal klap i autim wanpela strongpela tim Nomads 16-10.

Nomads i lukdaun long Rakunai olsem na ol i guria taim Rakunai i givim gut wan stret long ol.

Long las wik Rakunai i givim hat taim stret long MSC bihain na MSC i kam long las minit na win 5-4. Olsem na dispela i bin kirapim stret skin bilong ol nekim ol boi Nomads las wik. Dispela em i namba tu taim Rakunai i

win. Las wik ol i kisim fri tu poin bikos ol lain Tavui i no bin kamap long pilai.

Rakunai i mekim ol lain Nomads i guria stret taim ol i rekotim 12-pela ran long namba wan na namba tu ining.

Pitsa Ludwick Bokamir na ketsa bilong em Jack Kavie i putim kamap wanpela strongpela gem stret. Long gutpela pilai bilong ol, ol i no larim wanpela pilaia bilong Nomads i paitim bal na ran long bes.

Beting bilong Nomads i no gutpela tumas olsem na long namba tri raun ol i mekim senis we i karim kaikai na 4-pela pilaia bilong ol i bin kam hom.

Ol pilaia bilong Nomads i kam hom bihain long Tony Sino i paitim wanpela gutpela bal long kisim Wilson Tovilo, Patrick

Kavanamur na Kuriap Thomas i kam hom.

Alois Kakari i paitim wanpela gutpela bal gen long bringim em yet wantaim Sino i kam hom long mekim skoa i luk moa nais.

Nomads i laik holim RYSC tasol ol i strong na i no larim Nomads i kisim wanpela hom. Orait Rakunai i rekotim tripela moa ran i kam long Benedict Malana, John Baroro na Leo Pabeke bihain long Henry Tuvelo i paitim wanpela gutpela bal.

Pitsa bilong Nomads Michael Paulias i rekotim 5-pela straik aut tasol dispela i no inap long helpim tim bilong em long win.

Nomads i rekotim 5-epal ran long las ining tasol RYSC i kisim wanpela long surikim skoa i go long 16-10.

Ruga i wokim rekot long straik aut

PITSA bilong Post PNG Geraldine Ruga i wokim 12 straik aut long helpim tim bilong em long win long Is Nu Briten wimen sofbal kompetisen.

PNG Post i wilwilim stret RYSC 26-1 las wik Sarere long Kokopo So graun.

Na yangpela susa bilong em Lucy husat i pilai long namba wan bes i kamapim ol stail pilaia we i autim kwik ol rana ya.

Dispela gem em prisisen fainel namel long Post PNG na RYSC. Na bihain liklik ol i autim stret sem tim ken long sisen proper 11-7.

Post PNG i wokim nem tasol ol boi RYSC i soim tru ol sapota bilong sofbal olsem em i strongpela tim stret. Wanem ol tim husat i tingting long salensim ol i mas lukaut bikos dispela tim i strong tru ya.

Barbara Timot i helpim dispela nupela tim ya RYSC na i wok long paitim gutpela ol bal tasol pitsa bilong Post PNG Ruga tasol i autim ol ya.

Insait long namba tu A gret gem bilong ol meri, Ivarak i pasim stret dua na i no larim ol Kuli i skoa. Skoa bilong tupela tim ya i sanap olsem Ivarak 14 na Kuli em i kisim 10 poin tasol.



• Pilaia bilong All Stars Thresa Tomil i ketsim gut bal taim ol i salensim AB Bears long B gret resis long Pot Mosbi wimen sofbal las wiken. Foto: Bae Kimali.

Ivarak i go pas long ENB sofbal

ENB MEN SOFBAL RIPOT

SEMPION tim Ivarak i stapim strongpela salens long Yokomo long winim namba wan gem bilong ol long Is Nu Briten mens sofbal kompetisen las wik Sarere. Ivarak i memeim ol boi Yokokom 12-2.

Dispela skoa i no soim olsem gem i wansait, nogat, tupela tim wantaim i pilai strong tru. Yangpela boi bilong Yokomo i givim gutpela salens stret long tim bilong Martin Bobo.

Dispela em wanpela A gret gem tasol i kamap long Is Nu Briten sofbal kompetisen. Tripela gem i no kamap bikos taim i pinis.

Ampaia Jack Marita i stapim gem namel long NGI na Barom we NGI i wok long pas long skoa 12-4. Tupela arapela gem i no bin kamap em namel long RYSC na KYSC na Karasco na Island Hawks.

Mausman bilong Is Nu Briten Sofbal Asosiesen Francis Rangattin i autim belhevi bilong

em long ol tim i no save kamap long taim bilong pilai.

Rangattin i tok ol pilaia na opisel i laikim olgeta gem long Sarere na long Sande ol i ken lotu. Tasol kain pasin ol i save mekim long Sarere i no gutpela bikos olgeta gem i save stat bihain stret ya.

Em i laik olgeta tim i mas kamap long taim na ol gem i ken stat long taim na tu pinis long taim.

Olgeta tripela gem bilong ol meri i bin kamap bikos ol i kamap long taim. Na ol man em nogat ya.

Ivarak i wok long putim sem tim i bin winim gren fainel tasol ol i no pilai strong tru.

Filding bilong Ivarak i orait tasol beting i no gutpela tumas inap long las tu ining we ol i stat long rekotim ol skoa.

Yokomo i kamapim strongpela pilai tru na i givim hat taim long Ivarak tasol ol i no save pinisim gut gem o larim ol pilaia i kam hom long kisim skoa. Dispela em i namba tu yia bilong ol long Is Nu Briten kompetisen. Ol pilaia olsem

Oseah Kuvang, Palaua Kaita, Kaur Osah na Lasiel i wok long kamapim gutpela pilai long infil. Ol i kisim gutpela sapot i kam long Jack Marita na Daniel Lukbuk husat i bosim autfil.


Na long sait bilong Ivarak, Bobo yet i go pas long tim. Em i kisim sapot i kam long Stanley Wartang, Anton Warpuai, Rakuk Pama na Marti Wawaongo na Julius Penial

Na long pitsa yet em Allan Tomang husat i wok long sambai tasol sapos wanpela pilaia i bagarap.



• Lephon: All Stars B gret tim i sanap na kisim poto bipo ol i salensim AB Bears. Bears i win win 15-3.


• Aninit: Pitsa bilong AB Bears B gret i soim stail we i save kukim Bisini graun.



• Lephon: Oi susa long AB Bears i stailim long kisim piksa.


• Raithan: Mada, yu painim poro. I luk oisem yu wan bai pilai nau ya. Meri ya i save pilai long DPM tim.

Poto: Bae Kimali na Sape Metta



• Lephon: Winnis Penny bilong Community Tigers long Morata op-sisen lig i holim bal na brukim difens bilong Raiders.

• Raithan: Kain stail bilong inta siti bai kukim ol bikpela senta neks yia.



Igam Op-sisen soka i stat wantaim stail

FRANCO NEBAS
i raitim

OP-SISEN soka kompetisen long Igam Bareks long Lae i stat wantaim stail las wiken. Dispela kompetisen i mas stat tupela wik i go pinis tasol sampela hevi i bin kamap na em i stat las wik tasol.

Tonamen direkta Augustine Kori i tok planti man i bin kamap long lukim dispela nupela kompetisen. I gat 5-pela tim bilong ol man na 4-pela bilong meri i stap long dispela kompetisen.

Nem bilong ol tim i stap long dispela kompetisen em Igam Morans, Idols, Mix-mates, Kalibobo na A team.

Long Sarere, wanpela gutpela gem i bin kamap namel long Normil na Mix-mates. Dispela pilai i wanpela strongpela gem stret na tupela sait wantaim i soim tru ol sapota kain, stail bilong soka.

Long namba wan hap bilong pilai, Normil i brukim kiau. Dispela gol i bin kamap bihain long wanpela gutpela kona kik we i painim stret lek bilong Arnold Kavanamur long pairapim umben bilong Normil. Gol kipa long Mix-mates John Kuwra ino inap tru long stapim dispela bal ya.

Normil i gat planti sans tasol ol Mix-Mates i save bagarapim. Boi ross ya Bobby Kemkara i save rausim bal bipo long ol Normil i putim gol.

Ol lain husat i taitim bun long Normils em Peter Garry, Felix na Bobby na long sait bilong Mix-mates Scoth, Patrick, Arnold na Arthur Ramenga.

Long Sande, Igam Morans i bagarapim sindaun bilong Pikus 5-1.

Kori i tok amamas i go long mama asosiesen, Lahi long larim ol referi bilong ol long lukautim dispela gem.

Wok redi bilong Arafura gem i ran gut

WOK redi bilong namba faiv Arafura Gems long Darwin, Norten Teritori insait long Australia i wok long go het gut.

Insait long dispela gem, 5,000 manmeri long 25 kantri insait long Esia-Pasifik rijen bai stap long em. Dispela gem bai kamap long Me 22-29

Taim ol i statim long website long Ogas, planti kantri i soim laik na sampela bilong longwe hap olsem Puerto Rico na Amerika tu i laik stap insait long dispela gem.

Soka bilong ol meri em wanpela bilong ol dispela nupela gem we bai pulim planti manmeri. Dispela kompetisen bai givim sans long ol tim husat i no bin pilai long Wol Kap long soim stail bilong long dispela intanesenel resis.

Arafura Mail em wanpela nupela resis. Dispela resis i bin stat long 1997 we bin pulim 35 manmeri long ran. Husat tim i regista long Arafura Gem olsem pilaia, opisel, teknikal opisel na voluntia i ken stap insait long dispela resis. Bai i gat prais bilong ol man na meri wantaim long dispela Arafura Mail.

Sailing o resis bilong ol selbot tu bai kamap. Ol ogenaia bai bihain lo aninit long Intanesenel na Australia Yachting Federesen. Resis ya bai ran long de na bai i gat wanwan divisen olsem Laser, Raidai Laser na Tasar Sailing.

PNG bai salim planti man meri bilong pilai long kankain gem olsem athletes, osi ruls, basketbal, golf, hoki, lawn bowls, netbal, pistol, squash, swimming, tenis na volibal.

Ol narapela Pafisik kantri husat bai pilai em Cook Ailan (boksing na sofbal), Fiji (golf, hoki, swimming na tenis) na Tahiti (swimming). Sampela ol nesenel spoting bodi long Nu Silan na Nu Silan Difens Fos tu i soim laik long putim tim spot.

Ol Pasifik kantri i soim laik i luk olsem o i luk save long Saut pacifik Gem we bai kamap long guam i no long taim, na pastaim gem i save kamap gut taim ol i bin stat long 1991.

Ol manmeri bai gat sans long lukim ol gem long TV. Long 1997, samting olsem 81 milien pipel i wasim dispela Gems long TV.

Ol lain nogut bilong Goroka...



• Goroka men soka tim wantaim ol sapota bilong em bipo long ol i bin pilai agensim Mt Hagen 1 long hailans rijinel soka resis long Kundiawa. Tupela tim i kamap long fainel na Mt Hagen 1 i winim Goroka 3-1 na autim rijinel taitel. Foto: Sape Metta.

Nupela opisel bilong Is Nu Briten na Pot Mosbi

POT MOSBI Mens sofbal asosiesen nau i makim nupela opisel bilong ol long dispela wik.

Nupela presiden em Panuel Uralia husat i kisim ples bilong Robert Kaul. Uralia em wanpela strongpela sapota tru bilong Gazelle klap.

Namba tu bilong em Nick Tata, husat i papa bilong NGL klap. Tata i kisim ples bilong Henry Vue.

Albert Evald i holim yet posisen olsem sekretari na Camilius Kona i kisim ples bilong Harry Keket olsem tresera bilong asosiesen

Uralia i tok em i amamas long kisim wok presiden. Na namba wan wok bilong em long kamapim strongpela disiplin long sofbal fil. Em i no laik lukim ol pilaia i bagarapim nem bilong sofbal.

Em i tok em bai karim aut wok em olpela opisel i lusim. Em wantaim ol nupela eksekutiv bilong em bai pasim toktok long stretim sampela banis long Bisini oval. Las taim ol wok i kamap long Bisini em long 1991 long taim bilong Saut Pasifik Gems.

Uralia i tok olsem bikpela senta long kantri, Pot Mosbi i

mas karim gutpela nem long wok bilong sofbal

Em i tok amamas i go long ol klap long votim em na ol eksekutiv bilong em.

Presiden bilong PNG Sofbal Federesen Henry Kila i tok amamas long ol nupela opisel bilong Pot Mosbi Sofbal asosiesen.

Na long Is Nu Briten, ol opisel bilong ol klap i makim Elias Livuan olsem nupela presiden na Vin Tata olsem sinia vais presiden na Patrick Warangat olsem junia vais presiden.

Francis Rangattin i holim yet wok olsem sekretari na nupela

asisten bilong em Alois Johannes.

Derio Titi i kisim wok tresera na namba tu bilong em Elizabeth Tukar.

I gat tripela komiti em dro, teknikel na fanraising. Ol memba bilong dro komiti em Francis Rangattin, Jack Marita, Deriot Titi na Jack Woiwoi.

Teknikel komiti em Leo Duba, Arthur Kinakava na Christine Kinakava na ol fanraising komiti em Vin Tata, Elizabeth Tukar, na Alois Johannes.

Joe Meava em i pablisiti opisa bilong asosiesen.

Taurama Dragons sutim ol Bulldogs long tas ragbi

GORDON TAS RIPOT

LIONEL YOGOMIN i raitim

TUPELA brata Julius Krewanty na Alex Krewanty i bin go pas long gutpela win bilong Taurama Dragons insait long Gordon Tas Futbol las wik. Ol boi Dragons i autim Wards Bulldogs 10-6.

Dispela gem i bin wanpela gutpela stret long lukim. Tupela sait wantaim i kamapim strongpela gem.

Gutpela kik bilong tupela brata Julius na Alex i helpim tru Dragons long holim birua tim long eria bilong ol yet. Dragons i gat ol pilaia olsem Michael Bago, Ray Aukere, Jeffrey Eddie, Bravo Eddie, Mike Epu, Kevin Ketty na Warren Teno.

Dragons i namba wan long putim trai bihain long gutpela gem plen. Ol boi i wok long tromoi bal i go ikam na paulim stret ol Bulldogs.

Alex i statim wanpela gutpela mov na givim bal i go long Bago. Orait Bago i karim i go na trikim ol birua bilong em na setim Alex long go putim wanpela isi trai. Skoa bilong Dragons nau i sanap olsem 4-0.

Tasol ol fowat bilong Bulldogs i no wari. Steve Carter, Kondi Steven, Leslie Yapa, Kila Kome na Martin Wage tu i bekim bek kain gem bilong Dragons. Ol i wok long go pas long brukim difens na setim ol beklain pilaia bilong ol.

Henry Tarue, Felix Pagelio, Keith Puaria, Asi Vele na Robert Aua i stat long wokim nais liklik.

Aua i gat planti sans long putim trai tasol birua bilong em David Lem i save was gut na i no save givim em sans long ranawe na putim trai.

Bulldogs i bekim skoa taim Vele i katim wanpela bal we ol Dragons i laik pasim long birua na em i kisim na spit i go putim. Na wanpela pilaia i kisim konvesen na skoa i sanap 6-4.

Tasol Dragons i no wari. Fowat Epu i putim wanpela trai long skurim skoa i go long 10-6. Dispela trai i kamap bihain long gutpela pilai namel long Bravo Eddie husat i givim bal i go long Julius Krewanty na em i setim Epu.

Dispela skoa i sanap olsem inap haptaim.

Long namba tu hap, tupela tim wantaim i strong tru na i nogat wanpela trai i kamap ya.

Ol lain i pilai gut long Dragons em Julius, Alex, Eddie Bravo na Kevin Ketty na Carter i pilai strong stret long helpim Bulldogs.

Ol Skoa bilong ol arapela A gret gem i sanap olsem Sharks autim Storms 7-6, Bala Raiders dro wantaim Eels 4-all, Magpies nekim Warriors 14-8, Eagles autim Panthers 3-2, Steelers dro wantaim Rabbitoh 7-all na Blu Heelers i autim Tigers 13-7.

Warriors bai autim Panthers

MOA long tausen pipel bai kamap long fil taim Gordon Tas Futbol i statim namba 10 raun bilong em long dispela wiken.

Long Sande, Teal Rabbitohs bai winim GI Storms, na Eagles bai bungim ol boi Taurama bareks, Dragons na bikpela gem Flat Steelers bai salensim Blue Heelers.

Na long Sande, Sharks bai bungim ol Wards Bulldogs. Wanpela waitman i soim gutpela pasin long stap insait long dispela gem em Steve Carter. Carter bai poromanim Kondi Stevens long seken ro.

Erima Magpies bai winim Eels na Bala Raiders bai bungim Tigers.

Na long bikpela gem long Sande, Warriors bai salensim Panthers. Warriors i sindaun long namba 7 ples long poin lata na Panthers long 13 ples.

Sam Oea bilong Panthers i kambek gen na em bai poromanim Rodney Kove. Tupela pilaia bai setim ol fowat bilong ol olsem Eugene Orea na Wally Pap na Mikes Joe.

Warriors tu bai tingting long wan na bai i no inap larim Panthers i win isi.

Ol pilaia olsem Pineri Tutumali, Frank Luvi, Rex Saun na Segewa bai go pas long beklain ya. Na long fowat ol pilaia olsem Joe Rova, Tigat, Joe Taumick na Geno Kolom tu bai sambai tasol long beklain bilong ol.

Warriors i gat gutpela stail long pilai na bai winim isi tru.

TOYOTA

HILUX

KRISMAS SPESEL

Baim wanpela nupela Toyota Hilux 2WD singel o dabel keb model tude na yu bai draiv i go wantaim bikpela bokis kaikai bilong Krismas we yu na ol wantok bilong yu inap selebretim Krismas. Hariap! Taim dispela opa i stap yet!

AGC FAINENS I REDI I STAP LONG PLES BILONG BAIM KAR. SAPOS YU GAT LAIK LONG KISIM SPECEL HELPIM LONG MONI.



AGC (Pacific) Limited.



HAMAMAS GUT LONG

MERI KRISMAS DRAIV ISI



HILUX 2WD



HO HO HO

TOYOTA HILUX

2WD SINGEL KEB
2.4 DIESEL PAWA

KRISMAS SPESEL

K26,999

DRAIV I GO WANTAIM DISPELA PRAIS

I KEN STAP TASOL INAP LONG FONDE 24th DISEMBA, 1998.

TOYOTA HILUX

2WD DABEL KEB
2.4 DIESEL PAWA

KRISMAS SPESEL

K33,989

DRAIV I GO WANTAIM DISPELA PRAIS

HARIAP! DISPELA OFA BAI INO INAP KAMBEK GEN!

TRAIPELA BOKIS KAIKAI BILONG KRISMAS I GAT:

HAP (1/2) TON 10KG BEK TRUKAI RAIS, WANTAIM 100 BESTA TIN PIS NA 100 TIN OX & PAM KON BIF. (YU INAP KISIM FRI OLGETA)



ISTAP OLGETA HAP LONG ELA MOTORS LONG HAP YU ISTAP LONG EM!
PORT MORESBY PH 3229400 • LAE 4722322 • RABAU 9821988 • KOKOPO 9829100
MADANG 8522188 • GOROKA 7321844 • MT HAGEN 5421888 • WEWAK 8562255
KAVIENG 9842132 • KIMBE 9835155 • TABUBIL 5489060 • VANIMO 8571254
PORGERA 5479367 • KUTUBU 5496685 • BUKA 9839915 • LIHIR 9864099
ALOTAU 6410100

Ela Motors

Wansolwara nius

Honiara, Solomon Ailans

Guadalkanal pipel singaut kompensesen

Ol pipel long Guadalkanal insait long Solomon Ailan i laikim gavman long peim planti milien dola kompensesen i go long ol long ol kain disisen na lo we em bin fosim long ol pipel.

Primia Ezekiel Alebua i tok provins i laikim \$25 milien long mani bilong Solomons olsem kompensesen long ol pipel bilong Guadalkanal we ol bin kilim dai ol long nogat gutpela as.

Ol i laikim tu gavman long baim renmani long graun we Honiara taun i sanap long en. Mak long renpeimen ol i askim long en long wan wan yia em \$50 long wanwan man, meri na pikinini long Solomon Ailans. Lukluk long populesen bilong Solomon Ailans em 400,000, gavman inap long peim \$20 milien long olgeta yia olsem mani long peim graun we Honiara taun i sanap long en.

Gavman glasim ol aplikesen long kirapim televisen stesin long kantri

Gavman bilong Solomon Ailans i wok long kisim ol aplikesen long ol grup insait long kantri na ausait husat i laik statim namba wan televisen stesen insait long kantri.

Siaman bilong Televisen Bod Walter Ramo i tok em i wok long glasim na skelim ol aplikesen nau long lukim olsem ol samting i go gut tasol. Ol aplikesn long kirapim televisen projek bai pas long dispela mun.

Mista Ramo i tok ol lain i aplai long dispela projek i mas bihainim ol gaidlain bipo ol i kisim wanpela long karimaüt projek ya.

Bod i laikim projek long stat kwiktam bikos bikpela taim i lus pinis long en.

Pablik Sevans pe bai daun yet

Ol pablik sevans long Solomon Ailan bai no inap long kisim peirais long 1999.

Praim Minista na ekting Fainens Minista Bartholomeo Ulufa'alu i tok gavman na kantri i wok long bungim hevi long mani na olsem bai i no inap long peim moa mani long ol woklain bilong em.

Em i tok sapos gavman i laik apim pe bilong ol pablik sevans, em i min olsem em mas kisim moa takis long praivet sekta na gavman i no laik mekim disepla bikos long hatpela taim we olgeta pipel i bungim wantaim mani.

Praim Minista i tok ol stetuteri bodi na ol arapela gavman ejensi bai bihainim wankain samting.

Gavman wari long bagarap maining projek kamapim

Gavman bilong Solomon Ailans i wari long bagarap we nupela gol main ol i opim tasol i ken kamapim.

Olsem na em i putim strongpela tok lukaut long givim mekim save long ol lain i no bihainim gutpela rot na kamapim bagarap long graun, bus, wara na ol arapela samting klostu long main eria.

Gavman i mekim dispela toktok bihain long ol pipel i stap klostu long Gol Rij main we Australia i papa long en, i bin painim planti pis i dai long wara klostu long main. Sampela i tok ol i sik bihain ol i yusim wara.

Ol ripot i tok sampela lain i bin karimaüt ol tes na ol i painim strongpela posin kemikol marasin ol i kolim long saiaid i stap long wara. Dispela posin kemikol em ol i yusim long wasim gol long em. Tasol level bilong kemikol ya i no bikpela na em no nap long kamapim bagarap, ripot i tok ol toktok long Wol Helt Ogenaisesen i tok.

Gavman bilong Solomon Ailans i tokim Ross maining we i save operetim Gol Rij main long stretim hevi ya na lukim olsem em no ken kamap moa.

Praim Minista Ulufa'alu i tok gavman bilong em i no laikim ol main i kamapim birua na bagarap long ol pipel.

Apia, Westen Samoa

Bisnisman kamap konsal

Ol i makim wanpela bisnisman bilong Samoa Eddie Wilson olsem nupela Honoreri Konsal bilong Ripablik bilong Korea long Samoa.

Mista Wolson em i manesing Dairekta bilong Willex Kakau na Kokonas Prodak kampani. Em bin kisim pas long toksave long dispela wok long Dairekta bilong Korea tred Komisnin, Joe-Ho.

Mista Wilson bai tekova olsem Honoreri Konsal long Garry Carruthers husat i bin holim dispela wok long 10-pela krismas pinis.

Kiribati

Tito winim bek sia olsem Presiden

Teuroro Tito i kisim bek sia olsem Presiden bilong Kiribati bihainim palamenter i ileksen kantri i bin holim long mun Oktoba.

Mista Tito i bin win long bikpela mak abrusim 52 pesen long olgeta vot na win long 16-pela long 23 ilektoret long Kiribati.

Narapela tupela kendidet husat i bin resis long sia bilong presiden em long veteran politisen Harry Tong husat i bin kisim 45 pesen vot na win long sevenpela ilektoret taim Amberiti Nikora i bin pulim tasol tu pesen long ol vot.

Nuku'Alofa, Tonga

Ol pis dai long Fanga'uta lagun

Ministri bilong Fiseris long Tonga i tok sampela asua i kamapim dai bilong planti handret ol pis long Fanga'uta Lagun long Tongatapu las wik.

Seketeri bilong Fiseris Mista Akau'ola i tok dipatmen bilong em i bin karimaüt ol tes na i soim olsem Lagun i bin hot tru wantaim mak i go antap long 32 digris selsius na dispela i hot tumas long lagun.

Bikpela san we i bin kamap long kantri na tuhat wantaim i mas bagarapim ol pis, ripot i tok.

Mista Akau'ola i tok em i no klia tumas tasol nogut i gat sampela samting i kamap na ministri i misim.

Planti handret famili i save kisim kaikai long dispela lagun.

Fiji

Wok mani long Fiji no strong

Risev beng bilong Fiji i tok ikonomi o wok mani bilong kantri i no stap strong na em bai i stap olsem inap long namel bilong neks yia.

Long Novemba ripot beng i tok ren i wok long pondaun nau i helpim sugaken indastri we hevi bilong bikpela san long las yia i bin bagarapim.

Gutpela taim i kamapim gut wok long sugaken indastri na olsem ol saveman i ting olsem wok mani bilong kantri long 1999 bai go gut.

Pot Villa, Vanuatu

Olimpik Tos bai kam olsem long Vanuatu

Vanuatu i laki bikos em bai gat sans long lukim Olimpik Tos we ol bai yusim long opisel opening bilong bikpela Olimpik Gems pilai long Sidni Australia long yia 2000.

Ol ripot i tok taim ol i karim dispela tos i go long Australia, ol bai stop long Pot Villa long sevenpela awa. Dispela em long Me 29, yia 2000.

Praim Minista Donald Kalpokas i bin tok long opisel lonsing bilong Olimpik Tos long Pot Villa.

Em i tok kamap bilong Olimpik Tos long Vanuatu em i bikpela samting long histri bilong kantri na tu long Pasifik rijen bikos dispela em i namba wan taim long em (Tos) i kam olsem.

Mista Kalpokas i tokim Vanuatu Amata Spots na Nesenel Olimpik Komiti eksekutiv olsemgavman bai i mekim olgeta samting long givim gutpela sekyuriti long sevenpela awa Tos i stap long hap.

Ol Gavman Dipatman no nap peim VAT takis

Ol Gavman Dipatmen long Vanuatu bai i no inap peim Velu Eded Takis(VAT) inap long mun Desemba neks yia.

Ol ripot i tok Palamen i oraitim wanpela Bil longkamapim dispela senis. Gavman i tok klia olsem em i wokim dispela samting long larim VAT opis i sindaun gut pastaim long larim ol woklain i kisim gutpela trening.

Wol nius Tim Spirit



• Ol yangpela pikinini bilong Taiwan i stap insait long de bilong pilai long taipei Spot stedium

Novemba 12 olgeta yia em i taim bilong bikpela pilai ron. Grup i win i kisim US\$6,000 olsem prais mani bilong ol.

Tupela bikpela atis i sanap wantaim

Biknem atis long wol bilong kantri Spein, Pablo Picasso i sanap wantaim Chang Dai-Chen wanpela top atis bilong Taiwan. Ol bin kisim piksa long 1956 long praivet hom bilong Picasso long Cannes, Frans.

Long mun Oktoba, Taiwan, Ripablik ov Saina i bin holim wanpela so ol bin kolim long "Wol ov Picasso long biksiti, Taipei.

Moa long 5,000 pipel i bin pulapim haus long namba wan de bilong so na ol i kam long olgeta hap bilong kantri, Hong Kong na Japan.

Deputi Dairekta bilong musium i tok dispela so em i bikpela samting tru long Taiwan insait long las 100 yias.

So bai i go het yet inap Janueri neks yia.

Insait long tripela wik, moa long 70,000 pipel i bin stap long so. Samting olsem 74 peinting bilong Picasso i stap long so long Taipei nau. Pikinini bilong Picasso, Maya i bin opism so. Maski Picasso i bin dai long 1973, biknem na wok bilong em i stap antap yet na dispela bai go yet abrusim yia 2000.



• Pikinini bilong Picasso, Maya i toktok long ol ripota longlaip bilong papa bilong em.

Glasing gut wok bilong Foren Afeas Dipatmen

MI WANPELA mangi husat i bin ritim Pos Koria niuspepa long Fraide Novemba 30, na mi no amamas long pasin wanpela sinia opisa bilong Foren Afeas Dipatmen i wokim long wanpela memba bilong ol Cruzman famili. Dispela pasin mi bilip i no inap kamap long kain opis.

Dispela kain pasin tasol ol bikpela save man bilong Papua

Niugini i save wokim na kantri bilong yumi i bagarap.

Moa yet, mi laik tok tenkyu tu i go long bos bilong ol plisman John Wakon husat i tokaut pinis long niuspepa olsem em bai mekim wok painim i go insait long pasin dispela wokman insait long Foren Afeas Dipatmen i mekim. Mi laikim ol mas rausim dispela kain man

long kain opis.

Laspela em traipela sori bilong mi i go long ol Cruzman famili. Mi laikim Praim Minista i mas wokim gutpela disisen long famili bilong Crusman.

**KAHUKAVO-ATAO
MOSBI**

Ol lida bilong Morobe mas stretim provins

MI LUKIM pas bilong brata Nelson Martin i kamap long Wantok Niuspepa long Septemba 10, 1998. Brata tok bilong yu na piksa yu putim kamap long dispela det, em i tru olgeta.

Nau i kam inap klostu long 18-pela mun, na tok bilong yu, em i tru tumas. Mi tu mi save i go i kam long Lae. Na mi lukim olgeta stoa we bipo, Saina i save papa long em, em nau i kamap seken han stoa.

Mi sori tumas long lukim dispela bikos Morobe Provins em namba tu siti bilong Papua Niugini, na tu i gat 10-pela nesenol memba bilong palamen.

Brata Nelson Martin mi lukim pas bilong yu na mi sem pipia gut tru long wanem olgeta stoa long top taun em seken han i pulap tru. Na sapos yu go long Mosbi siti em TST, Papindo, na ol arapela Saina stoa em pulap na pulap tru. Tasol seken han kolos em bai yu lukim tasol long maket ples.

Olsem wanem, memba bilong Lae open yu lukim tu dispela samting o nogat? Mi ting sapos yu save ritim Wantok Niuspepa, ating moabeta yu toktok wantaim semba ov komes long i noken larim planti seken han i pulap long Lae.

Mipela pikinini Morobe i stap long Mosbi i lukim na sem pipia pinis olsem na plis mekim sampela toktok.

Namba wan bagarap bilong Lae siti em pot hol. Namba tu bagarap long seken han stoa. Plis ol brata na susa bilong Morobe, bikpela mani i stap. Tasol ol membas bilong yumi i no inap mekim sampela wok long em. Harim gut, taim bilong bagarap long Aitape, Gavana bilong Morobe i no westim wanpela minist o seken. Em tokim Lae Siti Atoriti long helpim ol pipel bilong Aitape long K10,000.00. Memba bilong Bulolo na deputi lida bilong Pangu Pati i givim K5,000.00 i go tu long dispela bagarap bilong Wes Sepik.

Na olsem wanem na Gavana i no luksave long Lae siti yet, na em i givim bikpela mani olsem i go aut long provins. Inap Gavana na Lae open memba, Bart Philemon lukim na bekim na tok save long pipel bilong Morobe?

**MISTA SOKA WAMI
POT MOSBI**

Sapos yu laik salim pas bilong yu, salim i kam long dispela adres:

**EDITA
WANTOK NIUSPEPA
PO BOX 1982
BOROKO**

■ Yu mas putim trupela nem long pas bilong yu.

Plismanmeri mas waswas na werim yunifom

MI WANPELA grasrut mangi.

Mi i no save wanbel long standat bilong dresing bilong ol nupela plisman na meri wantaim.

Mi bin lukim planti plisman na meri ol i no save waswas na ol i no save wasim ol yunipom bilong ol tu.

Ol i wok long gavman olsem na ol i mas dres gut long ai bilong pipel. Tasol nogat mi bin lukim buai spet

antap long yunipom na smel nogut.

Sapos yu wanpela bilong dispela kain plisman o meri plis senisim pasin bikos nogut ol pipel bilong PNG bai lap long yupela.

Em tasol na husat yu laik autim bel hevi bilong yu plis rait i kam long *Wantok Niuspepa*.

**UVE ITAO
MOSBI**

Gavman i mas luksave long hevi bilong ol pipel bilong Manam



Sampela mama na pikinini bilong Manam ailan insait long Madang Provins husat i stap long Mirap, i go sindaun long rot sait maket long Mirap na salim kulau, donat na ol arapela kaikai bilong kisim mani na lukautim famili bilong ol. Long dispela taim tu, Manam i paia na ol pipel bilong Manam i kisim ol samting na ranawe i go long Bogia na arapela hap bilong Madang Provins. Gavman i mas luksave long hevi bilong ol pipel bilong Manam na stretim hevi bilong ol kwik.

Poto na stori i kam long Wenceslaus Magun

Wewak nogat rispek long Momase Soka Tonamen

MI WANPELA mangi Sepik i kam i stap wok long Mosbi siti. Mi i gat wanpela komplem long mekim.

Edita, komplem mi laik mekim em, Momase Soka Tonamen ol i wokim long Wewak, ESP. Em ol wokim long wiken 24-25 na 26 em long mun Oktoba.

Mi yet olsem mangi Sepik i harim na ske-

lim dispela pasin ol mangi long Wewak i mekim i no gutpela pasin na nogat rispek long arapela lain.

Dispela pilai em namel long yumi yet Momase. Bilong wanem yupela mekim olsem?

Ol mangi long Wewak wokim rabis pasin stret na tu yupela yet i traim long putim nem bilong Sepik i go daun. Traim na tingim

yumi yet Momase mas wokbung wantaim.

Mi mangi Sepik i harim dispela toktok na mekim mi sem.

Ol mangi Momase husat bilong yupela i gat gutpela o nogat tingting long sapotim dispela hap pas em open long yu.

**KUYAYAC DODO
POT MOSBI**

Enga em i nambawan provins long Papua Niugini

MI LAIK sapotim Gavana Peter Ipatas long toktok bilong em i bin kamap long Wantok niuspepa namba 1220.

Ol pipel bilong Enga ol i no long na i save kirap pait nating na kilim ol man i dai. Nogat. Taim ol i pipel i pait namel long ol yet, ol i save mekim pasin moka o sigan na wanbel na hringim bel isi bek.

Pasin bilong laikim narapela na sekan na hamamas em i stap long Enga. Sapos yu stap wantaim wanpela man long Enga bai yu kisim

olgeta samting isi. Long hailens i gat faivpela provins tasol long pasin bilong laikim narapela narapela na sekan na givim rispek na hamamas em i save kamap ples klia long Enga.

Tenkyu tru na bikpela hamamas i go long *Wantok Niuspepa* bilong PNG stret.

**Epetami Ango
Sirunki Tabubik
WABAG**

Ol memba hangre long pawa na mani

MI WANPELA grasrut man long ples. Mi laik autim wari bilong mi long Wantok niuspepa bai ol arapela grasrut olsem mi yet i ken lukim.

Wari bilong mi i go olsem. Yumi grasrut manmeri long ples yumi save pilim pen na karim hevi wantaim. Yumi save givim vot na dispela i save kamapim ol memba i go long palamen. Ol i kamap bikman na ol i givim bak-sait long yumi ol lain long ples. Olgeta promis bilong ol i no save kamap. Ol i win pinis yumi no lukim ol moa long ples. Ol pilai ap long mani na gutpela kaikai ol i stap olsem long heven.

Ol i no sot long wanpela samting. Pipia maus bilong yumi kamapim ol bikman. Nau ol i bagarapim yumi pinis na yumi bai i dai nabaut olsem ol pik na dok. Ol i go kamap mani man long han bilong yumi ol pipel long ples.

Nau yet yumi harim

kainkain nius i kamap long palamen we ol memba i pait long pawa. Ol i no pait long yumi. Taim ol lain long Gavman i pasim tok long wanpela bil olsem Veliu Eded Takis o VAT olgeta memba long Gavman sait i vot long en. Wankain long 1999 baset na ol arapela bikpela toktok bilong kantri.

Moa yet Gavman i givim ol memba moa mani insait long Rurel Eksen Progrem i go antap long K1 milion long wan wan yia. Mi no save sapos ol memba bai yusim gut dispela mani long bringim sevis i kam long mipela long ples.

Mi laik save tu mani bilong PNG i go we na Gavman oltaim i save tok i nogat mani. Plis inap Gavman tokaut long mipela ol grasrut dispela samting. Em tasol na mi bai amamas long lukim sapot o egens bilong pas bilong mi.

**Jack Walne
Nipa**



PNG HIT PARADE

1998

Sponsors -
TRADEWINDS

W/B	LW	T/W	SONGS	ARTISTS
3	2	1	Madang	Demas Saul
11	7	2	Lutu Na Yakava	Kabani
1	1	3	Boen Sarere	Feedback
20	12	4	Meri Ailan	Demas Saul
4	5	5	Mighty Love	Kool Roots
6	6	6	Rumarua Te Mou'a	New Generation
14	9	7	Kekeni	Noel Asi
2	3	8	Sore Daddy	Patti Doi
5	4	9	Samarana	Valdoro
12	8	10	Wairaone	Kevin Hoire
7	11	11	Amari Ute	Patti Doi
0	20	12	Hard Luck Night	Unisound
9	13	13	Hau Bai Yu Save	Lista
10	14	14	ToDes	Quakes
15	15	15(4)	Aitape Mi Wari	Kabu Rita
8	10	16	Fenua No Te Penu	New Generation
16	16	17	Takere Medley	Original Sirois
17	17	18	Rabaul	Patti Doi
19	19	19 (7)	Sissano	John Wong
18	18	20	Kalo Beach	

IN: NIL

OUT: NIL



PNG FM PTY. LTD.
Trading as
NAU FM
and
YUMI FM

P.O. Box 774,
Port Moresby
Papua New Guinea
Ph: (675) 320 1996
Fax: (675) 320 1995

Lus tingting i save kamapim hevi



• Ol yangpela pikinini i mas kisim skul bilong holim samting long het na tingim. Dispela inap helpim ol long tingim gut samting na mekim long helpim ol

MASTA WAI i raitim

Wanpela waitman bilong Amerika i bin tokim ol tisa long las wik olsem, i gat 5-pela bikpela rot bilong bihainim taim yumi skulim ol pikinini long skul.

Ol dispela 5-pela rot em, pasin bilong laikim buk na ritim buk, pasin bilong harim toktok na harim gut, pasin bilong kisim samting long tingting na tingim gut, pasin bilong toktok na toktok klia na gutpela pasin bilong pikinini i mas kamap long wokabaut na sindaun bilong em long skul na long haus na olgeta de.

Dispela waitman i tok sapos ol tisa i sanap strong na skulim ol pikinini long dispela samting, bai ol pikinini i ken kamap gutpela pikinini long skul, gutpela pikinini long famili, komyuniti na kantri na ol i ken mekim ol gutpela gutpela wok na ol samting.

I no nupela

Mi no nupela man long Mosbi tasol namba wan taim tru mi paul long kisim bas i go long wok long Mande moning.

wanem samting bai mi mekim long wok long dispela wik. Mi wok long tingting planti long wanem gutpela wok mi mas mekim long dispela wik.

Na tu mi wok long tingting planti long wanem kain wok bai mi skelim wantaim ol wanwok bilong mi long mipela olgeta i ken wok wantaim long kamapim kaikai bilong wok bilong mipela long dispela wik.

Wantaim ol dispela tingting, mi mas i go kisim liklik pikinini bilong mi long skul long belo bikos em bai pinis skul.

Ol kain kain toktok na tingting olsem i mekim na het bilong i lus olgeta na taim bas namba 7 i kam, mi tromoi han tasol na bas i kam stop. Mi kalap na sindaun gut tru i kam long Waigani stetium na bas i kisim narapela rot na mi kirap nogut tru.

Luksave long bas

Taim mi luksave olsem bas i abrusim rot mi laik go long en, mi save olsem mi mas kalap long rong bas.

Tasol mi pret long tokaut bikos mi bai sem long ai bilong olgeta manmeri long bas olsem na mi sindaun tasol i nap bas i go stop long Godens maket na mi kalap i go daun.

Laki tru mi gat 30 toea i stap long mi olsem na mi go eskus long boskru bilong wanpela bas na em i orait tasol na mi kalap i go long wok.

Mi wok long tingim olgeta dispela samting na mi tingim gen, wanem as tru na mi wokim dispela asua.

Mi stap klostu 5-pela krimas long Mosbi na mi no inap paul long wanpela samting.

Mi laik tokaut long pasin bilong skelim samting long tingting na mekim i kamap.

lusim mani long haus na ting ol i karim wantaim i go tasol nogat. Na ol bai hangre long rot o nogat mani bilong baim PMV long go bek long haus na ol bai wokabaut. Bikos ol i lusim tingting.

Wanpela taim wanpela ovasis famili i bin laik go bek long kantri bilong ol na ol i hariap hairap long bungim ol kago na ol i tekov i go bek.

Taim ol i ron antap long balus na mama i bikmaus na askim papa, yumi kisim olgeta samting i kam o nogat? papa i tok, yes, olgeta kago i kam.

Mi salim ka, olgeta dok em mi givim long ol lain long narapela haus, ol bikpela masin em yumi salim pinis na sampela kago em yumi lusim wantaim haus boi.

Na mama i kirap na askim, na junia i kalap wantaim yumi long balus tu o nogat?.

Taim papa i harim olsem, em i nogat toktok nau bikos tupela i lusim wanpela pikinini man bilong tupela i stap bek long Mosbi na ol i go bek long kantri bilong ol.

Pasin bilong lusim tingting long samting i save mekim olgeta taim o yu save lukim na holim olgeta taim i nogat gutpela as tru long yu bai lusim tingting.

Mi askim, husat man o meri i save lusim tingting long kaikai na slip nating bikos em i no tingim?

O husat i save lusim tingting long go long toilet bikos em i no tingim long go long toilet?.

Lusim tingting em wanpela bikpela samting we i save bagarapim planti gutpela wok, planti samting we i laik kamap i no save kamap bikos man i lus tingting long mekim, man i ken dai bikos em i lusim tingting long bihainim toktok bilong

“Mi wok long tingim olgeta dispela samting na mi tingim gen, wanem as tru na mi wokim dispela asua”

Yumi save olsem bipo long yu mekim wanpela samting, yu mas skelim long tingting bilong yu pastaim na sapos yu laikim o wanbel long en, orait han bilong yu bai kisim o tasim.

Tingting bilong yu bai wanbel na em i min olsem olgeta bodi na laik bilong yu tu i laikim olsem na han bilong yu bai kisim long yu holim na putim long maus, o poket, o long skin bilong yu o yu mekim wok i kamap.

Plantai taim sampela manmeri i save tok, mi lusim tingting. Sampela taim ol i ken

dokta na planti arapela samting i ken go nogut bikos man i no tingim.

Lusim tingting em wanpela bikpela hevi olsem na rot i mas kamap nau long stretim dispela hevi bai olgeta manmeri bilong kantri i ken kamap wantaim gutpela tingting bilong tingim na mekim samting i go stret.

Olsem na dispela waitman i tok stret, ol pikinini i mas kisim skul nau long tingim samting na putim long het na bihainim.

Wantok i ken toktok na mekim kainkain stail

SAPE METTA i raitim

WANTOK em husat, o em wanem samting? Nogut yu ting em i wanpela man wankain olsem yumi. Sapos yu i bin lukim pinis long ol televisen o muvi, harim long redio na ritim long niuspepa na megesin olsem sampela pisin i save toktok wankain olsem ol man, noken ting olsem dispela em ol i giaman.

Dispela em i tru bikos ol dispela pisin i ken toktok, em sapos yumi lainim na skulim ol long toktok.

Mi i no toktok long ol kainkain pisin. Mi i toktok long ol pisin we ol waitman long tok Inglis ol i save kolim perot (parrot). I no olgeta perot pisin i save long toktok.

Planti ol i wait na i raun nabaut i go i kam long bikbus. Na sampela i save stap long banis, na lainim ol long toktok, em ol dispela pisin tasol i ken toktok, long wanem ol man i skulim na lainim ol long toktok.

Na ol perot pisin ya i ken toktok long kainkain tokples. Maski tok Inglis, Pisin, Motu na ol arapela tokples, ol perot pisin ya i ken mekim tasol.

Long mekim dispela hap tok klia, sapos wanpela perot pisin i kisim skul na lainim long tok pisin, em dispela tok pisin tasol em bai i ken yusim long toktok.

Sapos ol i lain tok Inglis, tok Inglis tasol em bai ol i yusim. Sapos ol i lainim tupela tok wantaim, em bai ol i ken mekim. Na tu wankain long ol arapela tok ples.

Insait long olgeta hap bilong wol, i gat planti kainkain perot pisin i stap. Na planti long ol husat ol man i holim na lainim ol long toktok, ol i save gut long toktok na i ken stori wantaim ol manmeri na pikinini long wanwan tokples bilong ol yet.

Long Seigu Kona arere tasol long Goroka taun insait long Isten Hailans, mi i bin kalap nogut taim wanpela perot pisin i bin singaut long mi.

Dispela perot pisin i save i stap na raun long dispela hap kona inap 8-pela krismas olgeta bihain long ol i bin kisim em long bikbus bilong Okapa. Nem bilong dispela perot pisin em pren na em i no inap long opim tupela win bilong en na flai i go i kam.

Em i save wokabaut na kalap kalap i go i kam na em i kamap namba wan pren bilong olgeta lain manmeri na pikinini long dispela hap kona. Long dispela as ol lain ya i kolim nem bilong em Wantok.

Taim ol i kolim nem bilong em, em i save bekim na tok wantok i go bek long husat i kolim nem bilong en.

Dispela perot pisin i save long lap, danis, kros na paitbek, wisel na long taim bilong sios sevis, em

i save tu long lotu na wosip long taim bilong lotu.

Na em i save gut tru long nem bilong olgeta lain man, meri na pikinini husat i save i stap klostu wantaim em long Seigu Kona. Feveret patna na poro bilong wantok em Anna 'Anapex' Koiyase. Anapex i gat wankain krismas olsem Wantok na tupela i save pas gut tru na i stap.

Long dispela as Wantok i save gut tru long nem bilong Anapex.

Em i wanpela stail na eksen perot pisin. Insait yet long Seigu Kona i gat wanpela pentikostol sios.

Long taim ol man na meri i save i go na bung long lotu na wosip. Wantok tu i save kalap i go na wosip wantaim ol.

Na taim ol manmeri i save i go insait tru long lotu na wosip na mekim planti nois, Wantok tu bai mekim wankain pasin. Taim ol i mekim kainkain tok ples, Wantok tu bai tok ples.

long wanpela pusi na pusi ya i ranim em.

Tupela i raunim wanpela haus i go longpela taim na Wantok i sotwin. Em i stap na tanim na lukluk stret i go long ai bilong pusi na i tok, 'mi sotwin na mi stop nau.

Kam na kilim mi i dai'. Taim pusi i harim dispela hap tok, em i givap na ronawe i go hait.

Dispela samting em planti ol pikinini i witnesim na ol i tok, tru tumas wantok i mekim dispela tok

long ol manmeri husat i save i go na waswas long batrum.

Na batrum tu ya, yu save hom med wan ya, oslem na i nogat het. Em i op nating na wantok i save spai na lukim ol manmeri i go insait na waswas.

Anapex i tok taim ol manmeri i pasim laplap, putim pens, trausis na sket na waswas, wantok i save sindaun isi tru na lukluk i stap. Tasol taim ol i rausim olgeta samting na waswas as nating - pisin nogut ya i save singaut na lap indai stret.

Anapex i tok taim em i save putim on redio o kaset na musik i pairap, wantok i save danis long stail bilong em yet, na taim yu lukim em i mekim ol eksen daunis bilong em, bai yu lap i go i go na bai yu i ken traute tu ya.

Yumi save gut olsem ol pisin i save kaikaim ol pikinini bilong diwai, ol prut nabaut na ol binatang bilong graun, diwai, gros na bikbus. Tasol wantok em rais na tinpis, kaukai, kon, tapiok, taro, lemflaps, kakaruk, pik na ol arapela abus - em ol bun stret bilong wantok.

Anapex i tok sapos yu kaikai wanpela gutpela abus, na Wantok i luksave na i kam hangamap klostu long yu, na yu i no givim hap long em, sori tumas, yu mas lukaut bikos em bai straik na kros pait long yu.

Wantok i gat planti ol arapela stail, pasin na eksen we mi i no save tumas long tokaut.

Wantok i save long mekim tripela tokples. Tripela tokples ya em Inglis, tok pasin na tokples Keiyagana long hapsait bilong Okapa. Sapos yu laik save moa long Wantok, yu yet go na lukim, long Seigu Kona.

Wantok bai givim yu gut wan na bai yu i ken kalap nogut. Na taim yu guria na seksek i stap, tru tumas Wantok, dispela pisin nogut ya i ken singaut antap long yu na tok "yu mas paul ya". Dispela em i namba wan hap tok bilong em stret.

Wanpela wik bihain long Wantok niuspepa i raitim dispela stori, Wantok i bin lus. Na papa bilong pisin ya.

Koiyase i bilip olsem ol mangi long Seigu Kona i mas stilim wantok na karim em i go long taun na salim long ol manmeri long hap.

Poro bilong Wantok - Anapex i wari na krai i stap na Koiyase tu i gat bikpela wari tru long dispela pisin.

Nau yet Koiyase i apil i go long husat man o meri i baim dispela pisin i mas karim i kam bek long em.

Koiyase bai givim sampela prais mani long husat man o meri i bringim Wantok i kam bek long em long Seigu Kona.



• Wantok (pisin) i kis long poroman bilong em Anapex. Wantok i save mekim planti samting wankain olsem ol manmeri i mekim. Foto: Sape Metta.

Na taim Anapex i save tok 'Uma' (kis) na i kamautim tan bilong em na soim wantok, em i save kisim filings na kis long tan bilong Anapex.

Sapos mama bilong Anapex i singautim em, Wantok tu bai sin-

Ol bai mekim olsem i go, i go na taim ol i kisim taim na pundaun long graun na tani, tanim i go i kam, pisin nogut ya tu bai pundaun na tanim tanim i go i kam.

pinis we i klia tru na olgeta mangi ya i harim na ol i kalap nogut.

Na taim Wantok i askim Anapex, wanem samting moa poro bilong en, Wantok i save mekim.

“Sapos mama bilong Anapex i singautim em, Wantok tu bai singautim Anapex”

gautim Anapex. Na sapos husat i wisel o lap, wantok tu bai mekim wankain pasin.

Taim ol pikinini i pilai pilai nabaut na lap i go i kam, wantok tu bai pilai na lap nabaut i go i kam na mekim stret wankain pasin em ol pikinini i save mekim.

Na taim ol i sotwin na fletaut, perot ya tu bai fletaut.

Sampela taim, taim Wantok i mekim olsem, planti manmeri i save lusim lotu na lukluk long ol kainkain eksen na stail bilong em. Narapela taim Wantok i bin kros

Na Anapex i tok, wantok i no inap long flai tasol em i ken yusim tupela lek na maus bilong em long i go antap long ol diwai.

Em i tok klostu long haus bilong ol i gat planti ol diwai i stap na wantok i save i go antap na spai

355ml

Enjoy

Coca-Cola



90t

EVERYWHERE



90t Tasol

Don't Pay Any More!

KANAGE

"Em
natu,
narapela wik
bilang mi ken"



Wanpela Sande Kanage go lotu long St. Josephs haus lotu long Is Boroko. Orait ol i lotu i go na olgeta i sanap long taim bilong harim gutnius. Na wanpela mama i bin sindaun fran stret long Kanage. Na taim mama ia i sanap em i no stretim laplap bilong em olsem na hap laplap long beksait i bin go insait na pas long as bilong em. Kanage lukim na i no stret olsem na em kirap putim han i go na pulim aut laplap ia na stretim. Mama i tanim na krosim Kanage isi tasol. "Yu painim wok o?" Kanage tu i bekim isi tasol. "Sori sis mi stretim tasol ia." Mama belhat tokim Kanage. "Em as bilong yu o as bilong mi?" Turangu Kanage i sem nogut tru na daunim het tasol. Bihain ol i lotu i go na ol i sanap gen. Dispela taim mama i save pinis na em i stretim gut laplap bilong em taim em i sanap. Kwiktai tru Kanage putim han i go na suvim laplap i go bek insait long as bilong mama. Mama i kirap nogut na singaut antap long Kanage. "Yu kam lotu o yu kam wokim narapela samting?" Kanage kirap bekim. "Pastaim mi stretim na yu kros olsem na nau mi putim bek i go insait." Mama nogat toktok.

JOE SIPY WAIGANI, NCD.

Kanage wantaim wanpela lapun Markham kros tasol long tokpisin na tupela i no save long tok Inglis liklik. Tupela kros long Lae maket na planti manmeri tru i kam bung na lukim tupela. Tupela kros i go i go na lapun Markham ya bel hat na tokim Kanage olsem yu laikim mi tok nogutim yu long tok Inglis na Kanage bekim olsem sapos yu save long Inglis orait yu ken tok nogutim long mi. Lapun belhat na go klostu long Kanage na putim pes klostu long pes bilong Kanage na tokim em olsem. Yu blari my girl friend you. Kanage ting em tok nogut na em sem pipia stret long wanem em lukim planti manmeri i lap long tupela. Tasol Kanage i no save long Inglis olsem na em i no save long mining bilong dispela tok Kanage sem na em pasim maus na daunim het na lus nating.

IAN MAWAI KAIAPIT

Wanpela nait Kanage spak nogut tru na em go silip. Taim em silip i stap em kisim wanpela driman. Em driman olsem em bin go antap long heven. Taim em i go kamap lo dua tupela man i sanap i stap. Tupela kirap askim long em laik go we na em tok mi laik go lukim bikpela. Tupela kisim em i go long bikpela na taim bikpela lukim olsem em Kanage em tokim ol, long, rausim em i go long hel. Taim Kanage harim olsem em kirap tokim bikpela.

Hey bikpela aste tasol mi givim wan kina long wanpela meri long go kisim marasin long haus sik. Bikpela kirap tokim em. Kain man olsem yu i no bilong kindom bilong mi. Nau ol rausim em i go long hel paia. Taim em i go kamap bos bilong hel kirap tokim em. Ah yu raitman ya aste tasol mi lukim yu wokim gutpela pasin ya maski yu go bek gen. Taim Kanage harim olsem em givim siksti go bek gen long heven. Taim bikpela lukim olsem Kanage go bek gen em kirap tokim em. Hamas taim bai mi tokim yu go bek long hel. Kanage i paul tru long wanem hap stret bai em i go na em kirap tokim bikpela. Pastaim mi kam long hia yupela tok go long hel. Na taim mi go long hel ol tok go bek long heven na nau mi kam kamap yupela tok go long hel. Maski salim mi go long Betlehem. Tasol yu save i no tru em driman tasol.

CHRIS ABEO BOROKO

Kanage em wanpela kristen man na olgeta Sande em save go long lotu. Na Kanage i no save liklik long prea na taim em kamap long haus lotu em i save pret nogut bai pasta i makim em long prea olsem na taim Kanage i kamap long haus lotu, em save go beksait tru na sindaun na daunim het bilong em na hait long pasta bai nogut pasta lukim em. Olgeta Sande pasta i no save lukim pes bilong Kanage tasol, em i save harim olsem Kanage i kam lotu na go bek. Wanpela Sande olgeta manmeri na pikinini daunim het, pasim ai na pasta i askim Kanage bai pasim lotu bilong ol long wanpela prea. Taim pasta i kolim nem bilong em na em kirap nogut na isi tasol sanap na tok, "pasta, mi no save long prea." Taim em i tok olsem em ronim go arasait long dua, olgeta manmeri na pikinini i lukluk em na em kirap na singaut, "pasta,

mi pinis long kam lotu."

JIKZ WAPA DIXSY KIMBE

Kanage em bilong dak strit long Tarangau, wanpela taim em karim liklik boi bilong em na meri bilong em na ol go long Hagen maket, taim ol baim kaikai, wanpela man wokabaut kam na pas long lek bilong bebi we Kanage i karim, na bebi karai nogut tru we i hat long stopim em. Kanage i laik tokim meri long putim pikinini go daun na em bai karim. Kanage bik maus na tok mama kirap the baby down and carry me. Taim o tripela meri i harim ol lap na tok lapun na longlong yet long tok Inglis. Kanage kirap na tokim ol, yupela smat tru yah, bilas gut wantaim liklik beg long nek tasol poket bilong yupela em zero yah, ol meri sem na tekov.

POTUWAN WAHA MT HAGEN

Kanage bilong Pangia. Em nau klostu Krismas na lain bilong Kanage i redi long kilim pik. Las brata bilong Kanage wok i stap long Mendi taun i askim Kanage na arapela 5-pela man long go lukim em long hau ol bai oge-naisim pik. Ol haiarim wanpela 4-wil open-bek na das i go long Mendi. I no long taim ol kamap long Mendi long 7 kilok nait, ren i mekim save long ol. Brata i lukim 5-pela ya kisim taim stret long kol na tokim meri bilong em long boilim ti hariap. Man ti i boil na hot olsem paia. Meri bilong brata wokim ti long sosa kap na givim long ol wantaim pleit kaikai. Yu save kain bilong Kanage ya, em tasim sosa kap i kol na hapim olsem kolwara. Kanage kisim taim stret. Maus bilong em i kuk olgeta na kilim skin long krai isi isi long kona i stap. Brata i lukim na askim em. Watpo na yu krai? Kanage isi tasol apim het na

bekim. Brata gutpela yu wokim gutpela kaikai na mi kaikai tasol famili bilong mi long ples i no kaikai dispela kain kaikai nau mi kaikai long dispela nait olsem na mi krai. Samting tru ti mekim save long em na krai na trikim brata.

MICHAEL TIRA MORATA BLUE MAUNTEN

Kanage bilong Sepik provins. Na i save wok wantaim PNGBC long Rabaul taun. Na meri bilong em i bilong Wes Niu Briten. Na tupela i gat 9-pela pikinini olgeta. Na wanpela taim long apinun ol i kaikai pinis na ol i go silip i stap. Na long biknait stret maunten i paia na i pairap bikpela, nau papa Kanage i kirap nogut stret na hariap tru em i kirapim meri bilong en na i tok olsem, ayo ayo maunten meri yu no save isi long pairapim stret ya. Nau meri bilong Kanage kirap nogut na tokim em, yu traipela papa kela stret, longlong mas kisim yu ya, yu orait o maunten paia na yumi go nau. Yu holim olgeta pikinini na mi karim ol kago na yumi ronawe i go. Kanage kirap tokim meri bilong en olsem, maunten bilong yu pairap na mi kirap nogut stret ya yumi kilim sampla pikinini i no strong long en. Na yumi go. meri ya kirap tokim Kanage olsem, olgeta belo yu no save mallko long am long haus. Wau yu kisim taim a? Kanage sem nogut tru na tekov.

JUNIAS KAI POT MOSBI

Lapun Kanage bilong Waromo, insait long Vanimo distrik. Em i gat rispek bilong ol lain long Wes/Is kos na Vanimo taun olsem wanpela lida. Wanpela taim ol meri wes kos na Vanimo taun i protes mas i go long opis bilong gavman na as bilong mas ol i no laik rot i op long Vanimo/Wutung i go long Jayapura. Lapun Kanage

kam raun tu long gavman opis na taim ol meri lukim em ol i amamas na laikim bai em i givim liklik toktok. Olsem na Kanage nam-bawan toktok i go olsem mi sapotim mas bilong yupela ol meri ol man tu i stap na ol i sem taim ol harim lapun Kanage i mekim dispela tok. Lapun Kanage i tok, ol meri gutpla mas tasol ol man kisim i go long Jayapura em i go i stap 2, 3 o 4 de na em i go kapsaitim kisim win na i kam long yu mama, olsem na noken tingting tumas long dispela rot. Taim ol man na meri ahrim ol i dai stret long lap na yu save Jayapura em hap we lapun Kanage save himlimbur tu ya.

JAMES PAMI VANIMO

Lapun Kanage bilong kerema tasol em i sanapim bes bilong em long warastone. Yu save, bildim haus em hap wok bilong lapun Kanage. Em bildim haus bilong son Junia Kanage na taim wok i pinis em i tromoi hama na so i go daun OK bihain em yet i kalap i go daun. Tasol, sotpela trausis em werim hukim stret antap long dispela 6 inches nil em yet i nilim i go hapwe. Sori lapun Kanage i hangamap i stap antap tupela lek em i tromoi i go i kam husat bai helpim lek i no tasim graun. Bihain tumbuna Kanage lukim em singautim junia Kanage paps bilong em yet, long i kam helpim lapun Kanage. Taim junia Kanage i kam lukim paps Kanage em i dai long lap stret bikos lapun Kanage i huk na hangamap long 6 inches nil. Nau junia na tumbuna Kanage i kam helpim lapun Kanage na ol i rausim em long nil taim stori bruk ol lain i kam lukim dispela nil lapun Kanage i hangamap na ol i tok tru tumas lapun Kanage i brukim rekot long huk antap long 6 inches nil.

BEATUS AUHARAI PAE VANIMO



■ Kanage em wanpela wokman bilong harim baket. Wanpela taim em i kisim fotnait bilong em. Kanage i painim poroman bilong em Indai. Kanage wantaim Indai i baim wan katen bia. Man tupela ya dring olsem waitman na spak olsem kanaka. Tupela spak long-long na Kanage i tok poroman nem bilong yu em Indai, bai mi putim nik nem bilong mi sanap. I no long taim indai i lusim Kanage na tekov long haus. Kanage i painim poroman bilong em Indai na go long rot. Sampela man i askim Kanage yu painim husat, mi painim na nem bilong yu husat, man longlong Kanage tingim nik nem bilong em na tokim ol Sarap. Ol i askim yu painim husat, mi painim Indai. Nem bilong yu? Sarap tru yu painim Indai a? Man ol i paitim Kanage nogut tru em i bagarapim trausis bilong em na ronawe i go long haus. Na tu em i edmit long haus sik tupela wik.

PIUS MIAMBA RABAU

■ Kanage i bilong ples Mopex long PS kantri. Wanpela taim Kanage go lukim vidio so. Em lukim wanpela woa muvi. Na em lukim sampela soldia kalap long parasut. Na boiros kisim bikpela filins tru olsem em tu mas kalap long parasut. Em go long stoa na baim wanpela umbrella na go long haus. Yu save Sepik ya kinkain tingting save ya. Kwik taim tru Kanage go antap long wanpela longpela kokonas wantaim embrela bilong em. Em sindaun antap long kokonas na opim embrela na holim kalap kamdaun. Turangu boros i no tasim graun yet na dsi nating antap. Jon bilong ambrela i lushus antap yet na Kanage pundaun nogut long nus bilong kokonas. Turangu Kanage isi tasol kirap holim as bilong em na wokabaut i go long haus.

CLEMENCE URAMANI KIMBE

■ Kanage em wanpela PNG Kumul pilai long ragbi lig na ol PNG Kumul bin go pilai long Niu Silan wantaim ol Kiwis. Kanage em save pilai long sait wing. Em liklik man olsem Geoff Toovey tasol em wanpela hatman long takolim sapos em lukim spes long ron. Ol pilai na Kiwis i bin lid long foa pions. Tingting bilong Kanage long em mas wokim trai bilong em yet na bai ol i dro o win long tu pions bikos taim tu klostu bai pinis long fut-taim. I go na las minit tru bal kam long Kanage na Kanage i no givim sans taim em lukim liklik rot long ron. Lek bilong em i tasim as bilong en na em das go arere long sailtain na lainsmen tu holim flek na ron long sait. Man klostu stret redi long takolim Kanage. Kanage lukim fulbek i bikpela man na sapos em takolim Kanage, Kanage bai kisim taim. Kanage tingting olsem na em suruk. Hariap tru em kisim liklik tingting na pasim bal go long lainsmen na lains em tu kirap nogut long ket-sim bal tasol fulbek bilong Kiwis kam givim hat taskol long lainsman. Kanage amamas olsem em i no bin kisim takol bilong kain traipela man bilong ol Kiwis. Samting tru Kanage poret na giaman pasim bal i go long lainsmen.

WEIPAS TAWAREPA WAIGANI



KANAGE



■ Kanage em hapkas bilong Fiji na mama bilong em long Morobe provins. Na em i save wok wantaim Lae bisket na marit long meri Kawas, na Kanage em i kamap bikpela long ples bilong papa bilong em long Fiji. Nau em i kam long ples bilong mama na wok, na em i no save gut long lo bilong PNG gavman. Wanpela taim long biknait tru long wok em i kirap na paitim meri bilong em. Em i nekim em hap indai stret na meri kisim bikpela bagarap, em i mekim meri i kisim taim stret. Nau meri kirap kotim Kanage long lokol kot. Na mejistret i askim meri olsem, bilong wanem na em i paitim yu na meri kirap tokim kot olsem. Em laikim pilai wantaim em, tasol mi les long pilai gem long biknait. Nau mejistret i askim Kanage olsem, yu brukim lo long pasin paitim meri na bai yu go long kalabus, kot i askim Kanage olsem yu gat sampela tok nau. Kanage kirap tokim kot olsem, lo bilong PNG i maritim dispela meri o yu maritim dispela, meri bilong mi o papa bilong yu i maritim meri bilong mi? Yu nogat sem stret yu

kisim sem na lo bilong yu i kisim bikpela sem. Lap na belhat i kisim mejistret na em i go insait long rum.

KINSTAN KOEE POT MOSBI

■ Wanpela taim Kanage tu em papa na em spak nogut tru na go bikhet insait long stua bilong ol Korja i stap. I no longtaim na ol Korja putim wantu long em na baga nogut ron i go autsait. Em ron i go autsait na sanap pulim win i stap na ol polis i kam kamap, na askim em long wanem samting i kamap. Em kirap nau na konim ol polis na tok, nogat bos mi pesman long go insait long baim skis na nogat ol Caico ya wok long sevim ol lain kam bihain olsem na mi belhat na Chaico ya swerim mi. Taim em swerim mi nau mi kirap paitim em na mi ron i kam autsait. I no longtaim na papa bilong stua i kamaut, taim Kanage i lukim olsem em save olsem em konim ol polis pinis na em suruk i go bek liklik. Taim baga nogut lukim wanpela klia spes em kirap singaut long papa bilong stua. Hey Chico, yu China Kunfu ha. We Papua New Guinea get bottle stone your Kunful nothing. Kanage tok olsem na em tekop go pinis.

CHRIS ABEO BOROKO

■ Kanage save pilai ragbi long wanpela tim long Mosbi. Em i wanpela strongpela na top pilai.

Wanpela taim tim Kangarus bilong Ostrelia kam pilaim tim bilong Kanage long Mosbi. Kanage i kepten bilong Mosbi sait na Mal Meninga i kepten bilong Ostrelia.

Ol pilai i go na skoa i bin stap olsem 10 bilong Mosbi na 14 bilong Kangaru. Kanage i bin wok long pilai strong na hat tru bai ol i ken winim ol Kangaru. Taim Mal Meninga i kisim bal na kam Kanage i apim lek bilong Mal tasol na daunim em i stap. Klostu long fultaim stret, Kanage kisim bal na ron i go bamim na pundaunim ol birua nabaut i go klostu long trailain bilong Kangarus stret. Tasol em lukim Mal na em poret nogut Mal i bekim bek long sampela hat takol Kanage i bin mekim long Mal. Tasol Kanage harim ol sapatas i wok long singaut long em mas go yet na putim trai. Olsem na Kanage pasim ai tasol na go hitim Mal, tasol Mal i apim na laik daunim em taim Kanage i poret long kain takol bilong Mal na singaut bikmaus olsem, "Mal, please put mi down easy, we are not playing or seal, mi les long tok nogutim yu long ai bilong planti man." Ol manmeri harim singaut bilong Kanage na putim han long maus bilong ol, ol tu ol les long lap na mekim Kanage i sem.

BORRO TEA WAIGANI

■ Kanage em wanpela marit man. Em i gat tripela pikinini meri tasol i nogat pikinini man. Bihain meri bilong em i gat bel gen na em i go long haus sik bilong karim. Taim Misis i stap long haus


sik Kanage i wok ong prea hat tru olsem meri i mas karim pikinini man. Wanpela de Kanage i go vis-itim Misis long haus sik. Taim em i kamap long haus sik, nes i tokim em olsem, Misis i karim pikinini meri gen. Kanage i no wanbel long dispela nius na em i tanim na go bek long ples. Long rot ol poro bilong em i askim sapos meri i karim pikinini man. Kanage i belhat na singaut long ol poro bilong em olsem, "Mi les pinis long dispela meri hia tasol na i nogat wanpela bai senisim mi. Tumora tasol bai mi sainim pepa bilong lusim em." Ol poro bilong em i harim na lus wanwan i go long bus.

CLIVE WARIBO KIMBE

■ Bed de bilong junia Kanage na paps Kanage i amamas tru. Man paps Kanage i no pilai long kaikai. Em kaikai na bel bilong em i tait nogut tru. Em siliy nogut na em go raun long taun. Taim em raun i stap, em pilim pekpek nogut tru. Em sanap i stap na wanpela lapun i kam autsait long haus. Man kela bilong em i sain olsem san. Paps Kanage i painim hat tru long lap, bikos em i pilim nogut tru. Em kirap na tokim lapun, lapun inap mi kam pekpek long kela bilong yu? Na lapun i harim na tok, kela o wanem samting. Na paps Kanage i tok, sori i no kela mi tok tok long toilet.

JULIAS M. WALYNG AMBUNTI

Mun i kisim pes olsem wanem



Bipo bipo tru long Siwai insait long sautwes Bogenvil, ol pikinini i save wetim mun long kamap na givim lait bilong em na ol bai pilai.

Long olgeta nait long wanpela ples insait lojng Siwai, ol pikinini i save amamas na pilaim ol pilai bilong ol olsem hait na painim, ronim wanpela arapela, stori na ol arapela pilai moa.

Sampela papamama i save go painim pis na ol arapela i save painim ol arapela hauslain na pren long ples na sindaun stori na toktok long ol samting i kamap insait long komiyuniti.


Sampela taim i lus na ol papamama i lukim olsem sampela pikinini i wok long lus nating isi isi. Ol i wari na ol laik painaut wanem samting i kamap long ol o ol i go we.

Ol i pasim tok long was gut taim ol pikinini i pilai long nait.

Ol i painaut olsem long wanpela nait, mun tasol i wok long kilim wanpela pikinini.

Orait, olgeta manmeri na pikinini long ples i bung na ol i pasim tok long bagarapim mun bikos long pasin nogut em i wokim long kilim dai ol pikinini. Ol i kamapim wanpela plen.

Wanpela grashopa nem bilong em "Powata" we i gat sap tit i laik bai em i go pas long plen bilong kilim indai mun.



Tasol ol i wari long wanem rot ol bai bihainim long go antap long skai na long mun. Spaida i kwiktaim tok long givim helpim bilong em. Em i tok long wokim rop i go antap long skai long Powata i bihainim na kamap long mun.

Long wanpela nait taim skai i klia na mun i sain nogut tru antap long ples na i gat planti ol sta i givim lait bilong ol, olgeta ples lain i redi i stap. Tude stret, mun bai i dai, ol pipel i tok.

Spaida i go pas na pulim rop bilong em i go long skai taim Powata i bihainim em. taim em i

kamap long mun, kwiktaim em i brukim em wantaim sap tit bilong em.

Orait, bikpela tudak i karamapim ples. Tasol ol ples lain i no amamas bikos nogat lait na ol i no inap long wokim ol samting ol i laik long nait taim taim mun i save givim lait bilong em.

Ol i toktok na wanbel long lusim sampela liklik pawa bilong mun i stap. Olsem na ol i kisim ol hap hap mun we Powata i brukim na pondaun na ol i pasim wanpela sait bilong mun

wantaim long en. Na em i ken givim sampela lait.

Ol Siwai pipel i save bilipim olsem long dispela rot na mun i kisim pes we yumi save lukim long olgeta mun. Dispela em long kwata, hap tri kwata na ful mun.

Terence Tarapei, wanpela Gred 4 sumatin long Sen Peters Praimeri skul long Erima insait long Nesanel Kapitel District na i bilong Siwai long Sautwes Bogenvil i raitim dispela stori.

Nem: Rosemund Oris

Krismas: 18 (meri)

Adres: C/o - Catholic Mission Lote, P O. Box 125, Vanimo, Sandaun Province.

Save laikim: Pilai soka, volibal na basketbal, lukim video na TV, go lotu na harim ol pop musik na mi amamas long bekim olgeta pas.

Nem: Jo-Nex Gawi

Krismas: 19 (man)

Adres: C/o - EBC, Wewak, PO. Box 144, Wewak, ESP.

Save laikim: Go waswas long raunwara, painim kainkain abus kisim sak-sak na kukim arere long raunwara na harim ol kantri musik, harim pop musik na lokol musik, na raun long olgeta hap long midel Sepik o kantri sait na mekim pren.

Nem: Wangapa David

Krismas: 26 (man)

Adres: Abisima Trading, PO. Box 1347, Busu Rd, Lae, Morobe Province.

Save laikim: Harim gospol musik, go lotu, raitim pas, go raun na lukim ol nupela ples na ol wantoks, ridim baibel, serim samting aidia wantaim ol narapela brata susa. Bikpela tingting bilong mi em long painim wanpela kristen meri bilong tok tru, serim samting, aidia na mekim rait disisen na marit.

Nem: Saimon Yani

Krismas: 20 (man)

Adres: C/o - Tapen Lutheran Health Centre, PO. Box 16, Saidor District, Madang Province, PNG.

Save laikim: Wokim gaden, wokim haus, pilai volibal, soka i go lotu, mekim sios wok, wok lainim ol mamapapa long kristen edukesen, go long bung, kisim stia tok na sanap strong na kari-maut wok bilong sios.

Nem: Danny Dion

Krismas: 26 (man)

Adres: PO. Box 1993, Lae, Morobe Province.

Save laikim: Painim wanpela meri long wokim penpren na bihain mitupela i ken marit mi laikim wanpela kristen meri i mas i gat 25-26 krismas na i mas wok wantaim kampani o wanpela tisa.

Nem: Francis Krisawa

Krismas: 20 (man)

Adres: Yawasoro Block, PO. Box 936, Wewak, East Sepik Province.

Save laikim: Wok gaden, pilai soka, pilai gita na amamas long bekim pas.

Nem: Stanley Mologhz

Krismas: 21 (man)

Adres: PO. Box 891, Boroko, National Capital District.

Save laikim: Pilai soka, basketbal, volibal, tok stori, Lukim muvi, sensim poto na laikim gutpela pren.

Nem: Lawrence Peter

Krismas: 20 (man)

Adres: PO. Box 125, Vanimo, Holy Cross.

Save laikim: Go lotu, tok pilai wantaim ol pren na painim wanpela meri bilong maritim.

Nem: Martin Tante

Krismas: 17 (man)

Adres: PO. Box 290, Rabaul, East New Britain Province.

Save laikim: Go lotu, Kisim trenim kun fu, Lukim EMTV, raitim leta long ol pen-prens na ridim Baibel.

Mi paul long mining bilong boipren



Dia Laipain

Mi paul long gat boipren em i wanem samting. Inap yu mekim klia dispela samting long mi?

School Girl

Dia Pren,

Yu inap save long planti manki long skul, klas o long ples we yu kolim ol long pren.

Tasol taim wanpela yangpela meri i toktok long boipren em i minim olsem dispe' a em spesel pren bilong em. Em i moa impoten long ol arapela manki. Em i ken min olsem manki ya i lukim wanpela meri olsem spesel gelpren bilong em winim ol arapela meri.

Long sampela taim, yangpela meri i ken les long boipren bilong em bihain ol i wokim pren pasin wantaim. Bihainim dispela, ol bai i no stap olsem spesel pren na meri i ken painim nupela boipren. Sampela taim tupela

i ken strongim prensip bilong ol na ol i ken marit.

Dispela i bekim askim bilong yu? O yu askim bikos yu laik save moa long wanem kain samting tupela boipren na gelpren i save wokim.

Dispela i no isipela samting long bekim bikos i gat planti kain kastom na tingting (aidia). Long Tok Pisin sapos yu tok "Dispela man i pren wantaim dispela meri," i minim olsem tupela i slip pinis wantaim. Tasol taim yu tok long tok Inglis olsem "Em i boipren bilong mi," em i no min olsem yu slip pinis wantaim em. Em i ken min olsem em i spesel pren bilong yu.

Wanem ol samting gel na boipren bilong em i ken wokim wantaim? Mipela i no nap tokim yu long ansa bikos samting i stap long kastom bilong yu, ol hauslain na pren bilong yu. Long sampela hap bilong PNG, em i no kastom long gat boipren na gelpren. Ol i ken rait long wanpela arapela. Tasol long narapela kastom i oraitim long manki i go long haus bilong gelpren bilong em na slip wantaim em. Long planti hap, kastom i bosim ol samting.

Planti pipel, moa yet ol dispela i stap long taun i save bihainim pasin bilong ol waitman we boi na gel i raun wantaim na save gut long wanpela arapela. Long dispela rot, ol bai painim gutpela patna.

Sapos yu wanpela Kristen, bai yu save olsem sios i save givim gutpela stia skul long boi na gel i noken slip wantaim inap ol i marit. Yu mas save tu olsem sapos gel i slip wantaim boi, bai em i gat bel.

Em i wei bilong ol meri husat i gat 14 na 15 krismas na antap long laikim ol man,

wokim prenpasin na bihain marit. Ol kain pipel i gat ol kain kastom long dispela. I gutpela long ol yangpela meri long askim. I moabeta long ol yangpela meri i askim long kisim ol gutpela stia tok. Na i moabeta long askim ol lain husat i save long pasin kastom bilong yu na i tingim yu na wari long long givim yu gutpela stia tok. Dispela i ken wanpela famili memba, pasto o pater, studen kaunsela na tu ol wanlain pren bilong yu. Yu tingting pastaim long ol samting ol i tokim yu long en, skelim gut na kisim ol gutpela poin long ol.

Yu yet bai mekim disisen sapos yu redi long gat boipren. O sapos olsem wanem, yu ken wet inap yu bikpela moa. Olsem skul-meri, ating i no gutpela yet long mekim pren wantaim wanpela manki tasol na pas olgeta wantaim em. Tu long dispela taim, em i isi long yu tingting tumas long boipren na yu no wokim gut long skul wok bilong yu. Long planti taim, tingting bilong ol manki i save narakain long dispela we ol meri i gat. Mekim na ol i mekim planti meri i no amamas na sampela i bagarapim laip na sindaun bilong ol bikos ol i bihainim laik bilong ol boipren.

I moabeta yu save long wanem samting yu laik bipo yu stat long wokim prenpasin. Na sapos boipren i laikim yu long wokim samting we yu bilip i no stret, yu ken tok nogat long en. Yu ken brukim prensip bilong yu sapos yu laik. Planti taim, man bai luksave long yu bikos yu save yu laikim wanem samting na yu gat strong long bihainim gutpela tingting bilong yu.



Bik Bro REBO



IGO MOA NEKS WIK!



SIPAK MAIKY



IGO MOA NEKS WIK!



WANTOK

Askim long klasifaid ads: Miri Aiori Ext. 214, John Iagata Ext. 218

KLASIFAID

WINIM
FRIKAR
KOMPETISEN



Yu save olsem yu inap winim wanpela fri kar long Freeway Motors?

Baim wanpela Independent niuspepa, na katim hap toksave long baksait, raitim nem bilong yu na salim i kam.

Salim plenti bilong dispela toksave na bai yu kisim plenti sans long win.

Hariap na kisim wanpela Independent niuspepa tete.

Salim dispela hap toksave, i kam long:

**The Independent/Freeway Motors
WIN A CAR COMPETITION**

P.O. Box 1982, Boroko, I.I.I.

THE Independent

Insait long **NAMATANAI**

Kisim pepa bilong yu **Independent,**

Wantok na **PNG Business**

long Buluminski Enterprise -



POST PNG
GOING PLACES




Word Publishing Co. Ltd.

Karim nius i kam klostu long ples.



• Pilaia bilong DPM i redi long autim bal taim tim bilong em i salensim Fisheries long Pablik sevans netbal resis.



• Pitsa bilong Tigers long Pot Mosbi men sofbal resis soim stail bilong em ya.



• Pitsa bilong Manalos Ismael Marnapal i tromoi wanpela strongpela bal long Pot Mosbi sofbal resis.



• Netbal gem namel long Fisheries na DPM i stap long Pablik sevans netbal resis.



• Gren fainel bilong Central Kap namel long Kaparoko na Kemo long Bisini soka graun.



• Ravian Karpal bilong Waghi Tumbe i holim bal na ron egen Goroka Lahanis.



Wiken Spots Dro

PEPSI NCD PUBLIC SERVANTS SOCCER

Saturday December 12, 1998

Bisini 1

08.30	M1	Education vs PMGH
09.50	W1	Teachers vs Diwai
10.50	M1	Teachers vs NPF
12.10	W1	NCDC vs Harbours
13.10	M1	NCDC vs NBC
14.30	W1	Air Niugini DAL
15.30	M1	Air Niugini vs BPNG

Bisini 2

08.30	M2	Police vs Defence
09.50	W2	Fisheries vs Police
10.50	M2	Elcom vs Diwai
12.30	W2	NCC vs IRC
13.10	M2	Commerce vs NCC
14.30	W2	BPNG vs Commerce
15.30	M2	Cellnet vs Fisheries

Byes: Harbours (M1)
IRC (M2)

Sunday December 13, 1998

Bisini 1

08.30	M1	Works vs NSO
09.50	W1	UPNG vs Works
10.50	W1	NPF vs DCA
12.10	M1	Telikom vs DCA
13.10	W1	NBC vs Telikom
14.30	W1	Defence vs Transport
15.30	M1	UPNG vs DAL

Bisini 2

08.30	M2	POSF vs A/General
09.50	W2	A/General vs ICPNG
10.50	W2	PMGH vs Transport
12.10	M2	Health vs Transport
13.10	W2	Cellnet vs POSF
14.30	W2	PNGBC vs NSO
15.30	M2	ICPNG vs PNGBC

Bye: Education (W2)
Elcom (W2)

GORDONS TOUCH FOOTBALL

Saturday December 12, 1998

C Grade

8.00	Magpies vs Eels
8.40	Rabbits vs Storms
9.20	Warriors vs Panthers
10.00	Dragons vs Eagles
10.40	Tigers vs Raiders

B Grade

11.20	Sharks vs Bulldogs
12.10	Steelers vs Heelers
13.00	Eels vs Magpies



•Tupela taitim bung long salens bilong Sentrel Kap.

A Grade

13.50	Rabbits vs Storms
15.00	Eagles vs Dragons
16.10	Steelers vs Heelers

Sunday December 13, 1998

C Grade

8.00	Steelers vs Heelers
8.40	Sharks vs Bulldogs

B Grade

9.20	Raiders vs Tigers
10.10	Warriors vs Panthers
11.00	Dragons vs Eagles
11.50	Storms vs Rabbits

A Grade

12.40	Sharks vs Bulldogs
13.50	Eels vs Magpies

15.00	Raiders vs Tigers
16.10	Panthers vs Warriors

POINTS TABLE

ROUND NINE

A GRADE

CLUB	PL	W	L	D	F	A	PTS
Raiders	9	8	1	-	88	37	15
Magpies	9	6	2	1	115	62	13
Heelers	9	5	2	2	76	57	12
Tigers	9	5	3	1	91	68	11
Eels	9	5	3	1	70	77	11
Steelers	9	4	3	2	76	76	10
Warriors	9	4	4	1	89	79	10
Warriors	9	4	4	1	89	79	9
Eagles	9	4	4	1	78	72	9
Sharks	9	4	4	1	68	81	9

Dragons	7	4	2	1	85	31	9
Bulldogs	9	3	4	2	98	84	8
Rabbits	8	3	5	1	69	88	7
Panthers	9	1	7	1	47	107	3
Storms	9	-	9	-	33	131	0

B GRADE

Heelers	9	7	2	-	60	33	14
Bulldogs	9	6	1	2	65	41	13
Warriors	9	5	3	1	67	32	12
Steelers	9	4	1	4	43	45	12
Eagles	9	4	3	2	54	45	10
Raiders	9	4	3	2	64	60	10
Rabbits	9	4	4	1	47	50	9
Panthers	9	3	3	3	29	45	9
Eels	9	4	5	-	55	36	8
Tigers	9	4	5	-	44	38	8
Dragons	7	3	3	1	51	35	7
Sharks	9	3	6	-	29	61	6
Magpies	9	2	7	-	40	59	5
Storms	9	-	7	2	21	64	2

C GRADE

Tigers	9	8	1	-	53	20	15
Raiders	9	6	2	1	75	42	13
Steelers	9	6	2	1	61	31	13
Warriors	8	6	2	1	50	22	13
Sharks	9	5	3	1	47	37	11
Heelers	9	5	4	-	54	34	10
Dragons	7	4	2	1	50	29	9
Eagles	9	3	4	2	45	33	8
Rabbits	9	3	4	2	26	62	8
Panthers	8	3	4	2	51	69	8
Eels	9	2	6	1	42	32	5
Storms	9	2	6	1	36	66	5
Magpies	9	2	7	-	34	57	4
Bulldogs	8	1	7	1	18	77	3

PORT MORESBY WOMENS SOFTBALL ASSOCIATION

1998/99 SEASON

ROUND TWO - Saturday December 12, 1998

Dimond 2




9.00	C	Gazelle vs Admiralty
10.30	C	Sunkist vs Norths
12.00	B	Royals vs Chebu
1.30		
3.00	A	Royals vs Wantoks

Dimond 3

9.00	C	Wantoks vs Chebu
10.30	B	Malangan vs All Stars
12.00	B	AB Bears vs Admiralty
1.30	A	Gazelle vs All Stars
3.00	A	AB Bears vs Norths



ZENAG - Gutpela kiau



Mommers bai resis yet long holim sia bilong presiden

PRESIDEN bilong Papua Niugini Futbol Asosiesen Peter Mommers i bilip olsem em i gat namba long winim bek sia bilong em.

Mommers i mekim toktok namba wan taim bihain long vais presiden bilong LFA John Peka na David Chung bilong Hailens Rijonel Soka Asosiesen i go pas long kempen na rausim em na ol eksekutiv bilong em.

Peka na Chung i laik autim Mommers bikos ol i ting olsem presiden nau i no mekim gut wok bilong em.

Peka em i makim maus bilong Momase na Chung em i makim maus bilong Hailens rijen long bung wantaim na votim aut Mommers long PNGFA opis. Namba wan kibung bilong dispela tupela rijen i bin kamap long Momase Rijonel Soka tonamen long Wewak, Is Sepik provins.

Mommers i toktok strong olsem em i gat strongpela bilip olsem olgeta presiden bilong Hailens, tripela vot bilong em bai kam long Momase na ol arapela bai kam long Sauten na Niugini Ailans.

Presiden i tok John Peka na David Chung i no memba bilong wanpela asosiesen na ol bai i nogat pawa long vot. Sapos LFA i makim em long resis long presiden em bai gat sans tasol nogat, sori tumas.

Momase Soka Federesen na Hailens Soka Federesen i no memba bilong PNGFA. Tasol PNGFA i save luksave long tupela bodi long promotim soka insait long dispela tupela rijen.

Mommers i tok em i amamas tru long wok bilong Hailens na Momase Soka Federesen tasol ol opisel i nogat pawa long vot.

Las wik tupela opisel bilong Wabag na Kimbe i tokaut olsem ol bai sapatim Mommers taim PNGFA i holim jenerel miting bilong en long Februari 25.

Mommers bai holim toktok wantaim ol eksekutiv bilong em long wanem samting ol bai mekim long holim yet opis.

Em i tok olsem em i save bilip olsem sapos ol opisel i stap longpela taim ol bai i gat sans long bringim developmen long soka. Em i tok sapos mipela i senisim ol opisel klostu klostu bai dispela i bagarapim tasol wok soka.

Presiden i toktok strong olsem ol dispela eksekutiv i gat bikpela sans long bringim senis long soka. Nau yet OFC na tu FIFA, intanesenel soka bodi bai givim mani long PNGFA long karim wok developmen bilong em.

Mommers i tok em i laik stap yet bikos em i laik pinisim jeta wok em i statim na tim tasol mani i kam long FA na OFC long karim aut ol dispela wok.

Soka Koles long Nu Silan bai i no inap op

... FIFA boss Blatter i sik

HENRY MORABANGi raitim

OSANIA Futbol Konfederesen (OFC) i stapim program bilong selebresen bilong nupela soka koles long Auckland, Nu Silan long dispela wiken.

Insait long wanpela pas i go long presiden bilong PNG Futbol Asosiesen, Peter Mommers, sekretari bilong OFC Josephine King i tokaut olsem OFC i stapim program bikos presiden bilong FIFA Seph Blatter i sik.

Aninit long program Blatter i mas opim dispela nupela soka koles tasol nau em i sik, OFC i surikim opening bilong koles i go long sampela taim bihain.

Mommers i tokim Wantok olsem dispela i min olsem Blatter bai i no inap holim konferesen bilong niusman long givim bal i go long Bougenvil soka. Blatter husat bai makim FIFA bai givim 250 ball i go long Mommers taim ol i bung long dispela wiken long Auckland.

Mommers i tok Blatter i sik em i min olsem Bougenvil soka bai i no inap kisim bal. Dispela bal em Bougenvil gavman bai yusim long bikpela

spots festival em ol i ting long holim long Arawa long neks wik.

Presiden bilong PNGFA i tok olsem OFC i bin tokim em long noken wari bikos FIFA i mekim promis pinis long givim bal, na ol bai givim yet.

Insait long arapela helpim, UEFA, wanpela bikpela soka bodi long Yurop i redi pinis long givim helpim long Aitape Disasta. OFC tu i bin kisim sampela toksave pinis long UEFA olsem ol bai givim helpim i go long Aitape Disasta projek.

Mommers bai go long Nu Silan long tumora long sindaun insait long wanpela miting bilong OFC.

Insait long miting, em ol i toktok long ol hevi i kamap insait long Osenia rijen.



• PNG tim husat i bin go daun long 16 Komanwelt gem long Kuala Lumpur.

Ol bikhet tim bai aut long SP Gems

OL TIM husat i gat nem long Saut Pasifik Gems long Guam neks yia i mas stat long harim tok.

Dispela em hap toktok bilong sekretari jenerel bilong PNG Spots Federesen John Dawanincura husat i no amamas long ol tim i bin kamap long miting.

Insait long wanpela miting long SP Gems i kamap long Novemba 23, 8-pela spots husat i gat nem long Guam i no bin kamap. Ol dispela spot em basketbal, boksing, karate, lawn tennis, golf (man na

meri) yachting, ragbi yunion na tebol tenis.

Ol tim i kamap long dispela miting em volibal, sofbal, judo, weatlifting, swimming, atletik, taekwando, netbal na soka.

Dawanincura i tok em i sasim dispela tim husat i no kamap K1000. Ol dispela spot i no inap baim mani, dispela sas mani bai kam yet long skel we PNG Spots Federesen bai givim long ol.

Sekretari i tok em i no laik kisim ol tok sori olsem ol opisel bai i no

inap kamap long miting. Sapos ol i no laik kamap orait, ol i mas salim wanpela mausman o tokim wanpela opisel bilong narapela spot long makim ol long miting.

Ol dispela opisel bilong narapela spot tu i mas tokaut olsem ol i makim dispela spot husat bai i no inap kamap long miting.

Gavman i no givim K800,000 na i min olsem siaman bilong fan-raising Paddy O'connor na em yet i hatwok tru long painim dispela mani.

Na em bai i amamas sapos ol opisel bilong ol dispela miting i mas stap long miting na harim wanem ol toktok i kamap long stretim wok redi bilong dispela Saut Pasifik Gems long Guam.

Dawanincura i tok sapos ol tim i no sindaun long tripela miting em i min olsem ol bai i no inap go long Guam.

Insait long arapela nius opis bilong PNG Spots Federesen bai pas long Disemba '24 na op gen long Januari 1, 1999.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.